# CBETA電子佛典集成

CBETA Chinese Electronic Tripitaka Collection ebook

T24n1452

# 根本說一切有部尾陀那目鴻迦

唐 義淨譯

# 目次

- 編輯說明
- 章節目次
  - 1 尼陀那
    - **1**.
    - **2**
    - **3**.
    - **4**
    - **-** 5.
  - 2 月得迦
- 巻目次
  - · 001,
  - 002
  - 003
  - 004
  - · 005
  - 006
  - · 007
  - 008
  - 009
  - 010
- 贊助資訊

## 編輯說明

- 本電子書以「CBETA 電子佛典集成 Version 2023. Q1」為資料來源。
- 漢字呈現以 Uni code 3.0 為基礎,不在此範圍的字則採用組 字式表達。
- 梵文悉曇字及蘭札字均採用羅馬轉寫字,如無轉寫字則提供字型圖檔。
- CBETA 對底本所做的修訂用字以紅色字元表示。
- 若有發現任何問題,歡迎來函 service@cbeta,org 回報。
- <u>版權所有</u>,歡迎自由流通,但禁止營利使用。

大唐三藏法師義淨奉 制譯

大門總攝頌曰:

初明受近圓, 次分亡人物,

圓壇并戶鉤, 菩薩像五門。

別門初總攝頌曰:

近圓知日數, 界別不入地,

界邊五眾居, 不截皮生肉。

第一子攝頌曰:

近圓男女狀, 非近圓為師, 難等十無師, 莫授我七歲。

爾時薄伽梵在室羅伐城逝多林給孤獨園。具壽鄔波離來詣佛所,禮雙足已在一面坐,合掌恭敬白佛言:「世尊!若苾芻與他受近圓時,彼若根轉,得名善受不?」佛言:「是受近圓,應可移向苾芻尼處。」

「復次世尊!若苾芻與他男子受近圓時,而此男子作女人音聲、女人意樂及形狀法式,此人得名為受近圓不?」佛言:「鄔波離!是受近圓,諸苾芻得越法罪。」

「若苾芻尼與他女人受近圓時,而此女人作男子音聲、男子意樂及 形狀法式,此人得名受近圓不?」佛言:「是受近圓,諸苾芻尼得 越法罪。」

「若以不受近圓人為親教師,此人得名受近圓不?」佛言:「是受 近圓,諸苾芻得越法罪。」

「若人身有難事,自言我有,諸苾芻為受近圓,此人得名受近圓 不?」佛言:「不名受近圓,諸苾芻得越法罪。」

「若人身無難事,自言我有,諸苾芻為受近圓,此人得名受近圓 不?」佛言:「是受近圓,諸苾芻得越法罪。」

「若人實有難事,自言我無諸難,苾芻為受近圓,此人得名受近圓不?」佛言:「不名受近圓,諸苾芻無犯。」

「若人實無難事,復自言無,諸苾芻為受近圓,此人得名受近圓不?」佛言:「此名善受。」

「若苾芻與出家者未受十戒<mark>而</mark>受近圓,此人得名受近圓不?」佛 言:「是受,諸苾芻得越法罪。」

「若人受近圓時,親教師不現前,諸苾芻為受近圓,此人得名受近 圓不?」佛言:「是受近圓,諸苾芻得越法罪。」 「若人受近圓時,作如是語:『莫授我近圓。』諸苾芻為受,此人得名受近圓不?」佛言:「非受近圓,諸苾芻得越法罪。」「如世尊說:『若人年滿七歲能驅烏鳥,應與出家。』者,大德!若有童子年始六歲,於僧食厨能驅烏鳥,此人應與出家不?」佛言:「許滿七歲,此不應與。」「若滿七歲不能驅烏,與出家不?」佛言:「不應,許能驅烏故。」第二子攝頌曰:

日數每應知、 告白夜須減、 六日十八日、 說戒不應頻。

爾時佛在室羅伐城,有婆羅門居士等至苾芻所問言:「阿離耶!今 是何日?」答言:「不知。」諸人告曰:「聖者!外道之類於諸日 數及以星曆悉皆善識,仁等亦應知日數星曆。云何不解而為出 家?」遂默不答。諸苾芻以緣白佛,佛言:「我今聽諸苾芻知日數 星曆。」時諸苾芻悉皆學數星曆及以算法,便生擾亂廢修善業,佛 言:「應令一人學數。」雖聞佛教,不知誰當合數?佛言:「應令 眾首上座數之。」是時上座忘失其數,使知事人亦不能憶,佛言: 「可作泥珠、或作竹籌,滿十五枚,每日移一。」如此作時被風吹 亂,佛言:「應取十五枚竹片,可長四五指,一頭穿孔以繩貫之, 挂壁要處,每日移一。」時彼舉眾皆共移籌,佛言:「上座及知事 者應移。」時有婆羅門居士至苾芻所問言:「聖者!今是何日?」 彼便報曰:「仁今可問上座及知事人。」諸人告曰:「仁等亦有計 番當直知日人耶?」時諸苾芻默然無答。以緣白佛,佛言:「應可 作白普告眾人。」時諸苾芻隨處告白,佛言:「不應隨處作白,然 於眾集,在上座前而為秉白:『大眾應知:今是月一日。』」諸俗 聞說復云:「仁等豈可不說半月黑白分耶?」答言:「不作。」苾 **芻白佛,佛言:「當稱黑白月分。應如是說:若於晡後大眾集時,** 令一苾芻於上座前合掌而立,一心恭敬作如是白: 『大德僧伽聽! 今是黑月一日,仁等應為造寺施主及護寺天神,并舊住天神各誦經 中清淨妙頌。』」時諸苾芻雖復日日告白,不稱造寺施主名字,佛 言:「當稱造寺施主名字,亦應稱說明日設食施主名字,令彼施主 所願隨意福善彌增。若更有餘施主皆同此說,及餘天眾八部之類, 師僧父母皆悉稱名,普及一切眾生,皆令福利增長。」時諸苾芻聞 是語已,即皆各說清淨伽他曰:

「所為布施者, 必獲其義利; 若為樂故施, 後必得安樂。 菩薩之福報, 無盡若虛空; 施獲如是果, 增長無休息。」

時有施主,請諸苾芻當設供養,苾芻知已不為宣告施主名及以住 處,佛言:「應預宣告施主名字云:『施主某甲,明日當為大眾設 食,住在某處!』「復有婆羅門居士,至苾芻處問言:「聖者!今 是何日?」答言:「是十五日。」彼復問曰:「時人皆云十四日, 如何仁等言十五耶?豈可苾芻不為減夜?」答言:「不作。」時諸 芯芻以緣白佛,佛言:「應為減夜。」時諸苾芻頻於半月而為減 夜,俗人問言:「聖者!今是何日?」答:「是十四。」彼言: 「聖者!時人皆云十五日,如何仁等頻於半月而為減夜?」時諸苾 **芻以緣白佛,佛言:「汝等不應頻於半月而減其夜。然須計時過月** 半已應為減夜(調從正月十六日至二月十五日為一月。從二月十六日至月盡,即 是月半,今减一夜為其小月,餘皆倣此,為東西不同故),如是一歲總有六日 是十四日,有六日是十五日為長淨事。」時有婆羅門居士來問苾芻 曰:「聖者!今是何月?」答言:「今是室羅末拏月(當五月十六日已 去至六月十五日)。」彼復問言:「聖者!諸人咸云阿沙荼月(從四月十 六日至五月十五日),仁等乃云室羅末拏月,豈可仁等不為閏月耶?」 答言:「不為。」人皆共笑。時諸苾芻以緣白佛,佛言:「應為閏 月。」時諸苾芻於每年中恒為閏月,俗人來問:「聖者!今是何 月?」答言:「是阿沙荼月。」彼復問言:「聖者!諸人咸云: 『今是室羅末拏月。』仁等乃云: 『是阿沙荼月。』豈可仁等於每 年中為閏月耶?」答言:「如是。」同前譏笑。苾芻以緣白佛,佛 言:「不應於年年中而作閏月,應至六歲方為閏月(即是五六當三十 月。此謂古法,與今不同)。」時有國王,至二年半便為一閏,苾芻不 隨,人共嫌恥。佛言:「苾芻應隨王法為其閏月,若星道行參差 者,亦應隨其星道而數用之。是故汝等應可識知日月星分與俗同 行,令諸外道來求過者不得其便。」

「大德!頗有苾芻住處令授學人得說戒不?」佛言:「不得。」 第三子攝頌曰:

界別不告淨, 亦不為羯磨, 乘空不持欲, 解前方結後。

爾時佛在室羅伐城,具壽鄔波離請世尊曰:「住界內人得向界外者告清淨不?」佛言:「不得。」「住界外人得向界內者告清淨不?」佛言:「不得。」「住界內人得為界外者作羯磨不?」佛言:「不得。」「住界外人得為界內者作羯磨不?」佛言:「不得。」「若有乘空持欲去,時成持欲不?」佛言:「不成,應更取欲。」「若不解前界得結後界不?」佛言:「不得,應以白四解前然後方結。」

第四子攝頌曰:

不入界捨界, 樹界有世尊, 不越及可越, 羯磨者身死。

具壽鄔波離請世尊曰:「頗得以界入餘界不?」佛言:「不得。」「有幾種界不相涉入?」佛言:「謂小壇場及現停水處,并苾芻、苾芻尼界,此皆不入。」「若先結界,有幾種捨法?」佛言:「有五:一謂大眾悉皆歸俗,二謂大眾同時轉根,三謂大眾決心捨去,四謂大眾俱時命過,五謂秉白四羯磨解。」「得以一樹為二界標不?」佛言:「各取一邊得為三界標,或為四界標,量知分齊皆得成就。」

爾時世尊在迦尸國人間遊行,遇到一處遂便微笑。世尊常法,若微 笑時,即於口中,出五種色:青、黃、赤、白及以紅光,或時下 照、或復上昇。其光下者,至等活地獄、黑繩地獄、眾合地獄、號 叫地獄、大號叫地獄、燒然地獄、大燒然地獄、無間地獄、疱形地 獄、連疱地獄、阿吒吒地獄、阿呵呵地獄、阿呼呼地獄、青蓮花地 獄、紅蓮花地獄、大紅蓮花地獄。如是等處,若受炎熱皆得清涼, 居處寒氷便獲溫暖。彼諸有情各得安樂,皆作是語:「我與汝等, 為從此死生餘處耶?」爾時世尊令彼有情生信心故,復現餘相。彼 見相已咸作是語:「我等不於此死而生餘處,然我必由希有大人威 神力故,令我身心現處安樂。」既生敬信,能滅地獄所有諸苦,於 人天處受勝妙身,當為法器得見真理。其光上昇者,從四大王眾 天,至三十三天、夜摩天、覩史多天、樂變化天、他化自在天、梵 眾天、梵輔天、大梵天、少光天、無量光天、極光淨天、少淨天、 無量淨天、遍淨天、無雲天、福生天、廣果天、無煩天、無熱天、 善現天、善見天,乃至色究竟天,於此光中演說苦空無常無我等 法,并說二伽他曰:

「汝當求出離, 於佛教勤修, 降伏生死軍, 如象摧草舍。 於此法律中, 常為不放逸, 能竭煩惱海, 當盡苦邊際。」

時彼光明遍照三千大千世界已,還至佛所。若佛世尊說過去事,光從背入。若說未來事,光從胸入。若說地獄事,光從足下入。若說傍生事,光從足跟入。若說餓鬼事,光從足指入。若說人事,光從居下入。若說力輪王事,光從左手掌入。若說轉輪王事,光從右手掌入。若說天事,光從臍入。若說聲聞事,光從口入。若說獨覺事,光從眉間入。若說阿耨多羅三藐三菩提事,光從頂入。是時光明邊

佛三匝從頂而入。時具壽阿難陀合掌恭敬而白佛言:「世尊!如來、應、正等覺熙怡微笑,非無因緣。」即說伽他而請佛曰:

「口出種種妙光明, 流滿大千非一相; 問遍十方諸剎土, 如日光照盡虛空。 佛是眾生最勝因, 能除憍慢及憂臧; 無緣不啟於金口, 微笑當必演希奇。 安詳審諦牟尼尊, 樂欲聞者能為說; 如師子王發大吼, 願為我等決疑心。 如大海內妙山王, 若無因緣不搖動; 自在慈悲現微笑, 為渴仰者說因緣。」

爾時世尊告阿難陀曰:「如是,如是。阿難陀!非無因緣,如來、 應、正等覺輒現微笑。阿難陀!此地方所,乃是過去迦攝波佛為聲 聞眾說法之處。」時阿難陀聞是語已,疾疾取七條衣疊為四重,白 佛言:「世尊!我已敷座,願佛知時可於斯坐,冀令此地有二正覺 受用之處,謂迦攝波佛及今世尊。」佛告阿難陀曰:「善哉,善 哉!我雖不說汝自知時。」爾時世尊即便就座,復告阿難陀曰: 「此地方所,是迦攝波佛所住之寺、此是經行處、此是廊字門屋洗 足之處、此是淨厨地、此是浴室處,汝等應知。」 是時鄔波離白佛言:「世尊!如佛所說,淨不淨地者,不知齊何名 淨不淨?」佛言:「乃至正法住世,有淨不淨。正法若滅,悉皆不 淨。」「世尊!齊何名正法住世?云何名滅?」佛告鄔波離:「乃 至有秉羯磨,有如說行者,是則名為正法住世。若不秉羯磨,無如 說行,是則名為正法滅壞。 」 復白佛言:「若無上大師在於界外, 苾芻得秉羯磨不?」佛言: 「不得。」「若大師在於界內,餘人得秉羯磨不?」佛言: 「得。」「又得以世尊足僧數不?」佛言:「不得,佛寶僧寶體差 別故。」「於不可越界得越過不?」佛言:「不得。」「大德!不 知有幾不可越界?」佛言:「有其五種:謂苾芻界、苾芻尼界、小 壇場、現停水處、二界中間。」「大德!若有深塹及以河澗,不可 越界,頗得越不?」佛言:「若常有橋梁,越之非咎。」「如其橋 梁破壞,得齊幾時名不失界?」佛言:「得齊七夜。此據有心修 理,無心修理隨破即失。」「若有苾芻正結界時,秉羯磨者忽然命 過,得成結不?」佛言:「若知標相,所作羯磨已秉多分,此雖命 過得成結界。若未知標相,所秉羯磨未過多分,此時命終,不成結 界。」「若苾芻尼結界,成不?」「准此應知。」 第五子攝頌曰:

地牆等秉事、 結界無與欲, 但於一處坐, 得為四羯磨。

緣在室羅伐城。具壽鄔波離請世尊曰:「在地居人,共地居者遙秉 羯磨,得成秉不?」佛言:「不成,與欲得成。」「大德!在地之 人與牆頭者共秉羯磨,得成秉不?」佛言:「不成。」「大德!在 地之人與樹上者共秉羯磨,得成秉不?」佛言:「不成。」「大 德!在地之人與居空者共秉羯磨,得成秉不?」佛言:「不成。應 知以樹牆空為頭,各有四句亦如是。」「如世尊說:『有百一羯 磨』,幾合與欲?幾不合與欲?」佛言:「唯除結界,餘並與 欲。」「大德!若以神變幻術而作標相,得為標不?」佛言:「不 得,神力幻術非實有故。」「或以日月星宿為標相者,得成標 不?」佛言:「不得,日月星宿非定住故。」「若以水波浪,得成 標不?」佛言:「不得,由其波浪疾移轉故。」「若苾芻為他持欲 淨乘空而去,此得名為持欲淨不?」佛言:「不成,應更取欲。」 「若有苾芻秉一羯磨,於四住處並得成不?」佛言:「得。如其四 界,各有四人事現前者,各於其處別置三人。時秉法者,或席、或 床、或板、或薦,壓四界上而秉羯磨。以秉法者添彼四數,咸成作 法。如是若於四界,有別事起,作七羯磨等,謂驅擯羯磨、令怖羯 磨、折伏羯磨、求謝羯磨、不見罪羯磨、不如法悔羯磨、不捨惡見 羯磨。若作此等羯磨之時,其秉法人,在彼四界角相近處,若以席 板床薦總壓而坐,秉法皆成。 1

第六子攝頌曰:

大界兩驛半, 下水上山巔,

異見明相過, 五眾受七日。

具壽鄔波離請世尊曰:「如世尊說:『應結大界』者,齊幾許來是大界量?」佛言:「大界者,齊兩踰膳那半,應可結之(言踰膳那者, 當三十里,是此一驛,由旬者訛也。欲令易了故有言驛之處)。」「若過兩踰膳那半亦是界不?」佛言:「若過非界。」「向下齊何名為大界?」佛言:「齊至水來名為大界。」「兩踰膳那半外方至水者,此之剩處得名界不?」佛言:「不是。」「大德!兩踰膳那半外方至水者,此之剩頭,斯之剩處得名界不?」佛言:「不是。」「若上山巔,齊何名界,」佛言:「齊其水處。」「兩驛半外方至其水,亦名界不?」佛言:「不是。」「世尊!若於夏中僧伽破壞。時有苾芻故從法黨向非法黨,為是破夏?為非破耶?」佛言:「此之苾芻,樂其異見至惡黨處,經明相時,便即破夏。若不樂異見至惡黨處,雖過明相不名破夏。」「如世尊說:『若在夏中有緣須出,應受七日去。』者,不知何人應受?」佛言:「所謂五眾:苾芻、苾芻尼、正學

女、求寂、求寂女。」「此於何處應受?」佛言:「可於界內隨意 可向一苾芻前合掌而住,作如是語:『具壽存念!我苾芻某甲於此 住處或前或後三月夏安居。我苾芻某甲,為僧伽事故,守持七日出 界外,若無難緣還來此處,我於今夏在此安居。』如是三說。或有 六日事來乃至一日,准七日應受,具如餘處。」

第十子攝頌曰:

五眾坐安居, 親等請日去; 於經有疑問, 求解者應行。

具壽鄔波離請世尊曰:「如世尊說:『應夏安居』者,未知誰合安 居?」佛言:「五眾合作:所謂苾芻、苾芻尼、正學女、求寂、求 寂女。在於屏處對一苾芻,當前蹲踞作如是說:『具壽存念!今僧 伽五月十六日作夏安居。我苾芻某甲亦於五月十六日作夏安居。我 芯芻某甲,於此住處界內前三月夏安居,以某甲為施主、某甲為營 事人、某甲為瞻病人,於此住處,乃至若有圮裂穿壞,當修補之。 我於今夏在此安居。』第二、第三亦如是說,或前或後隨意應作應 知。尼亦對尼,准苾芻作。其求寂應對苾芻,正學女及求寂女對尼 應作。」「如世尊說:『苾芻坐夏之時,若有鄔波索迦等請喚之 事,守持七日去。』者,若有外道及親族等請喚,亦得去不?」佛 言:「此亦應去。」「若於三藏有疑須欲諮問,亦得去不?」佛 言:「得去。」「若苾芻未得求得、未解求解、未證求證,及有疑 心須往開決,為斯等事,亦得守持七日去不?」佛言:「皆得。若 受一日二日等,准此應作。」 根本說一切有部尼陀那卷第一 大唐景龍四年歲次庚戌四月干午朔十五日景申 三藏法師大德沙門義淨宣釋梵本并綴文正字 翻經沙門叶火羅大德達磨抹磨證梵義

翻經沙門中天竺國大德拔努證梵義

翻經沙門罽賓國大德達磨難陀證梵文

翻經沙門淄州大雲寺大德慧沼證義

翻經沙門洛州崇光寺大德律師道琳證義

翻經沙門福壽寺主大德利明證義

翻經沙門渭州太平寺大德律師道恪證義

翻經沙門大薦福寺大德勝莊證義

翻經沙門相州禪河寺大德玄傘證義筆受

翻經沙門大薦福寺大德智積證義正字

翻經沙門德州大雲寺主慧傘證義

翻經沙門西涼州白塔寺大德慧積讀梵本

翻經婆羅門右驍衛翊府中郎將員外置宿衛臣李釋迦讀梵本

翻經婆羅門東天竺國左屯衛翊府中郎將員外置同正員臣翟金剛證義翻經婆羅門東天竺國大首領臣伊金羅證梵本

翻經婆羅門左領軍衛中郎將迦濕彌羅國王子臣何順證義

翻經婆羅門東天竺國左領軍右執戟直中書省臣頗具讀梵本

翻經婆羅門龍播國大達官准五品臣李輸羅證譯

金紫光祿大夫守尚書左僕射同中書門下三品上柱國史舒國公臣韋臣源監譯

尚書右僕射同中書門下三品上柱國許國公臣蘇環監譯

特進行太子少師同中書門下三品上柱國宋國公臣唐休璟監譯

特進太子少保兼揚州大都督同中書門下三品監修國史上柱國彭國公臣韋溫監譯

特進同中書門下三品修文館大學士監修國史上柱國趙國公臣李嶠筆受兼潤色

特進侍中監修國史上柱國公臣韋安石監譯

侍中監修國史上柱國越國公臣紀處訥監譯光祿大夫行中書令修文館 大學士監國史上柱國郢國公臣宗楚客監譯

中書令監修國史上柱國酇國公臣蕭至忠監譯

翻經學士銀青光祿大夫守兵部尚書門下三品修文館大學士上柱國逍遙公臣韋嗣立

翻經學士中散大夫守中書侍郎同中書門下三品著紫佩金魚修文館學士上柱國臣趙彥昭

翻經學士太中大夫守祕書監員外置同正員修國史修文館學士上柱國臣劉憲

翻經學士銀青光祿大夫行中書侍郎修文館學士兼修國史上柱國朝陽縣開國子臣岑義

翻經學士通議大夫守吏部侍郎修文館學士兼修國史上柱國臣崔湜翻經學士朝議大夫守兵部侍郎兼修文館學士修國史上柱國臣張說翻經學士太中大夫檢校兵部侍郎騎尉修文館學士安平縣開國子臣崔日用

翻經學士朝請大夫守中書舍人兼檢校吏部侍郎修文館學士經車都尉臣盧藏用

翻經學士銀青光祿大夫行禮部侍郎修文館學士修國史上柱國慈源縣開國子臣徐堅貞

翻經學士中大夫行中書舍人修文館學士上柱國臣李乂

翻經學士中書舍人修文館學士上柱國臣馬懷素翻經學士中大夫行中書舍人修文館學士上柱國臣馬懷素翻經學士朝請大夫守給事中修文館學士上柱國臣李適翻經學士中書舍人修文館學士上柱國臣蘇頲翻經學士朝散大夫守著作郎修文館學士兼修國史臣鄭愔翻經學士朝散大夫行起居郎修文館直學士上護軍臣沈佺期翻經學士朝請大夫行考功員外郎修文館直學士上輕車都尉臣武平翻經學士著作佐郎修文館直學士臣閻朝隱翻經學士修文館直學士臣問朝隱翻經學士修文館直學士臣荷鳳書手祕書省楷書令史臣趙希令寫孔目官文林郎少府監掌治署丞臣殷庭龜判官朝散大夫行著作佐郎臣劉令植使金紫光祿大夫行祕書監檢校殿中監兼知內外閑廐隴右三使上柱國嗣號臣王邕

大唐三藏法師義淨奉 制譯

第八子攝頌曰:

假令不截衣, 有緣皆得著; 衣可隨身量, 若短作篅衣。

具壽鄔波離請世尊曰:「不割截衣得守持不?」佛言:「不得,若有難緣者得。」「著不割截衣,得入聚落不?得往俗舍不?得入外道住處不?」佛言:「並皆不得,必有難緣著亦無犯。」「著不割截衣,得於外道舍坐不?」佛言:「不得,若外道不在舍時坐亦無犯。」「如世尊說:『稱肘量衣方合持。』者,若人身大肘短,亦依肘量而作衣耶?」佛言:「此人應取身量為衣。」「設取身量仍不周遍?」佛言:「若不遍者,應縫作厥蘇洛迦衣而守持之(此譯為篇,長四肘闊二肘,縫之使合,入中牽上,以絛繫之,述如餘處。昔云祇修羅者,人皆不識其事。此則形如小篇,是尼五衣之數也,應為裙)。」

第九子攝頌曰:

不畜五種皮, 由有過失故; 開許得用處, 齊坐臥容身。

具壽鄔波離白佛言:「世尊!如世尊說:『象王之皮不作鞋用。』者,餘之象皮得為鞋不?」佛言:「此亦不得。所以者何?此象亦有鼻牙力故。」「如世尊說:『智馬之皮不應將作鞋。』者,餘馬之皮得為鞋不?」佛言:「不得。此亦能走、有大力故。」「如世尊說:『師子虎豹之皮不應用為鞋。』者,雖非此獸是此類皮,得用作不?」佛言:「不得。斯等亦有爪牙力故。」「如世尊說:『若此諸獸皮皆不應坐,餘合坐。』者,齊大小來而得畜用?」佛言:「齊容坐處應畜。」「如世尊說:『皮合臥』者,齊大小皮應臥?」佛言:「纔可容身畜之無犯。」第十子攝頌曰:

生肉及諸醋, 有五種不用;

痔病爪不傷, 迴施知希望。

爾時薄伽梵在室羅伐城。具壽鄔波離請世尊曰:「如大德說:『開西羯多苾芻為病因緣得食生肉』者。不知於何處當取?」佛言:「於五屠人處取。云何為五?謂是殺羊、雞、猪、捕鳥、獵獸者。」「大德!誰當合取?」佛言:「令敬信者取。」「令誰授與?」佛言:「還遣信人。」於此城中時有苾芻身遭疾苦,詣醫人所問曰:「我有腐渴病。賢首!願為處方。」醫人答言:「宜可服酥,必當平復。」苾芻報

曰:「佛未聽許為病服酥。」醫人答曰:「世尊大悲,為病所須亦 應開服。」時諸苾芻以緣白佛,佛言:「苾芻為病醫遣服酥者,應 可服之。」時病苾芻雖已服酥仍患渴逼,醫人問曰:「尊者,服酥 氣力何似?」苾芻答曰:「猶被渴逼。」醫人報曰:「酥不差者, 酸漿諸醋何不飲之?」苾芻答曰:「世尊不許非時而飲,云何得 服?」醫人報曰:「世尊慈悲,為病所須亦應聽服。」時諸苾芻以 緣白佛,佛言:「我今開許,應飲醋漿。」時諸苾芻不知何者醋 漿?如何當飲?復往白佛,佛言:「醋漿有六,皆可服用。一、大 醋,二、麥醋,三、藥醋,四、小醋,五酪漿,六、鑽酪漿。此等 酸漿若欲飲時,應以少水渧之作淨,仍用絹疊羅濾,澄清如竹荻 色。若時與非時,有病無病飲皆無犯,勿致疑惑。言大醋者,謂以 砂糖和水置諸雜果,或以蒱桃木檔餘甘子等,久釀成醋。麥醋者, 謂磨鬚麥等雜物令碎釀以成醋。藥醋者,謂以根莖等藥酸棗等果釀 之成醋。小醋者,謂於飯中投熱饙汁及以飯漿,續取續添長用不 壞。酪漿者,謂酪中漿水。鑽酪漿者,謂鑽酪取酥,餘漿水是。」 於此城中時有苾芻,身患痔病,其頭下出,便以爪甲截去,極受苦 痛逼切身心不能堪忍,便生是念:「我遭此苦極為難忍,世尊大慈 寧不哀愍。」爾時世尊由大悲力之所引故,至苾芻所問言:「苾 **芻!**汝何所苦?」時病苾芻即便合掌,瞻仰世尊,憂情內感流淚哽 噎,具以病苦而白世尊。佛告苾芻:「豈我先時不遮汝等患痔病者 不應截去?」白言:「世尊!佛已不許。」「若爾,何故汝今作如 是事?」白言:「世尊,為苦所逼。」佛言:「為苦逼故,汝無有 犯。今告汝等,雖患苦逼,不以爪甲等而截其痔。然治痔病有其二 種:或時以藥、或復禁呪。若有苾芻,雖遭苦痛,其痔不應自截, 亦不使他截。如違教者得越法罪。」

爾時世尊告諸苾芻曰:「此痔病經,我於餘處已曾宣說,今為汝等 更復說之,若誦持者必得除差。若有誦者,乃至盡形終無痔病苦相 逼惱,亦得宿命智,能憶過去世時七生之事。」即說呪曰:

「怛姪他 阿魯泥(去) 末魯泥鼻泥 俱麗婆鞞世沙婆鞞 三婆 鞞 莎訶

「汝等苾芻!若誦呪時復作是說:『於此北方有大雪山王,中有大樹,名薜地多。樹有三花:一名相續、二名柔軟、三名乾枯。如彼枯花至乾燥時即便墮落,我之痔病,或是風痔、熱痔、癃痔、血痔、糞痔及餘諸痔,亦皆墮落乾燥,勿復血出膿流致生苦痛,即令乾燥莎訶。』

### 「又復呪曰:

「『怛姪他 苫謎 苫末泥(去) 莎訶』」 時諸苾芻聞佛說已歡喜奉行。

爾時世尊於釋迦住處在那雉商人聚落。是時彼村有一長者,素有信 心情懷喜捨,造一住處,奉施尊者羅怙羅。爾時尊者住未多時,執 鉢持衣人間遊行。長者聞去作是思惟:「尊者遊行未知來不?」便 將此寺奉施僧伽。羅怙羅隨情遊訖,執持衣鉢還詣那雉商人處,問 知施僧,即往佛所頂禮雙足,而白佛言:「有一長者素有信心,情 生敬重造一住處,獨施於我,住少多時。我有緣出去後不久,將施 餘僧。我欲如何?願佛為決。」世尊告曰:「汝可詣彼長者之處作 如是言:『仁不於我若身語意曾生片許厭惡心耶?』」羅怙羅奉佛 教已, 詣長者處告曰: 「仁非於我若身語意曾生片許厭惡心耶?」 長者答曰:「我於尊處曾無此意。」羅怙羅還詣佛所具陳長者無厭 捨心。爾時佛告阿難陀曰:「汝往詣彼那雉村中,現住苾芻總令集 在供侍堂處。」時阿難陀奉佛勅已便詣彼村,至住處已告苾芻曰: 「應可並集供侍堂中。」時阿難陀既言告已,還詣佛所頂禮雙足, 而白佛言:「我已往彼那雉村中謹宣聖旨,現住苾芻咸皆已集。」 爾時世尊將諸苾芻及羅怙羅,至彼寺已就座而坐,告諸苾芻曰: 「汝等應知!若有施主,以所施物施一別人,後時復迴此物施一別 人,此則施者非法,受者亦非法,名不淨受用。如是若更迴與二 人、或與三人、或與僧伽,斯等皆名施不如法、受不如法、不淨受 用。汝等苾芻!若有施主,以所施物施二別人,後時復迴此物施一 別人,此則施者、受者俱名非法,所有受用皆是不淨。如是若更迴 與二人、三人或與僧伽,施者、受者俱名非法,所有受用皆是不 淨。汝等苾芻!若有施主,以所施物施三別人,後時復迴此物,施 一、二、三人或與僧伽,施者、受者俱名非法,所有受用皆是不 淨。汝等苾芻!若有施主,以所施物施與僧伽,後時復迴此物,施 與一、二、三人與餘僧伽,施者、受者俱名非法,所有受用皆是不 淨。若先施苾芻僧伽,後迴與尼僧伽,或復翻此,皆名不淨。汝等 芯 
男!若其僧伽破為二部,先施此部,復將此物迴與彼部,乃至皆 是不淨受用。汝等苾芻!若施一人不迴與一人,施者、受者皆名如 法,所有受用皆名清淨。如是若施二人、三人、僧伽、此尼、此 部,更不迴與餘者,乃至受用皆名清淨,如上廣說。汝等苾芻!前 是施、後非施。汝等苾芻!地屬於王,物屬於主,房舍臥具施主為 主,衣鉢資具芯芻為主,所有施寺等物若有破落,施主應自修補, 不應持此迴施餘人,先施是施、後非施也。汝等苾芻!應與羅怙羅 先所住處。若苾芻施彼與此,除有難緣,得越法罪。」諸苾芻既奉 佛教,即便授與羅怙羅先時住處。

如世尊說:「應作五年及六年頂髮大會。」時有敬信婆羅門及諸長者,皆以種種餅果飲食奉施僧伽。時諸苾芻食皆不盡,便將所餘持 與求寂。時諸求寂既至明旦,還將餅果重與苾芻。苾芻問曰:「汝 於何處得此餅來?」答言:「是仁所惠。」苾芻疑念:「此之餅果是我食餘,今更重飡,准法有罪。」以緣白佛,佛言:「若有希望心食,與時惡作,食便墮罪。若無希望心與,有希望心食,與時無犯,食便墮罪。若有希望心與,無希望心食,與時得惡作,食時無犯。若無希望心與,無希望還得其食,二俱無犯。」尼陀那別門第二總攝頌曰:

分亡及唱導, 張衣授學人,

重作收攝驅, 求寂同牆上。

第一子攝頌曰:

分亡者衣物, 互無應互取, 見鬪應須諫, 隨頭向處分。

爾時佛在室羅伐城。有一長者唯有一子,年既長大愛樂出家,於正 法中而受圓具,忽遇疾苦因即命終。時諸苾芻衣鉢及屍悉皆同棄, 諸俗人見,來白苾芻:「我輩流俗現有兒孫所求易得,死人之物尚 不輕棄,尊者既是出家,復無男女,所有資財苦求方得,於死人物 何故不收?」諸苾芻答曰:「世尊未許收死人衣。」苾芻以緣白 佛,佛言:「苾芻身亡,所有衣鉢不應棄擲。」復有苾芻遇病而 死, 收取其衣露屍而送, 俗人見嫌, 佛言: 「不應露身而棄, 應以 裙帔蓋身而送。」時諸苾芻以好衣蓋,佛言:「勿用好衣。」時諸 芯芻以破碎衣蓋,佛言:「應以非好非惡處中衣蓋。」時諸苾芻白 佛:「所餘衣鉢如何處分?」佛言:「有貧苾芻應可與之。」時六 眾類常多貧乏,佛言:「勿與六眾,應從上座次第行與。」少年苾 **芻竟不曾得,佛言:「眾應同集先以言白,眾既和許可賣共分。」** 緣處同前。有一苾芻忽然身死,所有衣鉢並寄苾芻尼邊,殯送事 了。時諸苾芻知其身死,於尼處索,尼聞索時問曰:「彼於何處 死?」答言:「尼寺。」尼言:「在僧寺死,物可屬仁;在尼寺死 者,彼則是我同法兄弟,所有衣鉢我合得之。」尼既不還,苾芻白 佛,佛言:「不合與尼,茲芻應分。」 緣處同前。有一芯芻尼,遇病身死,所有衣鉢在芯芻邊。諸芯芻尼 詣苾芻所白言:「尊者!尼名某甲,今已身亡,所寄之衣願尊見 我合得之。」以緣白佛,佛言:「應可還尼。」 緣處同前。有一苾芻遊歷人間,到一聚落在俗人舍,忽然遇病因即 命終。是時長者殯送既訖,為掌衣鉢。時有諸苾芻尼遊行至此,長 者見已白言:「聖者!先有苾芻於我家死,彼之衣鉢咸在我邊,應 可持去。」時諸尼眾答長者言:「亡苾芻衣,尼不合得。」諸苾芻 尼白苾芻知,苾芻以緣白佛,佛言:「若處無苾芻者,尼即應 受。」

緣處同前。有一苾芻尼,執持衣鉢遊行人間,至一村內在俗人家, 遇病身死。爾時家主送往屍林,為舉衣鉢。有諸苾芻行至於此,長 者見已白言:「聖者!先有一尼於我家死,彼之衣鉢咸在我邊,仁 應將去。」苾芻答曰:「亡尼之物我不合得。」時諸苾芻以緣白 佛,佛言:「若於其處無尼眾者,苾芻應取,此亦無犯。」 具壽鄔波離請世尊曰:「大德!若諸苾芻在俗人家而命過者,所有 衣鉢誰當合得?」佛言:「最初到者應得。」「若二人俱到,誰當 合得?」佛言:「先索者得。」「若二俱索,誰當合得?」佛言: 「二俱合得,或隨俗人情樂,與者當取。」

緣處同前。有二苾芻共相鬪諍,諸餘苾芻看鬪而住,俗人見已作如是言:「聖者!我是俗流,見他鬪時尚為揮解。如何尊者看鬪而住?」苾芻報曰:「此皆儜人,好為鬪諍,誰能為解?」諸苾芻以緣白佛,佛言:「應可止諫,不應看住。」時諸苾芻,雖設言諫仍不止息,佛言:「若諫不止者,應可與作捨置羯磨。」有二苾芻,共為論議研覈是非,因生瞋忿懷諍而住。時諸苾芻與作捨置,時彼二人作如是說:「我等論議研尋道理,仁輩何因輒作羯磨?」苾芻報曰:「鬪諍之人佛令捨置,由此因緣與汝羯磨。」以緣白佛,佛言:「不應如是為作羯磨。若現有二師者,應為諫誨。若滿十夏離依止者,諸苾芻應諫。若不止者,眾應與作捨置羯磨。」具壽鄔波離請世尊曰:「若有苾芻,於兩界中而命過者,此之衣鉢誰當合得?」佛言:「隨頭向處合得。」「若頭在兩界,此欲如何?」佛言:「二處俱得。」

第二子攝頌曰:

唱導乘車輿, 得衣應舉掌,

僧伽獲衣利, 凡聖可同分。

爾時佛在室羅伐城。時此城中先多外道於此而住,由佛來至,令諸外道無復威光利養寡少。時諸俗流信外道者,皆悉乞求為興供養。給孤獨長者每於晨朝往詣佛所,路逢外道,從長者乞,欲為外道而興供養。長者見已作如是念:「外道邪徒修習惡法,尚能告乞供養己師。如佛世尊,於諸經中作如是說:『若不信者勸令生信,使其調伏住正法中。』如其大師見聽許者,我告眾人:『於此福田而興供養。』」作是念已,入逝多林頂禮世尊在一面立,即以上事具白世尊:「唯願聽我隨情告乞供養佛僧。」世尊告曰:「隨意應作。」長者即便巡行告乞,時諸居士及婆羅門咸白長者曰:「若諸聖眾共來乞者,我等福利倍更增多。」是時長者以緣白佛,佛告苾芻:「應與長者共相借助。」時諸苾芻既奉教已,便與長者相隨告乞,諸人告曰:「若布施時稱我名字普告知者,斯曰善哉!」世尊告曰:「若有施主奉物之時,當唱其名為作呪願,然後當受。」便

遣俗人唱其名字,諸人報曰:「若令聖眾唱我名者,其福增多。」 佛言:「應令苾芻唱其名字。」時有施主,將其財物就寺而施,佛 言:「若來寺中者,亦為稱名呪願方受。」時彼苾芻周遍宣告,唱 導之時眾人雲集,共相排逼不暇近前,佛言:「其唱導者應可乘車 或昇高輿。」若時暑熱或遭風雨,佛言:「應為憶蓋遍覆其身。」 一面開門人多置噎,佛言:「應開四門令四人唱導。」 時給孤獨長者巡告之時,多獲上疊百千萬雙及餘資財其數巨億,便 作是念:「今我求乞多獲珍財,我今宜應設大施會,佛及聖眾普皆 供養,當持此物安在眾前一時奉施。」作是念已,於浙多林所以種 種繒綵周匝莊嚴,三衣資具架上盈滿,各令諸人而為守護,便禮佛 足白言:「世尊!我欲明日廣設大會奉佛及僧。」是時世尊默然而 受。給孤長者即於其夜,備辦種種上妙飲食,明日寺中敷設座褥, 往白時至。佛與大眾咸皆就座,飲食竟收鉢已,嚼齒木澡漱訖。長 者以諸衣物置上座前,即便前禮佛足白言:「世尊!於此人間幾是 福田?」佛言:「有二:謂學及無學。學人差別有十八種,無學之 人有其九種,是謂福田,堪銷物利。云何十八種有學人?謂預流 向、預流果、一來向、一來果、不還向、不還果、阿羅漢向、隨信 行、隨法行、信、解、見至、家家、一間、中生、有行、無行、上 流,是名十八。何等名為九種無學?謂退法、思法、護法、住法、 堪達法、不動法、不退法、慧解脫、俱解脫,是名為九。」 爾時世尊作是語已,復說頌曰:

### 「於此世間學無學, 是可恭敬應供養; 質直身語心清淨, 施此福田招大果。」

時給孤獨長者,在上座前立請宣唱人:「唯願聖者!作如是白:『若是世尊聲聞弟子,是合恭敬、是應禮拜、無上福田,堪受世間所有物利者,此之衣物隨意當受。』」其宣唱者,在上座前立作如是白:「大德僧伽聽!若是世尊聲聞弟子,是合恭敬、是應禮拜、無上福田,堪受世間所有利物者,此之衣物隨意當受。」是時大眾聞告白已,諸有遠離貪、瞋、癡者,作如是念:「給孤長者作是宣告:『若是世尊聲聞弟子,是合恭敬、是應禮拜、無上福田,堪受世間所有利物者,此之衣物隨意當受。』」諸阿羅漢作如是念:「我是僧中獲無上果,於此物利應合受用。如世尊言:『汝等苾芻,自有勝善,當須內祕現麁惡相。』我今如何為此衣利自揚已德,而云我是無上離欲之人。」作是念已皆默然住。諸有餘惑尚未盡者,亦作斯念:「此物擬施無上福田,我感未盡,是不應得。」彼亦默住。諸有具縛異生亦作是念:「此施無上福田,我今具縛灼

然無分。」是時眾中竟無一人取其利物。爾時長者便作是念:「我 今豈與諸聖凡眾覆鉢事耶?」須臾之頃形容憔悴面色痿黃,往世尊 所禮佛足已在一面坐,即以上事具白世尊。

爾時世尊知而故問具壽阿難陀曰:「給孤長者以多衣物奉施大眾, 何意眾中無人為受?」阿難陀曰:「給孤長者作如是白:『於此眾 中,若是世尊聲聞弟子,是合恭敬、是應禮拜、無上福田,堪受世 間所有利物者,此之衣物隨意當受。』時諸大眾聞此白已,聖凡皆 默,由此因緣,無人為受。」爾時世尊告阿難陀曰:「汝今宜去告 諸苾芻:『現住室羅伐城及以餘處,皆今總集供侍堂中。』」時具 壽阿難陀奉佛教已,便往告眾令集堂中,還至佛所禮足。白言: 「大眾總集,願佛知時。」于時善逝便往堂中就座而坐,告諸苾芻 曰:「給孤長者多施衣服,何故汝等而無受者?」時諸苾芻默然無 對。于時大師知而故問阿難陀曰:「何故苾芻我問之時默爾無 答?」時阿難陀即以前事具白世尊。佛告諸苾芻:「豈非汝等先以 信心來投於我出家離俗求涅槃耶?」諸苾芻曰:「如是。世尊!」 佛言:「汝等若以信心投我出家情求涅槃修淨行者,此諸苾芻所著 衣服直一億金錢,所住房舍直金錢五百,所噉飲食具足百味,如是 等事我皆聽受,汝並堪銷。若有苾芻破重戒者,於僧住處,乃至不 銷一口之食,僧伽藍地不容一足。何以故?汝等應知!破戒之人有 十種過失,自知我是破戒惡人、他亦知是破戒之者,所有天神不來 親附,同梵行者知法善人咸生輕賤,罪惡音響四遠共知,未證悟者 不復能證,已證法者悉皆退失,曾所聽聞咸皆忘念,命欲終時心生

懊惱,捨命之後生地獄中。又諸苾芻!應知受用有其五種:一者為 主受用,二者父財受用,三者聽許受用,四者負債受用,五者盜賊 受用。云何為主受用?謂阿羅漢永除三毒。云何父財受用?謂諸學 人尚有餘惑。云何聽許受用?謂淳善異生於戒清淨勤修禪誦無懈怠

心。云何負債受用?調雖防禁戒而不勤修覺品善法。云何盜賊受用?調於四重禁中隨犯其一。是故汝等知是事已應當修學。然此長者,所施衣物及獲餘利,大眾應可平等共分。」

根本說一切有部尼陀那卷第二

大唐三藏法師義淨奉 制譯

### 第三子攝頌曰:

有張有不張,有出有不出,若在於界外,聞生隨喜心。

爾時佛在室羅伐城。具壽鄔波離請世尊曰:「頗有苾芻僧伽共張羯恥那衣,在於眾中而非張衣耶?」佛言:「有!若苾芻共張衣時,不與他欲而便昏睡或時入定,此人雖復處在眾中,不得名為共張衣也。然而大眾名善張衣。」「頗有苾芻僧伽共張羯恥那時而不領受成張衣不?」佛言:「有!若苾芻僧伽共張衣時,與他欲已,或時入定或復睡眠,雖不覺知亦成張衣。」「頗有苾芻僧伽共出羯恥那時雖在眾中不名出衣耶?」佛言:「有!若苾芻僧伽出衣之時,不與他欲,而便入定或復睡眠,此人不名出衣,然而僧伽得名出衣。」「頗有苾芻僧伽出衣時身在眾中心不領受名出衣耶?」佛言:「有!若苾芻僧伽出衣,與他欲已或入定睡眠,然而僧伽成共出衣。若有苾芻出於界外,聞眾已出羯恥那衣,生隨喜心亦名出衣。」

### 第四子攝頌曰:

授學等不秉, 作法不成訶, 十二人成訶, 不淨犯根本。

緣處同前。具壽鄔波離請世尊曰:「授學之人得秉一切羯磨法不?」佛言:「不得。」「若半宅迦等諸有難人得不?」佛言:「不得。」「犯四重人得行籌不?」佛言:「不得。」「如世尊說:『如為彼人作如法羯磨,彼人訶不成訶。』者,若為彼人作非法羯磨,其人訶成訶不?」佛言:「此即成訶。」「若十二種人眾差遣時作如是語:『不須差我。』此等諸人訶成訶不?」佛言:「此得成訶。然此等人據其兩事,我密意說訶不成訶,謂不清淨人。」「大德!如世尊說:『不清淨人訶不成訶。』者,云何名不清淨?」佛言:「四他勝中隨犯一事,斯即名為不清淨人。」(言據兩事者:一、為作如法羯

### 磨,二、是不清淨人)

### 第五子攝頌曰:

更應重作法, 勿使求寂行, 守護善用心, 見處離聞處。

緣處同前。具壽鄔波離請世尊曰:「如授學人為他作法,秉羯磨已 作法成不?」佛言:「不成,應須更作。犯四重人亦皆如是。」 時有求寂欲受近圓,彼親教師為辦衣鉢,二師及證皆為喚來,為有他緣使令出界。彼之親族聞欲近圓,來覓求寂見便將去,妨廢勝業障礙近圓。時諸苾芻以緣白佛,佛言:「如轉輪王最大長子已受灌頂將登位時,晝夜令人防護看守;此之求寂亦復如是,將近圓時極須防護。凡有求寂欲受近圓,汝等不應使令出外;置在見處離於聞處,向眾虔誠合掌而住。」

第六子攝頌曰:

收攝於界內, 於眾心降伏, 截柱及門框, 尼等同驅擯。

緣處同前。鄔波離請世尊曰:「如世尊說:『若為其人已作令怖羯磨,後於眾中求乞收攝為解羯磨。』具足幾法應收攝耶?」佛言:「具其五法方為收攝:一者心有踊悅、二者於眾順伏、三者於罪請除、四者表申禮敬、五者於其鬪緣皆悉捨棄。」「大德!在何處所為作解法?」佛言:「可於界內。」「如世尊說:『鬪諍苾芻應可為作今怖羯磨。』正秉法時現不相伏者,此欲如何?」佛言:「為擎衣鉢驅令出界;不肯出去,抱門柱者,所抱門柱咸可截却,若抱門框亦須斬截。」「所損柱門誰合料理?」佛言:「大眾或可教化共俗修營。」「若苾芻尼為合鬪者,此欲如何?」佛言:「作法驅擯一准苾芻。二眾求寂及正學女,若眾為作驅擯羯磨,不肯去者並可同前。」「大德!若苾芻、若苾芻尼行污家時,亦應為作驅擯法耶?」佛言:「應作。二眾求寂及正學女,皆同如是。」

第七子攝頌曰:

破戒應驅逐, 伏處亦皆除,

惱俗應收謝, 餘眾咸同此。

緣處同前。鄔波離請世尊曰:「如世尊說:『破戒苾芻應驅擯。』者,誰當作擯?」佛言:「僧伽若不伏時,為持衣物驅之令出,抱柱門框並悉同前。」「大德!如世尊說:『若有苾芻與諸居士共相輕毀,應可為作求謝羯磨。』若與苾芻共相輕毀,亦應與作求謝法不?」佛言:「應作。」「大德!若於尼處及下三眾為輕毀者,亦應與作求謝法不?」佛言:「亦作。尼及下眾若更互相惱,亦皆如是為作羯磨及驅擯法。」

第八子攝頌曰:

與求寂令怖, 為受成近圓, 五法成就時, 五夏離依去。

具壽鄔波離請世尊曰:「若大眾為求寂作令怖法,後時大眾授彼近圓,得成受不?」佛言:「成受近圓,授者得罪;應先為其人作解羯磨。」「如世尊說:『五法成就年滿五夏得離依止隨處遊行,乃至十夏所到之處仍須依止。』者,如其四夏五法成就,得離依止隨

處遊不?」佛言:「不得,令滿五夏故。」「已滿五夏五法仍虧,得離依止不?」佛言:「不得,五法虧故。」「年至三夏善通三藏,具證三明除盡三垢,此人亦須依止師不?」佛言:「此亦須依,制教定故。」「若滿五夏五法成就許往人間隨情遊履,如其到處,得齊幾日無依止師?」佛言:「得至五夜,此據有心。若無心求,一夜不得,於僧受用飲食之類,皆不合受。」第九子攝頌曰:

同分非同分, 有齊限及無, 有覆無覆殊, 名一種便異。

具壽鄔波離請世尊曰:「如大德說:『有同分罪、非同分罪。』何者是耶?」佛言:「同分罪者,謂波羅市迦望波羅市迦,名為同分;若望餘部,名非同分。下之四部同分亦然。」「如世尊說:『有齊限罪、無齊限罪。』何者是耶?」佛言:「若有苾芻,不能記憶罪及夜數,名無齊限。若有能憶知罪及夜,名有齊限。」「如佛所說:『有覆藏罪、無覆藏罪。』何者是耶?」佛言:「覆有二種:一者覆夜、二者覆心。若有苾芻,雖覆其夜不名為覆,若覆其心便名為覆。」「世尊於諸罪處說有名種,何者是名?何者是種?」佛言:「波羅市迦謂之為名,此所作事謂之為種,下之四部名種亦然。」第十子攝頌曰:

不牆上行法, 非於一、二、三, 不對破戒人, 不取授學欲。

緣處同前。如世尊說:「若有苾芻,欲行波利婆娑及摩那[卑\*也]者應可與法。」時六眾苾芻棄彼界處,於垣牆上而行其法。諸苾芻問六眾言:「仁何所為?」六眾答曰:「我行波利婆娑。」諸苾芻曰:「斯乃覆藏,何成行法?」時諸苾芻以緣白佛,佛言:「汝等不應於垣牆上而行其法,亦復不應於一苾芻及二、三苾芻處而行其法。宜於四苾芻中,或時過此行治罰法。」時六眾苾芻行其復本波利婆娑,於四授學人處取法而行,佛言:「不應於彼授學人處行復本法,亦不應於四波利婆娑人處作其行法,不應於四波羅市迦人令其秉法受其行法。非三犯重人加一清淨人,亦非加二加三。如為一人作行覆藏法時,諸大眾並悉清淨復須同見,乃至六夜出罪咸須清淨。」鄔波離白佛言:「授學之人得與其欲不?」佛言:「不得。」「得受此人欲不?」佛言:「得,由是苾芻故。」尼陀那別門第三總攝頌曰:

圓壇求寂墮, 一衣煙藥器, 鐵椎髮及門, 不應隨鐵作。

第一子攝頌曰:

### 圓檀及天廟, 兩驛半依止, 無鉢不度人, 鉢等不書字。

爾時佛在室羅伐城。時諸苾芻隨處洗鉢及以濯足,遂令其地多諸蠅蟻。時婆羅門及諸居士問苾芻曰:「此是聖者便利處耶?」苾芻答言:「非是便利,是我洗鉢濯足之所。」居士聞已遂生譏嫌,作如是語:「但諸苾芻咸不淨潔,洗鉢濯足不擇處所。」時諸苾芻以緣白佛,佛言:「不應隨處洗鉢濯足。汝等當知!若洗鉢處應可塗拭作小水壇。」時諸苾芻作圓曼荼羅,居士見已咸作是言:「諸釋迦子供養於日。」世尊告曰:「不應圓作。」時諸苾芻作曼荼羅形如半月,居士復言:「苾芻事月。」佛言:「壇有二種:一如矟刃,二如瓮形。或可隨彼水流勢作。若作日月形曼荼羅者,得惡作罪。若為三寶,隨何形勢悉皆無犯。」

爾時世尊為摩揭陀國大臣婆羅門名曰行雨略宣法要,說伽他曰:

「若正信丈夫,」供養諸天眾,

能順大師教, 諸佛所稱揚。」

時六眾苾芻即便供養羯吒布呾那、摩登伽瞿利迦天。時婆羅門及諸 居士咸作是言:「聖者!既於善說法律之中而為出家,寧容反更敬 事天神。」時諸苾芻以緣白佛,佛言:「我為俗人密意而說,非是 汝等苾芻所為。是故汝等,於諸天神勿為敬事。」時有苾芻於天神 處便牛輕賤,彼天神曰:「我等於仁有何過失而見欺倰?」時諸苾 **蜀以緣白佛,佛言:「汝等從今於天神處,不應供養亦勿欺倰。」** 時有苾芻,後於餘處見羯吒布呾那,及摩登伽瞿利伽像即便打破。 時諸居士作如是言:「此天神像無有心識,聖者何故輒毀破耶?」 時諸苾芻以緣白佛,佛言:「汝等苾芻!於天神像不應毀壞。」有 諸苾芻隨處遊行,時彼路便右繞天廟,佛言:「苾芻不應右繞天 廟。」遂即避路,便為棘刺之所傷損,佛言:「應取舊路。若因道 便而右繞者,誦聖伽他聲欬彈指令其警覺。」 具壽鄔波離白佛言:「世尊!如說大界極兩驛半,令諸弟子於親教 師軌範師處每日三時請教白事,是佛親制。彼諸弟子去親教師及軌 範師有兩驛半,路遙時促,未審如何?」佛言:「應半月就禮。若 去師五俱盧舍,應七八日一去禮拜。若一俱盧舍,每日一去。若更 相近乃至同處,應每日三時而為禮敬。若異此者得越法罪。」 時鄔波難陀無鉢度人,時諸苾芻各洗鉢已安置龕中,請白二師旋遶 制底。鄔波難陀所度弟子有緣須鉢,便往尊者憍陳如鉢邊欲取其 鉢,尊者告曰:「此是我鉢,汝不須觸。」時彼復往餘人鉢處,同 前欲取,還復見遮。時諸苾芻問曰:「誰是汝師?」彼便答言:

「鄔波難陀。」時諸苾芻以緣白佛,佛言:「不應無鉢度他出家及 與近圓,得惡作罪。汝諸苾芻!凡欲度人出家為求寂者,應與鉢及 小鉢并以銅椀,無令廢闕。」時阿尼盧馱有一弟子為師掌鉢,師與 弟子鉢形相似,彼不能識,遂生疑曰:「為是師鉢、為我鉢耶?」 時彼即便於其鉢底,各書名字。有一長者,奉請世尊及苾芻眾,就 家受食。長者先與婬女有私捅事,遂遣使人報婬女曰:「我於今日 請佛及僧,明日就家謹設供養,汝可來此手自奉食。」是時婬女遇 有他緣,不及親往。佛及僧伽至時赴請,餅食已訖,說施伽他從座 而去。時彼長者是阿尼盧馱弟子知識,佛僧去已,唯彼弟子未出其 舍,是時長者白言:「大德!願以此鉢暫時相借,以所餘食欲寄與 人。」苾芻即以師鉢與之。長者以鉢盛滿香饌寄與婬女,并附言 曰:「賢首!我請三寶奉獻斯食,佛及僧伽並已食竟,汝可隨 喜。」是時婬女既得鉢食,置餘器中,便於鉢底見尊者字,知是聖 者阿尼盧馱所用之鉢,便作是念:「阿遮利耶乃見人天之所供養, 我今有幸得見彼鉢,若我空然而送還者失大福利,事不應爾。」即 取其鉢周遍揩拭,復用香湯再三淨洗,塗以香泥置妙座上,右膝著 地持妙花鬘虔誠供養,燒香普熏發願而住。時有婆羅門,亦於婬女 先有相知,來至其所見女供養,問言:「賢首!汝何所為?」答 曰:「此鉢乃是尊者阿尼盧馱所受用器,即是人天所共尊重。我於 此鉢略申供養。」婆羅門曰:「汝以婬染總攝諸人,沙門釋子亦不 見放。」時諸苾芻聞是事已,以緣白佛,佛言:「凡諸苾芻,於己 物上書名字者,有如是過,是故不應書己名字。」時諸苾芻不知何 物是不應書?佛言:「有五種物皆不應書:謂別解脫戒經、別解脫 廣釋、及諸事等、與律教相應之義,并私己物,於己物上不應書 字,可作私記憶持。」具壽鄔波離白佛言:「世尊!若律教等皆不 合書者,於當來世諸苾芻等,心無持力咸多忘念,於諸緣起尚不能 憶,如斯等事當復云何?」佛言:「若如是者,應書紙葉而受持 之。」

### 第二子攝頌曰:

求寂墮鉢破, 開餘存念者, 作二種重籠, 并隨所須物。

爾時佛在室羅伐城。有一苾芻畜一求寂,常令持鉢。後於異時手脫損鉢,令師廢闕。時諸苾芻以緣白佛,佛言:「不應令彼求寂洗鉢。」時舍利子有一求寂名曰准陀,常令持鉢,來請師曰:「鄔波馱耶!願見與鉢,我當洗之。」舍利子言:「佛為損鉢已制學處。」彼便白言:「我豈當作如斯過耶?」時諸苾芻以緣白佛,佛言:「若知求寂能存護者,聽其洗鉢。」

時有芯器守持鐵鉢、垢牛損壞多有孔隙、以緣白佛、佛言:「凡畜 鐵鉢應可熟燒。」時諸苾芻多積柴薪而燒其鉢,即便損破,佛言: 「不應如是火燒其鉢,可於籠內安置燒之。」彼便不知云何作籠? 佛言:「籠有二種:一者匠作,二者自為。言匠作者,謂是陶師。 言自作者,或時以瓮,或可用瓨截破用之。」彼安在地打著便碎, 佛言:「盛灰令滿使人擎持,然後以釘徐徐疎孔鑿為兩段。」時彼 於外不以泥塗,佛言:「應以草麲作泥遍塗。」彼不以物塗拭於 內,佛言:「應以麻滓作泥塗拭待乾。」然所燒鉢猶未受色,佛 言:「內安稻戥以籠合之口邊泥塗。」彼便以鉢置地而熏,佛言: 「應用物支,於上重安事亦同此。」彼物薄小鉢便相著,佛言: 「應可高支勿令相近。」仍不受色,佛言:「應數數洗然後更 燒。」籠內煙出,佛言:「應灰擁口。」彼以牛糞積為大聚燒便損 鉢,佛言:「應壘牛糞從上放火。」不知欲遣何人看火?佛言: 「苾芻應自看守,若有別緣囑餘苾芻看,然後應去。」地上燒鉢多 損諸蟲,佛言:「應淨灑掃。是故我今聽諸苾芻畜熏鉢籠,及隨此 籠所須之物用皆無犯。 」

### 第三子攝頌曰:

一衣不互作, 澡浴可遮人, 於褥不剃頭, 病人隨服食。

爾時佛在室羅伐城。時有施主造立浴室奉施僧伽,六眾苾芻各著一 裙互揩身體。俗人入見作如是語:「此等諸人是何外道?」時敬信 者答言:「是釋迦子。」居士聞已便起譏嫌:「彼之大師常有慚 愧,云何此等無羞恥耶?」時諸苾芻聞以緣白佛,佛言:「不應一 裙互相揩洗。若有犯者得惡作罪。」時諸苾芻在浴室內令俗人入, 見苾芻等以手揩足復更摩頭,俗人譏曰:「沙門釋子作斯鄙法,是 不淨潔,既揩足已復用摩頭。」時諸苾芻以緣白佛,佛言:「入浴 室時,無信敬人不應令入亦勿令作。若教作者得惡作罪。」時諸苾 **芻**在浴室內無人守護,有諸居士來入其室,見苾芻等以手揩足復將 洗面,便譏嫌曰:「沙門釋子實為鄙惡,以手揩足,復將洗面。」 佛言:「若洗浴時,無令俗人入浴室內,應差苾芻為守護者。」時 給孤獨長者,與一無敬信婆羅門往逝多林,苾芻見已報長者曰: 「勿使此人入浴室內。」婆羅門曰:「我有何過而見遮止?」時諸 芯芻以緣白佛,佛言:「若知彼人有淨信者應許入室。」時有婆羅 門入既被遮,見餘不障,婆羅門曰:「彼諸俗人皆許入室,何故於 我而獨見遮?」苾芻報曰:「此已歸依受諸學處。」彼便答曰: 「我亦歸依受其學處,願聽我入。」報言:「可爾。」便與受戒即 許其入。彼既入已,見諸苾芻揩身下分復用摩頭,遂起譏曰:「沙

緣處同前。時有長者請佛及僧入室洗浴,是時世尊將諸苾芻詣彼長者洗浴之處,見有苾芻與一苾芻揩摩身體。世尊告曰:「汝等見此 苾芻與彼苾芻揩摩身不?」白言:「已見。」佛告苾芻:「其為揩者,是阿羅漢諸漏已盡。彼受揩者,是破戒人行罪惡法。汝等當知!不應師子與彼野干而為給事。」

緣處同前。有一長者,娶妻未久誕生一息。年既長大,於善說法律 而為出家,常求勝已尋義他方博學多聞,還來至此室羅伐城。父聞 子至,便詣其所共相問訊。是時苾芻即為其父略官法要,勸歸三寶 受五學處。後於異時,復為其父說七有事福業功德。父聞子說深生 敬信,作如是言:「尊者當知!我今亦願作七有事福業功德。」彼 便答言:「可隨意作。」父便問言:「先作何事?」答曰:「當為 僧伽營理浴室。」聞已還家營理事畢,來報子曰:「尊者!當稱我 名請佛及僧就舍澡洗。」其子聞已,即詣佛所稱父名字,而為請 佛。時彼長者發深信心,自為苾芻香油塗身,以米屑揩去。澡浴事 畢,報其子曰:「我極疲勞為我塗背。」其子答曰:「世尊於此已 制學處。」父便問曰:「所制學處其事云何?」答曰:「勿以師子 供侍野干,故我不應而為執事。」父問子曰:「誰是師子?誰為野 干?」子答父言:「我是師子,父是野干。」父曰:「斯為妙事, 以我野干能生師子。」時諸苾芻以緣白佛,佛言:「凡是父母於其 子處能為難事荷負眾苦,假令父母是極破戒,其子亦應為作供侍。 是故我聽於其五處縱極破戒應為供給,所謂父、母、親教師、軌範 師及諸病人。」

爾時佛在室羅伐城。有一長者於阿蘭若處造立其舍,令諸苾芻隨緣乞食依此而住。時乞食者鬚髮既長,詣長者處,長者見已問言:「聖者!何故鬚髮如是太長?」答言:「賢首!無淨髮人。」長者告曰:「我遣人來可令除髮。」其剃髮人詣苾芻所,於臥褥上令彼剃髮。時彼長者作是思惟:「應觀尊者除髮以不?」即往蘭若苾芻住處,到已即於臥褥上坐,髮著其衣。長者還舍,其妻遂見衣上有髮,白言:「因何過彼剃髮人舍,令此衣上有其髮污。」長者思惟:「將非聖者於彼褥上而剃髮耶?」即重往觀,見其褥上有剃髮處,白言:「大德!可於餘處剃髮,勿令污褥。」時諸苾芻聞已白佛,佛言:「不應褥上而剃鬚髮。」便於淨地剃除鬚髮,佛言:「凡是僧伽灑掃淨地不應剃髮,若有犯者得惡作罪。」時有老病苾芻,不能出外剃髮,復遭風雨,佛言:「若無力者隨處剃除,然應掃除塗拭令淨,若不爾者得惡作罪。」又諸苾芻剪手足甲,隨處棄擲,佛言:「僧伽淨地若棄爪甲,得惡作罪。」

緣處同前。時有苾芻,身嬰重病為苦所逼,便往醫處報言:「賢 首!以所宜藥為我處方。」彼醫答言:「以水和麨非時可食。」答 言:「賢首!世尊已制,不許我等非時噉食。」醫人答曰:「聖 者!大師慈悲,必緣此事開諸病人。」以緣白佛,佛言:「有無齒 牛食噉糠麥,後時便出其粒仍全,用此為麨非時應服。」時病苾芻 雖服不差,醫人問曰:「聖者!先時所苦得瘳損不?」答曰:「賢 首!今猶未除。」醫人曰:「豈非聖者未服水麨令病不差。」苾芻 答曰:「我已服竟。」醫曰:「當如何服?」時病苾芻具以事告, 醫言:「聖者!此非是藥,應用生麥麨。」以緣白佛,佛言:「多 將水攪以物濾之然後應服。」病猶不差,復以此事告彼醫人,醫人 答言:「勿濾而服。」以緣白佛,佛言:「醫人處方令服麨飲,若 **稠若團隨意應服。**」 緣處同前。時有苾芻身嬰重病,往醫人處問言:「賢首!以所宜藥 為我處方。」彼醫答言:「以大肉團非時煮飲。」答曰:「賢首! 世尊已制。」醫人答曰:「聖者!大師慈悲,必緣此事開諸病 猶未變,應取彼肉煮而飲服。」雖服不差,醫人問曰:「聖者!所 苦得除損不?」答曰:「未損。」醫曰:「豈可聖者未服肉汁令斯 疾病而無損耶?」苾芻具答其事,醫言:「聖者!此是故物不堪為 藥,應取新肉煮而飲汁。」白佛,佛言:「先以物濾然後飲之。」 病猶不差,彼以此事告彼醫人,醫人答言:「勿濾而服。」以緣白 佛,佛言:「醫人處方隨意應服,若乾若濕令有氣味,皆應服食, 勿生疑慮。」佛告諸苾芻:「凡所有事,我於病人非時開者,於病 差後咸不應作。若有作者,得越法罪。」

根本說一切有部尼陀那卷第三

大唐三藏法師義淨奉 制譯

### 第四子攝頌曰:

煙筒壞色衣、 鼻筒飲水器、 針筒非寶物、 眼藥合并椎。

爾時佛在室羅伐城。具壽鄔波離白世尊言:「如世尊說:『開諸苾芻畜歙煙筒。』不知何物是所應作?」佛言:「唯除寶物,餘皆得畜。」「如世尊說:『開諸苾芻著壞色衣。』者,不知何物是?」佛言:「以七種縷作者隨意應畜。」「又開諸苾芻畜飲水器,不知以何物作?」佛言:「除寶。」「又開諸苾芻畜盛針筒者,不知以何物作?」佛言:「除寶。」「又開諸苾芻畜盛針筒者,不知以何物作?」佛言:「除寶。」「又許畜眼藥椎及小藥合,不知以何物作?」佛言:「除寶。餘皆應畜。」第五子攝頌曰:

藥器及氍毺、 承足枯瀉藥, 芯芻不應作, 當擇死人衣。

緣處同前。具壽鄔波離白世尊言:「如世尊說:『開諸苾芻畜貯藥 器。』當用何物?」佛言:「除諸寶物。」「又開諸苾芻畜用氍 毺,不知何者是所應畜?」佛言:「七種縷作應可畜持。」「又開 諸苾芻為洗足故畜承足枯,不知何物?」佛言:「除寶。」 緣處同前。時有長者,身嬰重病,往醫人處問言:「賢首!以所官 藥為我處方。」醫人答言:「先食膩物令其動病,然後應可服於瀉 藥。」長者聞已遂服酥油。時有苾芻是彼長者常所供養,來過其舍 慰問病人:「氣力安不?」答言:「聖者!我仍帶病,醫人處方先 服酥油後服瀉藥。」時彼苾芻報長者曰:「我善醫方,爾有藥直擬 酬醫者官將與我,我有瀉藥可持與汝。」長者聞已答言:「甚 善!」芯芻持藥與彼今服。是時長者藥利過度,令一使人疾往醫所 問言:「賢首!我之家主藥利不停。」彼醫問言:「何人授藥?」 使者報曰:「有一苾芻。」醫人聞已情生瞋忿:「汝應往彼問是何 藥?」及其覆往芯芻處問,時彼長者便已命終。時諸苾芻以緣白 佛,佛言:「汝諸苾芻!不應賣藥。若苾芻善醫方者,起慈愍心應 病與藥。然諸苾芻,不應與他瀉藥捨之而去,應自觀察勿令過度。 設有他行,囑人看守然後應去,仍報彼言:『利若過度,應以某藥 為解。』若有苾芻,受他價直然後與藥,及以受雇為客作者,得惡 作罪。」

緣處同前。時有一人,負長者債,因被拘留經七八日,共立要契, 某日當還。時負債人便作是念:「期日既逼,無可還彼,我應藏 避。」復更思惟:「捨家逃竄此事為難,我當殺彼。」是時長者近 逝多林,為負債人之所殺害,身有衣服,六眾見已共相謂言:「今 時豐足糞掃之衣。」作是語已,即便共取。是時長者親族來見,惡 言罵曰:「聖者!著大仙衣作斯非法極為鄙賤。」六眾報曰:「此 非我殺,別有怨家來斷其命,我等今者取糞掃衣,此有何過?」時 諸苾芻以緣白佛,佛言:「汝諸苾芻!不應輒取此糞掃衣,若其大 眾共知棄物,是衣應取。若不爾者得惡作罪。」

### 第六子攝頌曰:

鐵鍋并杵杓, 自身不負擔; 以食供父母, 毛絲不充衣。

爾時佛在室羅伐城。具壽鄔波離白世尊言:「如佛所說:『為溫水故,開諸苾芻畜大鐵鍋令安鎖。』者,以何物作?」佛言:「除寶。」「聽諸苾芻為煎藥故畜杓器者,以何物作?」佛言:「除寶。」

緣處同前。時六眾苾芻身自負擔,或於局上擎持大幞。時婆羅門居士見已譏曰:「聖者!我等俗人,為於父母妻子眷屬,求覓衣食以身荷負。仁等為誰自為勞事?」時諸苾芻以緣白佛,佛言:「汝諸苾芻!不應頭背肩腰而為擔負擎持大幞。若有犯者得惡作罪。」緣處同前。時有居士,娶妻未久便誕一息,顏貌端正人所樂觀,父便為子設初生會,付諸乳母令其養育。子漸長大,於佛法出家,日初分時著衣持鉢,入室羅伐城而行乞食,忽遇其父問曰:「汝已出家?」答言:「出家。」其父告曰:「汝之此身由我生育,今得成長,於苦樂事須相憂念,汝棄出家誰當濟我?」苾芻報曰:「我出家,於苦樂事須相憂念,汝棄出家誰當濟我?」苾芻報曰:「我出家,於苦樂事須相憂念,汝棄出家誰當濟我?」苾芻報曰:「我出家於父母處應須供給。」時彼不知何物應與?佛言:「應除衣鉢餘物供給。若無餘物,可從施主隨時乞求。若乞求難得,應以僧常所得利物共相供給。若無利物,應以僧常所食之分減取其半而為供濟。若常乞食隨他活者,以己所須滿腹食內,應取其半濟於父母。」

緣處同前。時有施主,於聚落中造立住處供養眾僧,有老苾芻依此而住。時老苾芻,為禮制底往逝多林。六眾苾芻為貪利故,共作制法每為番次,常遣一人在門外立。鄔波難陀次當其直,即於門外經行而住,遂遙見彼老苾芻來,便作是念:「此何上座?我應就彼申其禮敬。」到已問言:「善來!善來!」彼便答曰:「我今敬禮阿遮利耶。」鄔波難陀即作是念:「此乃是其出家老叟,非但不識根本二師,亦復未曾知其敬法。」便調之曰:「善來老父!」因即引

入逝多林中,為作解勞令其暫息。時老苾芻白言:「大德鄔波難 陀!我今須出。」彼時問曰:「欲何所之?」答曰:「我禮制底事 了還來,鄔波難陀復勸令住。」彼言:「大德!我先不作在外住 意,遂於本處留著三衣,故我不應久為停息。」 鄔波難陀曰:「此 有三衣勿為憂慮,我當相與應守持之。」即便授與大被毛緂小褥氍 输,持作三衣并充下服。於日晡後鳴揵椎時,禮制底人悉皆共集, 老苾芻曰:「鄔波難陀!我暫出房旋禮制底。」答言:「老叟!汝 無三衣云何禮敬?」即取小褥充其下衣,又以麁繩繞腰纏束,復持 毛燚以毛向外作唱呾羅僧伽,重大毛燚亦毛向外作僧伽胝。既作是 已報言:「莫訶羅!今可隨意而為禮敬。」時老苾芻既著衣已即出 房外,諸苾芻見咸作是言:「莫訶羅!何處著此戲弄衣來?」答 言:「我此三衣皆以守持如佛所制,何名戲耶?」苾芻問曰:「何 人為汝持此三衣?」答言:「大德鄔波難陀!」諸人聞已咸作是 言:「除此人輩,誰復能為如此惡事?」以緣白佛,佛言:「長毛 衣服有如是過。汝諸苾芻!但是一切長毛之物,咸悉不應持作三 衣。若有犯者得惡作罪。」如世尊說:「制諸苾芻咸不應畜長毛三 衣。」時有淨信婆羅門及諸居士,以上毛緂及餘厚帔施諸苾芻,苾 芻生疑便不敢受。彼諸居士報言:「聖者!若佛世尊未出於世,我 等便以外道為勝。今者世尊降臨生界,我以仁等為上福田,施此微 物,不蒙納受,豈令我等捨善資糧從此世間趣於後世?」時諸苾芻 以緣白佛,佛言:「應為受取,作彼物想守持而用。若是毛短體輕 薄者,此物應作長衣持之。凡是厚大長毛等物,咸應作彼施主物心 而為畜用。 」

第七子攝頌曰:

髮爪窣覩波, 任作鮮白色; 隨意安燈處, 一畔出高簷。

爾時佛在室羅伐城。給孤獨長者往世尊處,請世尊曰:「我今願以世尊髮爪造窣覩波,唯願世尊慈哀聽許。」世尊告曰:「當隨意作。」復言:「世尊!唯願許我於彼髮爪窣覩波上,以鮮白物而為塗拭,復於其處行列然燈而為供養。」佛言:「皆隨意作。」長者以燈安在級上,油下污塔,佛言:「可於級下行列然燈。」有犬食油墜損油器,長者白佛:「請造燈樹。」佛言:「隨作。」牛來觸破,長者白佛:「請為燈架。」佛言:「應作。」四面安燈便非顯望,長者白佛:「請作高簷。」佛言:「隨意。」

第八子攝頌曰:

門戶并簷屋, 及以塔下基, 赤石紫礦塗, 此等皆隨作。

爾時給孤獨長者白世尊言:「唯願許我於髮爪窣覩波中間空者為作門戶,復安簷屋并造塔基,復以赤石塗拭其柱,於塔壁上紫礦圖畫。」佛言:「隨意。」 第九子攝頌曰:

不應以橛釘, 及昇窣覩波, 開許金銀花, 塔上以舍蓋。

爾時佛在室羅伐城。諸苾芻眾於供養時,欲以花鬘挂於塔上,即便 登躡,以釘釘塔挂諸花鬘。時婆羅門居士咸作是言:「仁等大師久 除釘刺,何故今者以釘釘之?」時諸苾芻以緣白佛,佛言:「不應 於窣覩波上尖刺釘之,若有犯者得惡作罪。然於剏始造塔之時,應 出傍橛作象牙杙。」時諸苾芻至供養時,遂便登上窣覩波頂而安燈 盞,佛言:「不於香臺頂上而設燈明,若有犯者得惡作罪。」時諸 芯 
多上 
翠觀波,安置幡蓋供養之物。時婆羅門居士咸共譏嫌:「不 淨登躡。」佛言:「應使俗人。若無俗人應使求寂。若無求寂,諸 芯芻等應先濯足淨以香湯或塗香泥,作如是念:『我今為欲供養大 師。』然後昇塔。若異此者得惡作罪。若窣覩波形高大者,應可以 繩繋相輪下攀緣而上。」有婆羅門居士,咸來詣髮爪窣覩波處,各 持花鬘奉獻供養,所有乾花而不摒除,不能淨潔,佛言:「摒 除。」時給孤獨長者請世尊曰:「我今願以金銀花鬘供養髮爪窣覩 波。」佛言:「隨作。」塔上鳥栖不淨穢污,欲於其上造立覆舍, 佛言:「應作。」復為無門,室闇損壞,佛言:「隨意開門。」 第十子攝頌曰:

鐵作窣覩波, 及以金銀等, 許幡旗供養, 并可用香油。

爾時佛在室羅伐城。給孤獨長者請世尊曰:「願許我造鐵窣覩波。」佛言:「隨作。」復言:「欲以金銀琉璃水精銅等造作。」佛言:「應作。」「雖作,塔上未善莊嚴,欲以幡旗并雜繒綵而為供養。」佛言:「應作。」時彼不解造旗法式,佛言:「有四種旗,謂師子旗、牛旗、金翅鳥旗及龍旗等。」於旗幡上畫作四形,復白佛言:「我今先欲香油塗拭,次以紫礦欝金栴檀等作妙香水,洗髮爪窣覩波,唯願聽許。」佛言:「皆隨意作。」第三門了。尼陀那別門第四總攝頌曰:

戶鐶隨處用, 霑衣大小便,

染衣損認衣, 赊衣果無淨。

第一子攝頌曰:

戶鐶倚帶網, 取米為眾食, 
寺內作私房, 居人應受用。

爾時佛在室羅伐城。具壽鄔波離白佛言:「如世尊說:『於戶扇上 應安鐶鈕。』苾芻不知當用何物?」佛言:「除寶,餘物應作。」 「如世尊說:『苾芻應作倚帶。』不知當用何物?」佛言:「七種 縷中隨一應為。」「如世尊說:『聽畜網。』者,應用何物?」佛 言:「茅蒯麻芒皆悉應作。」「世尊復說:『許安窓網。』當用何 物?」佛言:「除寶,餘並應用。」 緣處同前。於此城中有一長者,於三寶中深生敬信,意樂賢善,遂 於露形外道娶女為妻,長者告曰:「賢首!無上慈父是我大師,常 所供養,及諸僧伽勝上福田,衣服飲食爾應供養。」時諸苾芻常依 僧次,日日之中恒至此家而受其食。時彼長者,遇有他緣詣餘村 邑,告其妻曰:「我今有事須向彼村。如我在時,於佛僧處常為供 養,勿令闕乏。」答言:「聖子!我依教作。」時彼長者往苾芻處 白言:「聖者!我今有事須至餘村,唯願僧伽,恒依僧次就我家 食。」答言:「可爾。」時諸苾芻共相議曰:「彼長者婦先無信 心,依僧次者及時早卦。」時長者妻見苾芻至,恚而告曰:「我未 辦食、座復未敷,何故仁等平旦來至?」時諸苾芻自相謂曰:「彼 長者妻久知無信,我等早至今已見瞋,明日臨中應可就宅。」時長 者婦明朝凌旦,辦食敷座而待苾芻,是時僧伽臨中方至,女人報 曰:「聖者!我無餘事業唯作此耶?我於晨朝早已辦食并敷床座, 何故仁等臨午方來?」時諸苾芻互相謂曰:「我等早來已見瞋責, 臨中而至還復被訶,我等苾芻乞食常事,宜可巡家以自供濟,更不 往彼俗家而食。」時彼長者事了還家問其妻曰:「賢首!我諸聖者 常來食不?」答曰:「唯初兩日就斯受食,後更不來。」長者思 惟:「應是我婦現慳悋相令諸聖者不來受食。」時諸苾芻巡家乞食 入長者門,長者見已問言:「聖者!仁等何不常來受食?」報言: 「長者!我等先是乞食之人,但持鉢行足得充濟。」答言:「聖 者!祇是我婦生慳悋心。然我田中歲禾新熟,隨意持去以充午 食。」苾芻報曰:「佛未聽許。」以緣白佛,佛言:「作彼物想 意,為僧伽持者,無犯。」復有長者,於逝多林為諸苾芻造一別 房,於其房內多置床褥及諸利養。時諸苾芻番次守護,將別房物置 眾物中。以緣白佛,佛言:「其別房物隨處受用。」又將利養和雜 眾物,佛言:「不應和雜,住別房者應可受用。」 第二子攝頌曰:

隨處當用物, 營作人所須, 器具食燈油, 隨施主應用。

爾時佛在室羅伐城。時有長者於舊寺內別造一房,於彼房中多施床褥,及以利養並皆豐足。時諸苾芻便將別物入眾物中,佛言:「應隨住人而為受用,所有利養亦不應和隨本施用。」時諸苾芻分眾利

物,不肯分與別房住人,佛言:「雖受別房亦與眾利。」時諸苾芻 差授事人,以見別房遂不差遣,佛言:「依次應差。」於此城中有 一乞食苾芻,勸彼施主歸依三寶受五學處。復於一時,為彼施主說 七有事福業,讚其勝利。施主答曰:「我亦能作,當作何事?」答 言:「應為僧伽造立住處。」施主報曰:「我有財物欲營福業,未 即請為造。苾芻領物安己房中,不為修造。施主念曰:「我暫往觀 新造住處營作了未? | 施主既至,不曾見有營作之處,白言:「聖 者!何故多時不為營作?」苾芻答曰:「營作之具是我所須,此物 並無若為興建?」施主報曰:「我所施物何不充用?」苾芻報曰: 「此物已屬四方僧伽,誰能損用?」時諸苾芻以緣白佛。佛言: 「施主聽者,應取此物作其器具。」時此苾芻因行乞食到施主家, 長者遙見作如是言:「聖者!仁既日日巡家乞食,我所造寺誰當撿 校?」苾芻報曰:「我豈忍飢為人造寺?」長者答言:「我所施物 何不取食?」報言:「此物已屬四方僧伽,佛未聽許。」以緣白 佛,佛言:「施主聽者應用。」便作上妙美好飲食隨情食用,佛 言:「不應如是,應食麁食。」食麁食時無力撿挍,佛言:「如僧 常類。」苾芻食時,藏其器具內闇室中,復須燈油巡家而乞。時彼 施主復見乞油問言:「聖者!欲何所作?」以事而答。長者報言: 「何不用物?」具答如前,佛言:「施主聽者用時無犯。」彼便通 夜不滅燈明,佛言:「不應經夜留燈,若收物竟便可滅除。如是應 知塗足等物,所緣營事准上應用。」

### 第三子攝頌曰:

令雨霑僧物, 夜半共分床, 小座並依年, 敷席咸同此。

爾時佛在室羅伐城。六眾苾芻,披僧伽帔既出,各分置於露處,令兩爛壞。時諸苾芻以緣白佛,佛言:「大眾臥具不應經夏令雨損壞,不收舉者得惡作罪。」時諸苾芻著僧伽衣浣染造鉢,令衣損壞,佛言:「若著眾衣染衣造鉢得惡作罪。」六眾苾芻人間遊行,遇到一村,於彼村中有僧住處,夜過初更方始入寺,至親友處各為解勞。六眾告曰:「汝諸具壽!大師正法現住於世,仁等如何而不依教?勿令於後生悔恨心,爾可隨年授我臥具。」時舊住人便於夜半,總集僧祇所有小座床褥,一處共分,六眾苾芻便取臥具隨處眠息,供給纔了遂至天明。是時六眾告諸苾芻:「爾等收取臥具,再欲進途。」主人告曰:「上座但求一夜自取身安,遂令大眾得黃熱病。」時諸苾芻以緣白佛,佛言:「不應於夜分僧臥具,應隨親友一夜而住。若更停留可隨年與,若異此者得惡作罪。」時六眾苾芻遊歷人間至一聚落,於彼村中有一住處,既入寺已見舊床席,是時

六眾便於大床并諸弟子各隨眠息。然此六眾並是耆年,曾無有人輒能移動,自餘耆宿便於地上隨處而臥。至天明已詣逝多林,時諸苾芻見已告言:「善來!善來!所有遊履得安樂不?」答曰:「寧有安樂,在地上臥竟夜不安。」報言:「具壽!爾於昨夜何處房眠?」即以上事具告諸人。時諸苾芻以緣白佛,佛言:「若大床座及餘敷褥,應從上座隨次行與。」

第四子攝頌曰:

大小便利處、 經行不惱他, 洗足及拭鞋, 釜篦不奪用。

緣處同前。時六眾苾芻,常於大小便室來往經行,并共談語教授讀 誦種種調戲。見他苾芻將欲入時,遂相遮止,告言:「汝且莫入, 我是耆年。」故作稽留令他生惱。時諸苾芻起嫌賤心,以緣白佛, 佛言:「大小便處不應經行久住相惱,若有犯者得越法罪。」時六 眾苾芻於洗足處貯水瓮邊,驅他令起,自言:「我是耆年,應合先 用。」佛言:「於洗足處,若先洗時事未了者,不應強喚令起,得 越法罪。」時有苾芻前入小便, 六眾後至告言: 「我老!」佛言: 「於先到者即可前入,此處不應隨其年次。」復有苾芻,洗足欲 半,六眾後來告言:「我大,汝應相避。」佛言:「不應如是,凡 為上座須識時官,雖合在先,看事未周不應令起。若令起者得越法 罪。」時有苾芻,以物拭鞋可欲將半,六眾見奪,報言:「我 老! 」佛言:「不應依年,待先用竟,未了奪者得越法罪。」復有 芯芻,釜中煎藥尚未煎半,六眾便奪,答言:「我老!此應先 用。」瀉之於地自將其釜。佛言:「不合依年,待先事畢然後方 用。若不依者得越法罪。」僧祇鐵篦苾芻先用攪藥未了,六眾復 奪,佛言:「不應。若有犯者,得越法罪。」

第五子攝頌曰:

染釜及水瓶、 僧鉢并飲器、 刀石爪鼻物、 支床不問年。

緣處同前。有諸苾芻,用僧伽染器瓶釜等物,以煮染汁事欲將半, 六眾報曰:「我應先用。」時諸苾芻以緣白佛,佛言:「不應依 年,待先用竟。若強奪者得越法罪。」時有苾芻先用眾鉢食猶未 了,六眾告曰:「我是耆年應與我用。」以緣白佛,佛言:「待彼 食了,不應強取。若故奪者得越法罪。飲水器物准上應知。」時有 苾芻剃髮將半,六眾來至遂奪其刀,佛言:「若剃未了不應取用。 其磨刀石准上應知。」剪甲小刀用割纔半,淨鼻鉗子現用未了,及 支床物,彼臥時奪,以緣白佛,佛言:「此等諸物並不依年,待彼 事終,方可就取。若不依者,得越法罪。」

第六子攝頌曰:

羯恥那衣幀, 絣線正縫時, 染汁雜物等, 用時不應奪。

緣處同前。是時大眾有羯恥那衣幀。有一苾芻,用此衣幀張僧伽胝等,作衣纔半,六眾來見即便強奪:「我是耆宿,理應先用。」時諸苾芻以緣白佛,佛言:「他用未了不應輒奪,待彼事畢方可取之。如其奪者得越法罪,如是應知。」絣線縫刺纔半用時,六眾便奪,佛言:「待了方取,不竟取者得越法罪。若用染汁、刀子,及針剃髮衣坐砧,皆不應奪,准前應知。」根本說一切有部尼陀那卷第四

大唐三藏法師義淨奉 制譯

### 第七子攝頌曰:

外道覆認衣, 作記死時施, 有五種親友, 得法獨應行。

爾時佛在王舍城住竹林園。時摩揭陀主影勝大王,聞說妙法得見諦 已,遂與八萬諸天子眾,并摩揭陀國長者、居士婆羅門等過百千 數,於大眾中制立嚴教,擊鼓宣令普告國人:「不得有人輒為竊 盗。若有犯者驅令出國,所有家資庫藏財物,悉皆給與被賊之 人。」是時世尊,為憍薩羅國勝光大王說《少年經》,得調伏已, 亦於國界作其嚴制:「於我國中不得有人輒行竊盜,如有犯者斷其 命根,所有家資庫藏財物,悉皆給與被賊之人。」爾時群賊咸悉逃 竄,二國中間屯營而住。摩揭陀國有諸商人,相隨而往憍薩羅國。 到彼界已,時諸商主告其伴曰:「我今平安,仁可歸去。」從者去 已,賊便遙見知無護者,便共劫奪。時諸商人咸悉走向憍薩羅國, 投勝光王。既到王所,前白王曰:「大王當知,於此國界先多交 易,今由群賊商侶不來。」時勝光王勅大將軍名毘盧宅迦:「卿可 急往捕捉群賊,并所盜財將來見朕。」是時大將部領四兵,勇力軍 眾象馬車步,往賊營處曠野林中。彼諸群賊總集險林,放捨兵戈分 所得物。爾時將軍既遙見賊,便於四面周遍列軍,戰鼓纔鳴群賊驚 懾,或有奔挑、或漕殘害、或時被殺、或復生擒,收所盜財并諸賊 黨,還至王所啟大王曰:「此是彼賊并所盜財。」時勝光王告諸人 曰:「汝之本物各任將去。」商估賈客既認物已,諸外道輩亦取自 財及赤石染服,并將苾芻所有衣鉢。時諸苾芻後至王所,王曰: 「仁等亦應認取衣鉢。」苾芻報曰:「此貨物中無我衣鉢。」王 曰:「仁等豈非先被賊劫?」答曰:「我亦被賊。」王曰:「若無 者,宜應喚彼外道,并將所認衣物隨來。」時彼外道既聞王喚,持 衣即來。苾芻見衣作如是語:「此是我僧伽胝、此是僧脚敧。」王 告外道曰:「彼是小賊,汝是大賊,強認他衣。」彼默無對。王 言:「聖者!仁於衣物有記驗不?令我得知,此屬外道,此屬苾 **芻。」苾芻報曰:「我衣無記。」以緣白佛,佛言:「苾芻衣物應** 為記驗。」不知云何?佛言:「應為紐結或墨點淨,及餘記驗方乃 持之。 」

佛在室羅伐城。有一長者,娶妻未久誕生一息,其妻身死更娶後妻,未久之間復生一子。其第二子為母所苦,於善法律情希出家, 既出家已遊歷人間。其父後時遇遭重病,定知將死,命長子曰: 「我所有財應作三分。」子承父命遂即分三。便報子言:「此是汝 分用充家業,一分屬吾以供葬事,餘之一分與出家子。」便自歎 曰:

「積聚皆消散, 崇高必墮落; 會合終別離, 有命咸歸死。」

說是語已遂即命終。其出家子聞父身亡,即到兄所孔懷相見,兩共哀號問訊既終。兄乃告曰:「父亡之日先有遺言,留一分財可宜收取。」苾芻念曰:「如世尊說:『死後當與此非法財。』」時諸苾芻以緣白佛,佛言:「凡在家者命欲終時有攀緣心,如是施財並宜收取,父分與財勿生疑慮。既受財已,於三寶中而興供養。其出家者臨終之日無顧戀心,若言:『我死後與。』者,如是之財即不應取。」緣處同前。有二苾芻共為親友,言談得意同處而居。時一苾芻人間遊行隨緣施化,於本房中及經行等處,忘遺衣物并齒木土屑。時彼親友為收舉已,遂起疑心即往白佛,佛言:「收取無犯。然而親友有其五種。云何為五?一者相愛,二者心喜,三者師長,四者得意,五者彼聞用物情生悅樂。如斯五種聽許收用。」緣處同前。時有長者,娶妻未久誕生一女,年既長大便捨俗累,於

佛法中而為出家。時屬飢儉乞求難得,巡門乞食漸至父家,父見女 來即前問曰:「聖女!爾於今者云何濟命?」便報父曰:「乞食巡 門實誠難得,雖經辛苦亦不充虛,飢火所燒甚難堪忍。」父聞斯語 慘然不悅,便告女曰:「爾若在家不出家者,設無憐愛終須供給; 從今已往每日可來家中受食。」既受請已,便於他日復將一伴來詣 父舍,受其請食,父報女言:「我今無力能濟二人,官可獨來而取 於食。」女報父言:「世尊不許一女獨行,佛若許者不遭斯苦。」 時芯芻尼具以上事白諸苾芻,苾芻以緣白佛,佛言:「若時飢儉乞 求難得不充濟者,聽苾芻尼從眾乞法,於父母舍而作往還。應如是 乞,敷座席鳴揵稚,言白既周,尼眾集已,時乞法尼先從上座次第 禮僧,於眾首前合掌恭敬蹲踞而住,應如是乞:『大德尼僧伽聽! 我芯芻尼某甲,今逢儉歲飲食難得,若無飲食不能存濟。我某甲今 從尼僧伽,乞於親族邊作往還住止羯磨。願尼僧伽與我某甲於親族 邊作往還住止羯磨,是能愍者願哀愍故。』第二、第三亦如是說, 羯磨白二准此應作,如百一中說。若苾芻尼,大眾為作與諸俗親往 環羯磨竟,此芯芻尼得獨行無犯,往親族家隨意而食。復至豐時即 不應往,如獨往者得越法罪。」

第八子攝頌曰:

# 赊取他衣去, 及為他和市, 不高下買衣, 應二三酬價。

緣處同前。時有苾芻,於俗人處賒買他衣,將至寺內遂即身亡。時 彼衣主既聞消息,急詣寺中告諸人曰:「某甲苾芻今何所在?」苾 **蜀**答曰:「彼已身死。」衣主告曰:「彼於我處賒取衣來,今可還 直。」苾芻報曰:「仁今可去,詣彼屍林,隨索衣直。」衣主報 曰:「所有衣鉢仁等共分,遣向林中從屍索債,如何釋子欺誑於 人。」時諸苾芻以緣白佛,佛言:「苾芻身死,所有衣鉢,應還衣 價。」復有芯器,於俗人處賒取貴衣,乃至芯芻身亡之後,是時衣 主來至寺中問言:「某甲苾芻今何所在?」答曰:「彼已身亡。」 衣主告曰:「其人我處賒取衣來。」時諸苾芻還將本衣却付,衣主 報言:「彼所將物是貴價衣,今此相還全無所直。」時諸苾芻不知 云何?以緣白佛,佛言:「應隨現前所有之物可充衣價。應告彼 言:『其人已死,現有斯物,今以相還官生歡喜。』」時有二居士 共為交易,一人問曰:「此衣幾價?」衣主答曰:「二十迦利沙波 拏。」買衣人曰:「我今酬汝十迦利沙波拏。」時鄔波難陀來至其 所,彼之二人作如是念:「諸大苾芻出言決定,我等宜應請斷其 價。」二人共問鄔波難陀:「大德!此之衣物價直幾多?」是時鄔 波難陀私問一人:「汝欲買衣?為當賣衣?」答言:「我買。」鄔 波難陀報曰:「此衣價直二十迦利沙波拏。」又問第二:「汝欲賣 衣?」報言:「我賣。」鄔波難陀報曰:「此衣可直四十迦利沙波 拏。」二人交易,賣索四十,買酬二十,因致紛諍。買衣人曰: 「我於和市人邊聞直二十。」衣主復云:「我於和市人邊聞直四 十。」互相謂曰:「我等二人共於一處聽其斷價,兩種不同,定是 彼人故為鬪亂。」諸苾芻聞已白佛,佛言:「凡諸苾芻,不應為他 俗人斷價,亦復不應於交易處輒論貴賤如和市法。若有犯者得惡作 罪。」時諸苾芻欲買衣服高下酬價,俗人報曰:「我是小興生人, 仁等乃是大興生人。」時諸苾芻以緣白佛,佛言:「苾芻不應酬價 高下,若諸苾芻欲買衣者,應令俗人酬其買價。若無俗人,應可二 三得自酬價,過此酬者得惡作罪。」

# 第九子攝頌曰:

果樹差修理, 四種不應分, 果熟現前分, 觀時莫諠戲。

爾時佛在王舍城。時頻毘娑羅王,以一千根菴沒羅林施與僧伽。時諸苾芻雖取果食不令看守,遂致摧折而便荒穢。頻毘娑羅王見林摧折,問左右曰:「此菴沒羅林是誰園樹?」大臣答曰:「此是大王先以千株菴沒羅樹施與苾芻僧伽,僧伽食已而不看守,因即摧殘致斯荒穢,然諸聖者曾不修理。」時諸苾芻以緣白佛,佛言:「於寺

基業不應棄捨,大眾應差守園之人令其修理。」時守園人遂安籬柵,計諸果樹分布與人,於樹根下而嚼齒木、或時漱口、或洗手面濯足浣衣。是時林樹被溉灌已,枝葉滋榮果實豐熟。有眾多客苾芻來告舊人曰:「美果新熟仁應惠我。」舊人答曰:「我等已分,仁何得食?」報言:「此是軌範師分、此是親教師分、此同親教師分、此同軌範師分。」時諸苾芻以緣白佛,佛言:「有四種物皆不應分。云何為四?一者四方僧物,二者窣覩波物,三者眾家病藥,四者寺資產物。若有違者得惡作罪。此等諸果應行與僧。」時守舊人來偷果,世尊告曰:「大眾應差守護園人。」既受差已專為守護、因斯闕食,佛言:「更別差人應早食已替彼令食。」如世尊說:「菴沒羅果分與眾僧。」時守園人平等分與,其果有蟲。佛言:「應審觀察,蟲者簡却,先作淨已然後行之。」諸苾芻等淨果之時,高聲諠戲口出涎唾灒污其果,佛言:「不得諠雜,應聖默然而為觀察。若諠鬧者得惡作罪。」

第十子攝頌曰:

無淨人自行, 自取不應食, 不選開其病, 結界證耕人。

如世尊說:「菴沒羅果應行與僧。」不知誰應合行?佛言:「令淨 人行。若無淨人,應使求寂。求寂無者,先作淨已苾芻受取,應可 自行。」如世尊說:「差守園人令其守護。」淨人求寂纔去之後, 眾鳥咸來啄損其果,佛言:「應以樹葉蓋覆。淨人求寂事畢還來, 宜應指示。」時六眾苾芻次差守園,簡取美好菴沒羅果,持至住處 受已而食。時諸苾芻互相謂曰:「美好之果久不見行。」報曰: 「無可將來。咸被六眾簡取,好者持至住處,令他授與皆自噉 食。」時諸苾芻以緣白佛,佛言:「不應自取而食,若有食者得惡 作罪。」時六眾苾芻自選好者令授而食,與此與彼遂便鬧亂,佛 言:「不應自選而食。若有食者得惡作罪。無犯者,若火力微應取 熟者,火力強盛應可食生。」 緣處同前。時諸苾芻人間遊行,遇至一村於中有寺,既入寺已,不 見一人。舊住苾芻,先向書日遊處,寺內皆空。時客苾芻自相謂 曰:「此之空寺既無苾芻,我等豈於無界之處而為居住?當共結 界。」先結小界。時舊苾芻遂即來至,客便告曰:「善來!善來具 壽!仁可來此我為解勞。」主人報曰:「具壽!何為却與我等解 勞?我是主人,暫向晝日閑靜之處。」客便告曰:「我欲結界,已 於此處先結小界。」主人報曰:「我於此處先已結界。」彼此懷 疑,為取先界?為取後耶?以緣白佛,佛言:「應取先界,後結不 成。凡客苾芻至他住處,應可住經七八日已,無人來者,應共結 界。若異此者得惡作罪。」

緣處同前。有一苾芻住阿蘭若處,有二耕人共為鬪諍,遂以身手互相捶打。時此二人便以苾芻為證見者。時彼二人相牽俱至王所,各申道理,言有證人。令喚苾芻。苾芻既至,王自問曰:「此事如何?」苾芻白言:「大王!若能自立要契如轉輪王者,我能白王。」王然其契。苾芻答曰:「此二鬪人,更互相瞋,俱行拳棒。」王既聞已二皆與罪,苾芻告曰:「大王!何故行罰?向者立要如轉輪王行化於世。」王曰:「輪王如何行化?」答曰:「夫輪王者,止其無益,令行有益。」王曰:「若如是者,二俱有犯,各與輕罰,兩皆釋放。」是時二人各生嫌恨。時諸苾芻以緣白佛,佛言:「有鬪打者,苾芻不應在傍看住。若見諍者急捨而去,如不去者得惡作罪。」

尼陀那別門第五總攝頌曰:

菩薩像供養, 吉祥大眾食;

大會草稕居, 集僧鳴大鼓。

第一子攝頌曰:

聽為菩薩像, 復許五種旗;

為座置尊儀, 鐵竿隨意所。

緣處同前。若佛世尊自居眾首為上座者,便有威肅眾皆嚴整,世尊不在即無上事。是時給孤獨長者來至佛所,禮雙足已退坐一面,而白佛言:「我今欲作贍部影像,唯願聽許。」佛言:「應作。」欲安幡蓋,佛言:「隨意。」時彼長者不知欲造何幡?佛言:「有五種旗幡:謂師子幡、莫羯羅幡、龍幡、揭路荼幡、牛王幡。」長者復請為贍部影像作座,佛言:「可作。」又作鐵竿而懸旗幡,佛

言:「應作。」 第二子攝頌曰:

供養菩薩像, 并作諸瓔珞,

塗香及車輿, 作傘蓋旗幡。

緣處同前。給孤獨長者白佛言:「豈非佛為菩薩時廣作供養?」佛言:「如是。」「我今欲為贍部影像隨意供養。」佛言:「應作。」「世尊為菩薩時著諸瓔珞?」佛言:「如是。」「我今欲為贍部影像作諸瓔珞。」佛言:「隨意,唯除脚玔耳璫,餘皆任作。」「我今欲作磨香塗香拭佛手足。」佛言:「應作。」「佛為菩薩時乘輿出入或乘御車,我今欲作輦輿。」佛言:「應作。」復言:「為菩薩時常持傘蓋隨從幡旗,我今欲為影像作其傘蓋并造諸幡。」佛言:「應作。」「菩薩在家常著花鬘瓔珞以為嚴飾,我今亦作用莊嚴像。」佛言:「如是種種莊飾之具,我皆聽作。」第三子攝頌曰:

吉祥并供養, 花鬘及香合,

#### 諸人大集時, 書開門夜閉。

爾時給孤獨長者請世尊曰:「佛為菩薩時,一切大眾以吉祥事恭敬供養。佛若聽者,我於贍部像前,為吉祥事并設供養。」佛言:「隨意應作。」「我今復欲作頂上鬘及諸香合供贍部像。」佛言:「應作。」長者言:「我因贍部像莊嚴寺宇。」時諸苾芻彩畫其寺,以諸香泥花鬘燒香末香,奏諸鼓樂廣設供養。時眾人等見此希奇生未曾有,共相謂曰:「此之住處極妙莊嚴。」時諸苾芻見人鬧亂畫日閉門,俗人見已便起譏嫌云:「障生善。」以緣白佛,佛言:「若有鼓樂為供養時,晝日開門至夜宜閉。」第四子攝頌曰:

# 大眾集會食, 薜舍佉月生, 香臺五六年, 並應為大會。

爾時給孤獨長者設供養時,眾多苾芻等七眾俱集。長者見已生大歡喜,作如是念:「如世尊說:『苾芻!有五種時施。云何為五?一者於客來人及將行者而為給施。二者於病人及瞻病者而行給施。三者於飢儉年及在險路而行給施。四者若得新穀新果及新節歲,先於持戒有德為供給已後當自食。五者若遇風雨寒雪之時,應持餅粥麨及諸漿往施眾僧,勿令聖者冒涉艱辛,受我飲食安樂而住。』我今見此苾芻、苾芻尼、鄔波索迦、鄔波斯迦,遠來至此疲於道路。若佛聽者,我當為此而設大會。」即往佛所禮雙足已,在一面坐白佛言:「世尊!如佛所說有五種時施,廣如上說。由觀菩薩大會供養四方人眾悉皆雲集行路辛苦,若佛聽者我當設供。」佛言:「隨意應作。」長者遂設無遮大會。

爾時長者白佛言:「我今更設大會。」佛言:「應作。」長者白佛:「菩薩生時是何月日?」佛告長者:「薜舍佉月日月圓時是我生日。」「我今欲作生日大會。」佛言:「應作。」「我今欲為贍部影像而作香臺。」佛言:「應作。」「世尊為菩薩時經於幾歲而除頂髻?」佛言:「五歲。」「我今欲作五歲大會。」佛言:「應作。」「世尊菩薩於幾歲時重立頂髻?」佛言:「六歲。」餘如前說。「世尊我欲為作贍部影像作佛陀大會。」佛言:「應作。」第五子攝頌曰:

# 大會為草椁, 不應雜亂坐, 應打揵稚鼓, 告時令普知。

給孤獨長者設大會時, 六大都城並皆雲集。時諸苾芻亦復來至, 由 斯席薦並皆闕少, 佛言: 「長者!應結草稕隨時坐食。」苾芻食已 不收而去,以緣白佛, 佛言: 「苾芻食了應收草稕舉置一邊, 方隨 意去, 若作佛陀會已應須棄之。」時諸苾芻不依大小, 越其次第相 雜而坐, 令行食者久延時節, 或時食竟更有人來失其時候, 佛言: 「應告時至。」雖告時至,眾鬧不聞,世尊告曰:「應打揵稚。」 猶尚不聞,佛言:「應可吹螺并復擊鼓。」然未普聞,佛言:「打 大鍾鼓。」佛令打鼓,打三下已即便長打,諸有病者及授事人致有 闕乏,佛言:「應待病人請得食已,并授事人食竟然後長打,若不 爾者得越法罪。」

第六子攝頌曰:

集僧鳴大鼓, 供了去幢幡; 若多獲珍寶, 隨應悉分與。

根本說一切有部尼陀那卷第五

大唐三藏法師義淨奉 制譯

大門總攝頌曰:

最初為懺謝, 第二定屬物, 第三資具衣, 目得迦總頌。

別門初總攝頌曰:

懺謝草田中, 合免王影勝, 狗肉盞甘蔗, 糖酥根等聽。

第一子攝頌曰:

懺謝非近圓, 觀求寂相貌, 苾芻與尼法, 互秉法皆成。

爾時佛在室羅伐城。時諸苾芻分作兩朋決擇義理,便牛鬪諍,其小 芯芻訶責大者。時大芯芻退入房中情生忿恨:「如何卑小 麩-夫 +欠]突於我?」既為瞋火所燒惱故,因茲命斷生毒蛇中。時小苾芻 心生追悔:「我為不善,豈合瞋責上座苾芻,我今應往從乞懺 摩。」作是念已,與諸苾芻俱往其處,見彼門閉,便以物開到苾芻 所,欲申頂禮白言:「大德!願見容恕。」遂見屬毒大蛇含瞋而 住。是時世尊,以大悲力來至其所告苾芻曰:「汝今應可禮彼雙足 從乞懺摩。」白言:「世尊!云何令我禮此蛇足?」世尊告曰: 「應作昔時苾芻身想而為禮敬。」時彼苾芻向蛇作禮。世尊告曰: 「賢首!汝應容恕。」即為毒蛇說三句法,報言:「賢首!汝於我 所已修淨行,應生天上,但由瞋火所燒害故,生毒蛇中。賢首應 知!諸行皆無常,諸法悉無我,寂靜涅槃樂。汝官於我起淨信心, 由此功德捨傍生趣生善道中。」時彼毒蛇便作是念:「我今不應親 於世尊聞三句法而更噉食養無益身。」諸傍生類飢火最強,以不食 故便即命終。由於世尊心生淨信,於此命過得生天上。凡初生天若 男若女,皆悉法爾起三種念:「我於何處死?今於何處生?由何業 緣而得來此?」即自觀見,捨彼蛇身生此天上,由於佛所起淨信 心。爾時天子便作是念:「今我不應不至佛所禮拜供養,應往佛所 報恩奉事。」時彼天子即著上妙七寶瓔珞耳璫臂釧,而自莊嚴光明 赫奕,以天妙花、嗢鉢羅花、鉢頭摩花、分陀利花,持是等花,過 中夜已來至佛所,即以天花散布佛前,禮雙足已在一面坐。由是天 子威光力故,令逝多林光明普照。爾時世尊觀彼天子意樂隨眠根性 差別,而為說法。時彼天子既聞法已即於座上獲預流果,既得果已 白世尊曰:「我今所證,非父母等能作斯事,廣說如餘。由依世尊 慈善力故,從三惡道拔出於我置天人處,生死流轉得其邊際,血淚

大海皆令枯竭,身骨大山今已超過,無始時來積聚二十有身見山, 以智金剛杵而摧碎之,證預流果。世尊!我於今日歸依三寶,證知 我是鄔波索迦。始從今日乃至盡形,於三寶所心極淨信。」時彼天 子禮佛雙足,右遶三匝忽然不現,還本天宮。 時諸苾芻,於初後夜警覺勤修澄心靜慮,見逝多林光明赫奕,咸作 是念:「為是梵釋諸天及四天王,或是大力天子等詣世尊所而為禮 覲?」作是念已行詣佛所,頂禮雙足即以上事具白世尊。世尊告 曰:「非梵天主,乃至亦非大力天子來詣我所而為奉覲。汝等頗憶 有大毒蛇我為彼說三句法不?」白佛言:「見。」世尊告曰:「彼 既命終得生天上,來詣我所。我為說法,便得見諦還向天宮。以是 因緣光明普照。」世尊告曰:「以不容忍有如是過,是故苾芻若有 瞋諍,官速懺謝共相容忍,勿令後時招斯過失。」時有苾芻新被訶 責,即便就彼請其容恕,遂增瞋恚而報之曰:「看此與我極為燒 惱。」佛言:「不應新被瞋責便就懺摩,待彼停息可求容恕。」 於此城中有二苾芻,共論法義遂生瞋忿,少年苾芻訶責老者。時老 難陀曰:「汝可詣彼囓毒蛇所,稱我言教,唱言:『無病!』報 言:『賢首!汝已於我正法律中而為出家,於四沙門果隨一應證。 汝由前生重瞋恚故生毒蛇中,故汝官應容恕於彼。』」時具壽阿難 陀承佛教已, 詣毒蛇所報言:「賢首! 佛於仁者問言無病。復作是 語:『汝已於我正法律中而為出家,於四沙門果隨一應證。汝由前 生重瞋恚故生毒蛇中,是故汝應容恕於彼。』」是時毒蛇在於房 內,詬詬作聲不忍而住。世尊復命具壽大目連:「汝可詣彼囓毒蛇 處傳我言告,廣說如前。」目連至已,時彼毒蛇於戶扇孔,暫出其 頭復還却入。世尊復命具壽舍利子:「汝可詣彼囓毒蛇處傳我言 告,亦如前說。」舍利子至已,時彼毒蛇於戶扇間露出半身還縮房 內。是時世尊自詣房中告其蛇曰:「賢首!汝已於我正法律中而為 出家,於四沙門果隨一應證,未得其一。汝由前生瞋恚重故生囓毒 中,是故汝應容恕於彼。」蛇遂出房向世尊前蟠身而住。是時世尊 告彼苾芻曰:「汝應求謝此囓毒蛇。」白言:「世尊!我欲如何行 懺謝法?」佛言:「應禮雙足。」白言:「世尊!豈非落在傍生趣 中,我今云何禮敬其足?」世尊告曰:「汝心緣彼苾芻前身想在目 前方禮其足。」時此苾芻作是想已便禮其足,蛇即以頭覆苾芻頂如 懺謝法。世尊告曰:「汝諸苾芻!由瞋恚故生此過失,是故苾芻若 相瞋恨,應速懺摩。」晡後相瞋,旦應求謝,彼懺摩時轉增瞋恚, 佛言:「應先致問,後乞容恕。」彼仍不受,佛言:「應受。」至 相近處不為禮敬,佛言:「至勢分處即應致禮,彼應答言:『無 病。』若不爾者,二俱得罪。」

復有二苾芻,平章法義情生忿恨,是時少年訶責老者,其少苾芻自知非理,禮老者足求請懺摩。是老苾芻默然而住,少者念曰:「此既極瞋不容忍我,待其瞋息後當就謝。」時老苾芻往舊房內懷瞋而住,時少年者至彼房中執足頂禮告言:「大德!幸見容忍。」彼發大瞋告餘人曰:「大德!請觀此人,故來惱我。」少年便念:「由佛世尊遣我懺謝,應以慈心利益心而自安住。然此苾芻,既見我來情無喜樂,我復何須求彼容恕?」便不復申來就禮敬。後於異時其老苾芻與餘苾芻來往經行共為言話,時少年者向彼行處欲禮餘人,餘人見已告老者曰:「尊者!此人戒淨何不懺摩?」老者答曰:「此有惡心但來禮汝。」時老苾芻語傍人曰:「汝今目擊日禮於汝,不禮於我,親驗此人定懷惡念。」時彼傍人報少者曰:此人戒淨何為不禮?」時少苾芻廣說前事。時諸苾芻以緣白佛,佛言:「凡為諍者至相近處應為禮敬。彼應答言:『無病。』不依行者,俱得惡作罪。應但合掌而為敬禮。」

爾時具壽鄔波離,白世尊曰:「正受戒時,其受戒者作如是語:『具壽!不應與我進受近圓。』時諸苾芻強為其受,不知此人成近圓不?」佛言:「鄔波離!不成受。已發言尚名捨戒,況正受時得名善受?」

如世尊說:「求寂年滿二十應受近圓。」而此求寂不知年幾?時諸 苾芻亦起疑念不受近圓,是時彼人防心而住。時諸苾芻以緣白佛,佛言:「應察彼相。」時諸苾芻露彼形體,觀其隱處及以腋下,彼 生羞愧。世尊告曰:「可於高象牙杙上及笐竿等挂瓶鉢袋或餘衣物 而告彼言:『汝今可取彼衣鉢來。』當舉手時應觀腋下毛相長短。」復白佛言:「如諸求寂正受戒時,諸苾芻眾遂便為秉苾芻尼 羯磨而受近圓,得名受不?」佛言:「成受近圓,諸苾芻得越法罪。」

## 第二子攝頌曰:

草田村略說, 生心褒灑陀, 賊縛不同愆, 六開僧教罪。

爾時佛在室羅伐城。時諸苾芻與諸商旅共伴而行,至褒灑陀日,見有空閑軟草之地,共相謂曰:「諸大德!好軟草地,我等於此為褒灑陀。」即便共坐為長淨事。乃至事了,勇健商人悉皆過盡。時諸苾芻隨後而去,咸被賊劫。來入寺中,時舊苾芻見此客來,便即問曰:「善來大德!安樂行不?」答言:「何有安樂?我被賊劫僅存餘命。」時諸苾芻以緣白佛,佛言:「不應貪其軟草平處而為長淨,須逐行伴至村邑已方為長淨。」如世尊說:「近村邑處方為長淨。」時諸苾芻半已入村、半在村外,便作是念:「我今別住為作長淨為不作耶?」時諸苾芻以緣白佛,佛言:「其入村者,應集一

處而為長淨。在村外者,離村勢分共集一處為長淨事。苾芻未集不 應長淨,若不集者得越法罪。」又諸苾芻共諸商旅在道而行,至長 淨日,諸苾芻等告商人曰:「賢首!暫住。我今欲為長淨之事。」 商人告曰:「此有賊怖,仁可急來,我不遑住。」時諸苾芻隨伴而 行,作如是語:「可於此住,可於此住。」遂至天明。諸苾芻等以 緣白佛,佛言:「不應至日而不長淨,應隨道行共為長淨。」彼在 路行共為長淨,時諸商旅皆起譏嫌白言:「聖者!我等畏賊咸悉默 然,仁等何因故高聲耶?」時諸苾芻以緣白佛,佛言:「不應廣 說,應略長淨。」然彼商人尚懷譏論,世尊告曰:「應可心念而為 守持。有六種事心念守持:三衣捨、三衣分別、長衣捨、別請、作 長淨及隨意事。應如是說: 『今十四日僧伽長淨,我苾芻某甲於十 四日亦為長淨。我苾芻某甲,於諸障法自陳遍淨。我今且為守持長 淨,若於後時遇和合眾,我當共和合眾而為長淨,滿諸戒聚故。』 如是三說。若至此日應為長淨,而不作者得惡作罪。」時諸苾芻人 間遊行被賊所執,賊相告曰:「君等今可淨諸苾芻。」時諸苾芻知 彼賊意欲行殺害,告彼賊曰:「何意仁等欲害於我?」賊曰:「汝 等苾芻,與王大臣長者商客並悉相知,彼於仁處情深信敬,仁當告 彼,彼於我等為無利益,為此須淨。」是時眾內有一苾芻,犯故妄 語便自念曰:「我今被殺,帶罪身亡當生惡趣。」喚餘苾芻就於屏 處說所犯罪。時賊見已告曰:「仁者欲往何處?」苾芻報言:「我 作少許苾芻法事。」時賊復云:「汝欲逃竄耶?但可住此,不應餘 去。」是二苾芻即對賊前說所犯罪:「大德存念!我苾芻某甲犯如 是罪,此所犯罪,我今於大德前從清淨來,並皆發露說罪,我不覆 藏。由發露說罪故得安樂,不發露說罪不安樂。」第二、第三亦如 是說。是時群賊見說罪已問言:「仁等不作故妄語耶?」答言: 「不作。」「若如是者隨意當去,慎勿告人云此相遇。」時彼苾芻 心生追悔:「我對俗人說所犯罪。」以緣自佛,佛言:「汝等苾 **芻**,凡諸賊者是險處貴人,汝對說罪,此名善說。」 緣處同前。時有苾芻人間遊行為賊所執,賊相告曰:「仁等今可淨 諸苾芻。」時諸苾芻即知其賊當欲害己,告諸賊曰:「何意仁等見 害於我?」賊同前告,乃至為此須淨。苾芻報曰:「但能放我,終 不說汝。」是時其賊作如是語:「為要契已然後相放,仁等每於月 十五日大眾咸集有所宣說,其所說法應為我等而廣說之,我當放 汝。」時彼眾內有苾芻誦戒通利,即為廣說波羅底木叉竟,賊主告 曰:「尊者應去,隨所至處慎勿說我。」時諸苾芻既得免已,後生 疑念:「我等對賊說別解脫經。」以緣白佛,佛言:「凡是賊者林 野貴人,汝對說者此為善說。」

緣處同前。時諸苾芻在跋蹉國遊行人間為賊所執,賊相告曰:「仁 等今可淨諸苾芻。」是時賊中有一先是苾芻相近住人,告諸伴曰: 「何勞殺此?應以連根茅草可急縛之,令其飢渴自餓而死。」時彼 群賊即以茅草縛諸苾芻,棄之而去。時跋蹉國王名烏陀延為獵而出 遇到其所,告從臣曰:「此是鹿熊耶?」走騎觀察乃見苾芻,問 言:「仁是何類?」苾芻答曰:「是出家者。」「於何類中?」 「是釋迦子。」「何為此住?」答:「我被賊縛。」「以何物 縛?」答曰:「生草。」王曰:「何不拔起?」報曰:「世尊為我 制其學處,若復苾芻壞牛草木者,得波逸底迦。」王即下乘自手解 放,各施三衣捨之而去。時諸苾芻遂生疑念:「我等對王說其罪 相。」以緣白佛,佛言:「汝諸苾芻!必有如是剎帝利種灌頂王 者,為說罪相,此為善說。」復白佛言:「對有犯人得說露不?」 佛言:「不應對有犯人說露其罪,必有難緣對說無犯。然於同犯罪 人,不應對其說悔。 」 緣處同前。有一苾芻,情多愧恥堅持禁戒愛樂學處,忽於一時犯初 眾教,便牛懊悔情懷羞恥,形色羸黃積漸成病。有餘苾芻來慰問 曰:「大德!何故身體痿黃?有何病苦?」彼默不答。後有得意苾 **芻來問,彼即具陳,報言:「具壽!若實爾者,我今為汝白諸苾 蜀。」答言:「汝若告者我當自殺,寧向他國方陳其罪。」時彼二** 人相隨而去,彼於半路便即命終。時伴苾芻作如是念:「所為之人 今已命過,我於今者不應住此。」即還本處。諸苾芻見告言:「善 來大德!所有遊履安樂行不?昔日共伴今何所在?」即便啼哭告 曰:「其人已死。」發言而歎:「雖知諸法皆悉無常,然彼苾芻帶 罪而死,墮捺落迦幾時當出?由斯我憶非常惻怛。」時諸苾芻以緣 白佛,佛言:「彼釋迦子是從罪出。」告諸苾芻:「凡是罪者我說 由心,能從罪起不由治罰,是故我聽必有如是稟性羞愧,應對一人 而說其罪。」時諸苾芻,有解經者、解律者、解論者,犯眾教罪。 彼向眾中陳說其事,有餘人見便作是言:「此等大德是妙階道,彼 由造罪到如是處,餘苾芻等當復如何?」以緣白佛,佛言:「應詣 他處陳說其罪。」此諸苾芻同前命過,佛言:「應對一人而為說 露。復有大福德人,或是眾首上座,亦應對彼一人說悔。」 第三子攝頌曰:

一日至四旬, 皮肉皆不淨。

爾時佛在室羅伐城。具壽阿難陀次當番直,爾時僑薩羅國勝光大王來詣其處,禮雙足已在一面坐。時阿難陀於聖教中略為說法,王言:「大德!我無他事,為我廣說。」時阿難陀更為略說,王復自言:「聖者!我無他事,願為廣說。」如是至三,阿難陀答言:

「大王!王雖無事,我有他緣。」王言:「大德!有何作務?」報 言:「大王!我當寺直,應須撿挍。」王便念曰:「此是我事。」 即便敬禮奉辭而去,往詣佛所,頂禮佛足白世尊言:「我是剎帝利 灌頂大王,但是我所作事我即應作;若是皇后應作、若是太子及以 大臣,并諸將帥群寮人庶,所合作事,各依職位而悉應作。世尊乃 是無上法王,唯願世尊,應合免者放免其事,慈愍故!」世尊是時 默然許可。時勝光王從座而去。爾時世尊告諸苾芻:「汝等當知! 我今聽許,應合免者,不應差作知僧事人。」時諸苾芻,不知誰是 合免之人?世尊告曰:「解經、解律、解論者,此等應免。」時六 僧事人。」以緣白佛,佛言:「遍持經部方免知事。」復有但持一 兩波羅市迦,遂便自說:「我是持律者,亦應免我。」世尊告曰: 「遍持律部方免知事。」復有唯讀一、二小論,遂便自說:「我是 持論者,亦應放我。」世尊告曰:「總持論部方免眾使。」 緣處同前。時憍薩羅國勝光王邊隅反叛,王令一將持兵討罰,遂被 他敗振旅而歸,如是至三被降歸國。時執政大臣遂白王曰:「賊兵 強盛軍將無功,自非大王親臨討罰,無由降伏。」時勝光王擊鼓宣 令遍告諸人:「但於國內解執刀者,咸可從征。」時王親自嚴整四 兵罰彼不臣,固守而住,其城恃險卒難降伏。是時大臣復白王曰: 「給孤獨長者有大福德天神擁護,彼若來者此或歸降。」時王遣使 告長者曰:「我有少緣要欲相見。」長者承命即詣王軍。時彼賊徒 尚未降伏,既歷多時。王問長者:「仁不有心念居家不?」即白王 曰:「我實無心緣彼家室,但有私心願見僧眾。」時勝光王勅留守 曰:「在彼聖眾不應與教,方便遣來我欲相見。」留守大臣見王教 已,便作是念:「我今云何不與其教,令阿離耶得詣王處?」時有 老臣便相謂曰:「我為方計令諸聖眾自詣王軍,而非我等與其教 令。去斯不遠,有古王梵授故舊苑園並悉摧毀,詐言重修決渠穿 寺,以此方便彼當自往。」留守大臣將諸部從入逝多林,便於寺內 以繩絣絡決渠通水。諸苾芻等問言:「賢首!汝何所作?」報言: 「聖者!天子有勅,欲令我等於王舊苑令重修治,逝多林內通渠洩 王教今欲如何?我無二頭,誰能拒勅?」眾便告曰:「幸可暫停, 答言:「不得,乃至七日亦未能迴。」以緣白佛,佛言:「若諸苾 芻有大眾事者,我今聽彼齊四十夜守持應去。」諸苾芻眾不知云何 守持?世尊告曰:「先敷座蓆次鳴揵稚,以所為事先白眾知。眾既 集已,應可勸獎情樂苾芻:『汝能為僧伽守持四十夜出界行不?』 彼應答言:『我能。』次一苾芻先為白已,次作羯磨守持而去。」

時具壽鄔波離白世尊言:「頗得守持一夜出界行不?」佛言:「得。」復白言:「守持二夜、三夜乃至十夜、或二十夜、或三十夜、或四十夜出界行不?」佛言:「得。」復白世尊:「頗得守持過四十夜出界行不?」佛言:「不得。應須過半住於界內。」「如世尊說:『守持一夜。』對誰應作?」佛言:「應對一人,乃至七夜咸對一人。若過此者對僧伽受。」「如世尊說:『皮非淨』者,其肉淨不?」佛言:「皮非淨者,肉亦非淨,乃至筋骨並皆不淨。」

#### 第四子攝頌曰:

影勝王床施, 王母物入僧; 烏鶿鶴鷲雕, 苾芻不應食。

爾時王舍城摩揭陀國未生怨王鞞提呬子,由提婆達多極惡知識所破壞故,其父影勝如法聖王,抂斷其命。時未生怨王情懷追悔,見父床座洟淚交流,大臣報言:「昔日先王深信聖眾,應以床座奉施僧伽。」即遣使者送其父床施僧住處。時諸苾芻受彼床已,於門屋下而敷置之。王於一時詣僧住處,見其父床在門屋下,復增悲泣。是時大臣白言:「聖者!大王本意不欲見床,為斯事故持以奉施,仁等云何敷在門下?令王重見悲涕轉增。」時諸苾芻以緣白佛,佛言:「不應以王臥具安在門下。」彼敷廊下,起過如前,佛言:「不應敷在廊下。」彼便以床置於房內。諸不信人便起譏謗:「先王之床苾芻已賣而為飲食。」世尊告曰:「於月八日或十五日,於廊簷下而為敷設。」諸不信人見復謗曰:「此非先王所臥之床,王所臥床苾芻已賣,共為飲食。」以緣白佛,佛言:「宜於床上明書其字,此是頻毘娑羅王所施之床。此床既爾,其勝光王為母施物,廣說同此。」

緣處同前。於夜分時忽然降雹大傷禽獸,是諸人等悉皆夜出,所有堪食禽獸之類咸悉持歸。時六眾苾芻為性好樂多食久眠,晨朝起已瞻視四方,若於人家有火烟起,或於田野見鳥群翔,即往其處而求飲食。時見鷲鳥從空飛下,因即相報俱往其處,收諸自死烏鶿、白鷺、鵂鶹、雕鷲,擔負而歸。時婆羅門居士見而告曰:「阿遮利耶何用此物?」答言:「我將欲食。」彼復問言:「不應食物何故食之?」答曰:「所應食者求之既無,豈於此物而不得食。」因被譏嫌,以緣白佛,佛言:「苾芻不應食諸烏鶿白鶴雕鷲之類,如其食者得越法罪。」

根本說一切有部目得迦卷第六

大唐三藏法師義淨奉 制譯

## 第五子攝頌曰:

狗肉不應噉, 并食屍鳥獸, 及以同蹄畜, 亦不食獼猴。

爾時佛在室羅伐城。時屬儉年,諸俗人等多食狗肉。時六眾苾芻, 於日初分著衣持鉢入城乞食,隨所至處人皆告曰:「聖者!可去, 實無一物堪以奉施。」其家釜內有營食處,六眾見已便問彼言: 「汝舍釜中是何飲食?」答云:「狗肉。」問言:「仁等食狗肉 耶?」答言:「我食。」六眾報言:「我依仁等而為出家,汝所食 物宜應與我。」彼便授與,六眾苾芻受肉而去。是時群狗既聞肉 氣,共來圍繞號吠隨行。時諸居士見而告曰:「聖者!何故被群狗 逐? \_ 答言:「我所持者,是其狗肉。」問言:「仁者食狗肉 耶?」答言:「我食。」因被譏嫌。以緣白佛,佛言:「凡諸苾 **芻**,不應食狗及以鵄鴞,并諸鳥獸食死屍者,咸不應食。若有食者 得惡作罪。」 緣處同前。時有盜賊,偷憍薩羅國勝光大王廐中上馬,將入闇林遂 斷其命,棄其頭尾持肉而去。六眾苾芻性多饕餮,晨朝遍望觀察四 方,遙見闇林有諸鷲烏從空飛下,因即相報共往其處,見彼所棄馬 尾頭蹄,因相謂曰:「鄔波難陀!我今豐足糞掃之物。」遂共收 取。時掌馬人尋蹤而至問六眾曰:「仁所著者是大仙服,如何更作 斯惡行耶?」問言:「我作何事?」答言:「王厩上馬仁等偷 殺。」報言:「此非我殺,是賊偷來殺而取肉,頭蹄及尾棄地而 去。我等將作糞掃物取。」馬主譏曰:「此實可愛糞掃之物。」以 緣白佛,佛言:「汝等苾芻,諸有同蹄之畜狐狢等類並不應食。若 有食者得惡作罪。」時有獼猴攀條遠躑忽然墮地,因即命終。六眾 見已持環住處,置於釜內自煮。時有女人失其兒子,尋逐蹤緒入浙 多林,察見六眾於大釜內煮彼獼猴。女人見已搥胸叫曰:「嗚呼! 我兒於此被煮。」是時六眾挑獼猴手以示女人,女人叫曰:「禍 哉!此是兒手。」次挑其脚,女人告言:「禍哉!是我兒脚。」次 舉其頭,女人復言:「禍哉!是我兒頭。」復舉其尾告女人曰: 「儞之兒子亦有尾耶?」女人告曰:「豈復仁等食獼猴肉?」答 云:「不是汝兒,我食何過?」諸人聞已便起譏嫌,以緣白佛,佛 言:「汝諸苾芻!獼猴之貌有類人形,是故苾芻亦不應食。若有食 者得惡作罪。」

第六子攝頌曰:

小盞及衣角, 皮葉等有過, 除其鐵一種, 餘物任情為。

佛在室羅伐城。時有苾芻,身嬰重病為苦所逼,便往醫處報言:「賢首!以所宜藥為我處方。」醫人答曰:「有下灌藥宜可用之,病速瘳愈。」告言:「賢首!世尊未許。」答曰:「仁之大師慈悲為本,必緣此事開許無疑。」時諸苾芻以緣白佛,佛言:「醫人處方用下灌藥,當隨意作。」彼以小盞而為下灌,便棄其藥,佛言:「不應以盞而為下灌。」彼以衣角,藥如前棄,佛言:「不應衣角。」又以皮灌,復還棄藥,佛言:「不應用皮。」彼將葉裹,佛言:「不應,宜可作筒。」彼將鐵作熱而且鞕,佛言:「除鐵一種,琉璃銅等咸隨意作。」

第七子攝頌曰:

甘蔗酪肉麻、 藥有四種別、 大麻蔓菁粥、 根等粥應喰。

爾時具壽鄔波離白世尊言:「其七日藥亦得用為盡壽藥不?」佛言:「得,即如甘蔗,體是時藥,汁為更藥,糖為七日,灰得盡形。鄔波離!酪是時攝,漿是更收,酥為七日,燒酪成灰便為盡壽。鄔波離!肉是時藥,脂成七日,燒肉成灰便為盡壽,隨事應服。」時有苾芻,身嬰病苦往醫人處問言:「賢首!我今帶病願為處方。」醫人答曰:「聖者!應食大麻粥。」苾芻告曰:「世尊未許,我云何食?」醫答同前。以緣白佛,佛言:「醫人處方聽食麻粥,或是蔓菁根莖花葉,及其子實並除風疾,咸應作粥而噉食之。」

第八子攝頌曰:

開許粆糖飲, 得為七日藥; 生心為五事, 益彼應共分。

爾時世尊知彼長者受化時至,詣其住處。是時長者,即為世尊於彼寬廣敷設床座。爾時世尊就座而坐,時彼長者禮雙足已在一面坐。是時世尊觀彼長者意樂隨眠根性差別,而為說法示教利喜,令彼長者以智金剛杵破二十種薩迦耶見山,獲預流果。既得果已白世尊曰:「我今所證,非先祖父母所作、非國王作、非諸天作、亦非沙門婆羅門等作、亦非親友及宗族作。由依世尊大師力故,如是廣說,乃至受三歸依心生淨信。」爾時世尊,為彼長者宣說法要,日時遂過,佛及大眾悉皆絕食。長者白佛言:「我今欲作非時漿。」佛言:「隨意應作。」即去營辦紗糖等漿奉佛及僧。諸苾芻等以其過甜不能多飲,以緣白佛,佛言:「葡萄石榴及橘柚等,捼使破碎以物淨濾,勿令稠濁和攪而飲。」時具壽鄔波離,白佛言:「其粆

糖飲,頗得守持經七日不?」佛言:「得,齊何應飲乃至澄清,未醋已來體未變者,隨意當飲。」

爾時佛在室羅伐城,時有長者請具壽阿難陀就舍而食。時給孤獨長者身嬰重病,世尊聞已與侍者阿難陀詣長者處問其疾苦。是時長者為佛敷座,世尊就座即為長者說法要已,從座欲去。時彼長者請世尊曰:「唯願哀愍今受我食。」爾時世尊默然許之。時阿難陀白佛言:「先有長者已請我食。」佛告阿難陀:「應捨先請與餘苾芻,有五種事心念皆成,謂分別衣、守持衣、褒灑陀、隨意事、及受人請。」

緣處同前。時屬儉年,諸苾芻眾乞食難得,有敬信婆羅門及諸居士,請耆宿苾芻就舍而食。時諸苾芻但受一請餘皆不受。世尊告曰:「若於儉年飲食難得,隨有請喚皆應受之。身自食已,於餘苾芻咸應共食。」不被請人亦詣彼舍,施主告曰:「仁不是我所請之人。」便不與食,世尊告曰:「其受請者,應可先受食兩三口,為表相已作如是言:『居士!此諸苾芻乞食難得,我將此食迴以施之。汝可隨喜。』如是二、三,隨所得食皆應迴授,其最後者應自飽食。」

#### 第九子攝頌曰:

醫教應服酥、 油及餘殘觸、 并開服藥合、 除十為淨厨。

緣處同前。有一苾芻身嬰重病,問彼醫人。醫人報曰:「應可服酥,病當除差。」以緣白佛,佛言:「醫人處方隨意應服。」時病苾芻,於其夜分將欲食酥,無人為授,佛言:「應自取服,若酥難得,應可服油。」油更難得,遂便廢闕。時餘苾芻有殘觸酥油,彼作是言:「我有酥油,然是殘觸。佛若開者汝當取服。」以緣白佛,佛言:「病者貧無,設是殘觸服之無犯。」具壽鄔波離白佛言:「如世尊說:『汝諸苾芻應持服藥合。』者,其事如何?」佛言:「除四寶已,餘皆得畜。」爾時世尊在薜舍離,告諸苾芻:「有十種地,不應結作淨厨,所謂爾時也尊在薜舍離,告諸苾芻:「有十種地,不應結作淨厨,所謂

露地、門屋、下房、簷前、溫煖堂、洗浴室、官人宅、制底邊、外道家、俗人舍、尼寺中。若煮食時皆得惡作。」鄔波離白佛言:「若結一室共作淨厨,既作法已上下傍邊皆成淨不?」佛告鄔波離:「若大眾共許,結此一處作淨厨時,上下四邊勢分之內悉皆成淨。」

## 第十子攝頌曰:

根莖葉花果, 皆應淡酒浸, 水攪而飲用, 并許其異食。

爾時世尊既度釋子出家,其人皆慣飲酒,由斷酒故身色痿黃。以緣白佛,佛言:「但有造酒之物,所謂根莖葉花果等,並屑為末以白布裹,可於無力不醉淡酒中而為浸漬,勿令器滿而封蓋之。後以清水投中攪飲,或以麴及樹皮并諸香藥,擣簁為末,布帛裹之。用杖橫繫,懸於新熟酒瓮內,勿令霑酒,經一二宿以水攪用。斯之二種:時與非時,隨飲無犯。如是能令酒渴止息。汝諸苾芻!以我為師者不應飲酒,不與不取乃至不以茅端渧酒而著口中。」

「如世尊說:『莎底苾芻應與異食。』者,當云何與?」佛言:「初生犢子糞尿,并崛路陀樹灰:一、菩提樹灰,二、劫畢他,三、阿說他,四、鄔曇跋羅樹灰,五、溺崛路及入地。四指下土相和一處攪而隨用。」「不知何人應取?」佛言:「令信敬者取,還令信敬者授。」

目得迦別門第二總攝頌曰:

定物有主處, 須問憍薩羅;

從像預先差, 大減會尼眾。

第一子攝頌曰:

定物不應移, 莫拾賊遺物, 屍林亦復爾, 隨許並應收。

爾時佛在室羅伐城。有一長者多饒財寶,造一住處施與僧伽,及諸 臥褥供身雜物咸持奉施。有少苾芻在此而住,共相謂曰:「諸具 壽!臥褥資具既甚豐盈,若舉置時恐多損壞,隨足受用所有餘物, 應可分與苾芻僧伽。」即如其議,所有餘物悉皆分與隨近僧伽。時 有乞食苾芻遊行至此,時舊住者便為解勞,彼客苾芻問言:「具 壽!頗有餘長閑臥具不?」答曰:「此無閑物。」諸客苾芻於破床 上,苦臥通宵至於晨朝,執持戶鑰向俗人本寺主處。既至彼已就座 而坐,即為長者官說法要,讚歎七種有事福業。長者答曰:「此之 破床,極受辛苦。」其寺本主報言:「我以眾多臥褥資具奉施大 眾,豈非苾芻將我施物向餘處耶?」苾芻問曰:「識鎖鑰不?」答 言:「我識。」即與長者共往觀察。時彼長者到住處已問舊苾芻: 「我以眾多臥褥資具奉施大眾,今並何在?」時諸苾芻即以上事具 答施主。長者告曰:「應可取來,我本要心施此住處。」以緣白 佛,佛言:「不應持此處物與餘住處,應隨定處而受用之。若私與 者應全酬直。若不還者,得重越法罪。」

緣處同前。六眾苾芻共諸商旅人間遊行。時諸商旅咸被賊劫,然彼 賊徒將物不盡棄之而去。時六眾苾芻隨賊後行,見其遺物,遂相告 曰:「難陀、鄔波難陀!奇哉豐足冀掃之衣,可共持去。」即取衣 物。物主來至見六眾持衣便共譏曰:「我所有物,賊不奪者,仁復 重偷,尊者著大仙衣造斯惡行。」問言:「我作何事?」答言:「汝偷我衣。」苾芻曰:「賊奪汝衣棄之而去,作糞掃想我等取之。」以緣白佛,佛言:「賊奪商旅所遺棄物不應收取,若取物者得惡作罪。」復有商主被賊所偷,持物不盡所有殘餘,諸居士等告曰:「仁者隨樂收取。」苾芻不取,世尊告曰:「若隨聽者應取。」

爾時佛在王舍城。時六眾苾芻往寒林中停屍之處,遂便共見衣裳傘蓋及以柴樵,而相謂言:「難陀、鄔波難陀!多冀掃物可共持去。」其守屍林旃荼羅等後來至此,便作是念:「誰劫奪此深摩舍那?」是時六眾經七八日共相謂曰:「難陀、鄔波難陀!深摩舍那計應豐有糞掃之衣,可共往彼收斂其物。」既至彼已,時旃荼羅遂即執捉告曰:「阿遮利耶!所有王家課役之事,皆悉出在深摩舍那。云何仁等他所掌物而竊取之?」以緣白佛,佛言:「汝諸苾芻!深摩舍那他所掌物衣蓋柴薪,並不應取。若有取者得重越法罪。」復有餘處掌屍林人,既懷信敬,告苾芻曰:「隨意取衣。」彼不敢取,以緣白佛,佛言:「若彼聽者,隨意應取。」第二子攝頌曰:

有主天廟物, 苾芻不應取, 看病人不應, 勸他捨法服。

爾時佛在室羅伐城逝多林給孤獨園。六眾苾芻與車商旅涉路而行, 忽於中途其車軸折。時彼商主棄斯折軸,別將餘軸替之而去。六眾 天尊。」既建立已捨之而去。時有長者以食祭祠,復有餘人於斯乞 願:「若能令我稱所求者,當為天尊造立堂舍。并婆羅門眾一百八 人,於日日中常來設會。」作斯祈願,得稱所求,即於其所造立堂 廟。時諸商旅往來至此,咸以衣物劫貝毛等奉施天尊。六眾重來見 彼天廟,商估雜踏車馬駢闐,多有資財非常豐膽,共相謂曰:「車 軸天尊奇豐衣物,我等今者應可取之。」時守廟人見其取物,白 言:「聖者!我於此處恒作修治。云何仁等有主神堂衣毛劫貝,而 便輒取?」六眾報曰:「汝久寒賤,何處得有如此天廟?本由我等 創斯建立,以折車軸將作天尊,不體來由漫生悋護。」時鄔波難陀 拳打車軸,以手拔出。諸人告曰:「設尊者造或可餘人,而我依此 以為活命,如何見奪所有衣資。」時諸居士咸起譏嫌。苾芻以緣白 佛,佛言:「不應輒取有主天廟所有衣貲劫貝毛等,若有取者得重 越法罪。有餘天廟隨意令取。」時諸苾芻並不敢取,以緣白佛,佛 言:「若他聽者是即應取。」

緣處同前。時有苾芻身嬰病苦,如世尊說:「令病苾芻於僧伽中宜 修福業。」時瞻病者告病人曰:「可於僧田少當行施。」病人答 曰:「我無一物,今應持我三衣施之。」時瞻病者持衣奉施僧伽, 受已賣而共分。苾芻病差遂闕三衣,以緣白佛,佛言:「不應勸病 苾芻施人三衣,勸他捨者得越法罪。然僧伽不合受此三衣,假令受 者不應分散,見闕當還。若有分者得惡作罪。」

#### 第三子攝頌曰:

物須問施主, 眾利可平分;

二大合均分, 餘眾應加減。

爾時佛在室羅伐城。時有長者,施僧尼二眾食,復以財物奉施二眾。諸苾芻等不知云何應分其物?以緣白佛,佛言:「應問施主,隨語而分。」

緣處同前。時有六十苾芻,人間遊行詣一村所。彼有長者久懷正信,請諸苾芻就舍而食。是時居士作如是念:「彼諸苾芻各以一衣而為奉施。」彼食未竟,復有六十苾芻尼眾而行乞食,諸人告曰:「某長者家有諸苾芻正受供養,仁等可往。」尼便就彼亦受其食。長者念曰:「我今云何以衣遍施?應從老者行與。」時彼長者以六十張氎置上座前,苾芻不知云何共分?以緣白佛,佛言:「此是二眾利物,應共平分。」

緣處同前。有一長者,設二眾食并施財物,時苾芻等與諸求寂平等分之。時近圓者因生嫌恨:「我等所要三支伐羅,彼諸求寂,上披縵條下著一裙,二衣便足。如何使我共彼平分。」以緣白佛,佛言:「苾芻、苾芻尼應平等分,若求寂男、求寂女三分與一,式叉摩拏二分與一,欲受戒人亦二分與一,如是應知。」

## 第四子攝頌曰:

憍薩羅白氎, 佛子因飡麨,

室利笈多緣, 廣論營造事。

爾時世尊與千二百五十苾芻,於憍薩羅國人間遊行,遇至一村。時有長者,請佛及僧并常隨徒眾就舍而食。時有六十苾芻尼,人間遊行亦到此村,巡家乞食至長者宅,亦請受食。時彼長者供佛僧已,便以白氎千二百五十張安上座前,諸苾芻等不知云何分其施物?時六十尼作如是語:「我等前已得半施物,今者亦應持半與我。」以緣白佛,佛言:「苾芻與尼計人分施,不應中半。」

復有長者請佛及僧就舍而食,諸苾芻等時至赴食,唯獨世尊不赴其請,令使請食寺內而住。佛有五因緣不往赴請,廣說如常,今欲為諸弟子制其學處。時彼長者敬重耆宿,行與上酥并酥煮餅,中年行油煮餅,至於下行,與油麻滓并麻滓煮菜。時具壽羅怙羅親為世尊取其鉢食,持至佛所,禮雙足已於一面坐。諸佛常法於取食者歡言慰問:「彼苾芻等得美好食不?」羅怙羅白佛言:「諸僧伽等得好

美食,極是豐足。」世尊告曰:「汝今何故身形羸瘦?」時羅怙羅 說伽他曰:

「食油能有力, 酥乃足光暉; 麻滓及菜蔬, 何能有色力?」

佛告羅怙羅:「問汝身瘦,因何便以食事答我?」羅怙羅具以上事而白世尊,佛言:「誰為僧伽上座?」答言:「是我鄔波馱耶。」佛告羅怙羅:「汝師舍利子,此是惡食不名善食,何不觀察中下座食。」佛告諸苾芻:「僧伽上座所有行法,我今制之。為上座者,初見行食人來,應先教長跪合掌唱三鉢羅佉多。上座即應告言:『可平等行。』」時彼見行美菜餅等事事來時,咸作是語便成廢闕。世尊告曰:「創始行鹽即須報言:『可平等行。』無煩一一。若違所制得惡作罪。」時具壽舍利子,聞世尊說不名善食,遂便以指抉吐其食。

具壽鄔波離白世尊言:「舍利子所受之食彼便吐出。」世尊告曰:「汝諸苾芻!非但今日我鄙其食彼便嘔出,於過去世我鄙其食當時已吐。汝今應聽!昔有婆羅門,常為唱讀,共一婆羅門童子遊行人間,至一聚落。彼便置此童子,於聚落外息在池邊,語言:『汝今於此可暫時住,我入村中乞求麨食。』童子遂住。時有旃荼羅種,來至池邊就水食麨。時彼童子見而告曰:『丈夫!仁可惠我少多麨食。』便報童子曰:『可縫葉器。』即便縫葉。時旃荼羅以麨授之。是時童子見麨潤膩,即報彼曰:『此麨何故潤膩?』答曰:『膩器盛麨因斯帶潤。』是時童子尋食其麨。彼婆羅門從村來至,告童子曰:『汝今亦可入此村中乞取麨餅。』童子告曰:『我已食麨。』彼便問曰:『何處得耶?』答曰:『於旃荼羅處得。』婆羅門曰:『此是不淨惡人,汝何取麨?』時婆羅門遂生嫌賤。時彼童子即便吐麨。」佛告諸苾芻:「汝等勿生異念,彼時唱讀婆羅門者,即我身是。彼童子者,即舍利子是。往時由我吐其麨食,復於今日為我訶責,還吐出食。」

爾時佛在王舍城羯闌鐸迦池竹林園住。時彼城中有一長者名室利笈多,元是露形外道門徒,即是聚底色迦姊妹夫也。其聚底色迦深信三寶,作如是念:「我今宜可勸室利笈多,知佛僧伽是上福田。」即便告曰:「佛及眾僧,汝能設食親供養者,獲福無量。」彼便告曰:「今我供養佛及僧者,汝亦為我請晡爛拏及彼弟子設食供養。」時聚底色迦便作是念:「我今若其不見許者,遂令彼人於勝福田有大損失,普施一切此復何違。」即許為請。時室利笈多復生是念:「我若先請沙門喬答摩就舍食者,彼聚底色迦後不肯請晡爛

拏及諸弟子而設其食。」遂報彼曰:「爾可先請晡囑拏等就舍而 食,我於次後請佛僧伽而申供養。」即便許之,尋往晡曬拏處,廣 申言論情歡喜已,遂便告曰:「仁者晡囒拏及諸弟子,願至明日就 我舍食。」時晡囒拏便生是念:「豈非此人於沙門喬答摩處,見有 過失情不信樂,今於我所起殷重心。我於今者獲大利益,又此先祖 是我施主,今復歸向正是其官。」即便受請。時聚底色迦即於其夜 營辦飲食,敷設座席安置水盆。晨朝遣使。往晡囒拏處白言:「時 至飲食已辦,唯願知時。」時室利笈多告晡欄拏曰:「聖者知不? 然沙門喬答摩,但有俗舍來請命時,創到彼門,先以右脚蹈其門閫 便現微笑。有侍者阿難陀即偏袒右扃、右膝著地、合掌請曰:『大 德!大聖如來及如來弟子,非無因緣輒現微笑。大德!此等有何因 緣?』彼便答曰:『如是,阿難陀!非無因緣輒便微笑,然佛所至 之處皆為授記,能令大眾發敬信心。仁等今往聚底色迦處入彼舍 時,應如是作,亦復能令大眾生敬信心。』」即然其事。時晡闡拏 及諸弟子圍繞而去,詣聚底色迦住處,既至彼已到其門閫,遂開口 大笑,時露形弟子頂禮其足,合掌問曰:「大德!非無因緣如是勝 人輒開口大笑。」彼便告曰:「其實如是,非無因緣。我以天眼觀 見,無醉池側有雄獼猴,逐雌獼猴隨後而走。是時脚跌從樹顛墮, 因即命終。今我念曰:『如此之畜無識有情,為鄙欲故受大憂 苦。』」時聚底色迦聞此語已,遂作是念:「此婬女兒,向針行裏 更欲賣針。我今折挫令其改肅。」即為晡闡拏及諸弟子敷設妙座, 以上妙飲食滿盛銅鉢,置餅於上,下安雜味,奉露形眾;於晡爛拏 器,下安諸雜味,上以餅覆,而授與之。彼便念曰:「我是教主合 受好食,如何長者而不見與?」長者請曰:「何不食耶?」彼便告 曰:「此但有餅無雜味,宜可將來。」是時聚底色迦(舊云樹提伽者, <u>\*\*也</u>)長者即於其前,說伽他曰:

「應合見者不能見,不合見者許言明; 尚覩池側獼猴死,如何不見椀中羹?」

是時長者,於鉢餅下示其雜味。時彼羞愧即自念言:「我被挫折, 待少食訖,我為呪願,令現在未來所設福業空無果利。」彼既食 罷,即為呪願,說伽他曰:

「若人少行惠施時, 及以供養設食時; 此非言難詰責時, 令其善福皆無報。」

時聚底色迦長者有守門人,既聞事已便作是念:「斯無智人受我舍食,妄陳呪願令無果報。此婬女兒,我今料理令其落節。」彼遂當門傾穢水瓨,復拽門關令其半出。時晡闡拏尋並出門,俱被泥澾遂便倒地,頭觸門關打破流血。時守門人說伽他曰:

「正是門關抽出時, 及以穢瓨傾水時; 打破其頭血流時, 此時善福還無報。」

時晡闡拏持其流血,詣室利笈多處。時彼見已問言:「大德!何意 頭破流血若斯?」答曰:「被聚底色迦長者躓頓於我。」即便告 曰:「仁大有幸存命出來,我今作計,令彼喬答摩及僧伽眾入我宅 中不活而出。」時室利笈多遂生是念:「我今宜往喬答摩處請其受 食,彼若定是一切智人,必不受請;如非一切智即便見許。」時室 利笈多即往佛所,共相問訊在一面坐,復從座起請世尊曰:「佛及 僧伽,頗能明日就我舍內,受一食耶?」 根本說一切有部目得迦卷第七

大唐三藏法師義淨奉 制譯

第四子攝頌室利笈多之餘

爾時世尊便生是念:「此室利笈多,由於我處當見諦理,又彼意亂 造諸惡行。若不受請,與彼聖諦而為障礙,我宜受請。」爾時世尊 默然而受。室利笈多即生是念:「此喬答摩非一切智,此是怨家我 當返報。」彼即還家,便於夜半在門屋中掘作大坑,於其坑內燒炎 炭聚,既絕烟焰將物棧之,覆以青草。復於其上更布薄土,便於食 內置諸毒藥。時聚底色迦妹是笈多妻,見而問曰:「仁今欲何所作 答?」曰:「擬殺怨家。」即問彼言:「誰為怨家?」「沙門喬答 摩即其人也。」妻曰:「若佛大師是怨家者,誰當得作爾親友 乎?」時彼笈多便作是念:「此是彼親生來一處,於沙門喬答摩情 深敬重,將無發露我密事耶?」便令入一小室反鎖其門。即命脯囑 拏及無衣眾:「仁等可集看害怨家,我欲殺彼喬答摩眾,已設火坑 食內安毒。」時諸外道昇閣而坐,共相告曰:「我於此處觀喬答摩 被火燒害,復看食毒悶絕之時顛蹶于地,令我門徒悉皆快意。」時 室利笈多,晨朝起已敷設座席,安置水瓮楊枝澡豆已,命使者曰: 「汝可往詣喬答摩處傳我言曰:『喬答摩來,食已辦訖官可知 時。』」是時使者既承教已,詣世尊所禮雙足已,請世尊曰:「長 者室利笈多作如是語:『飲食已辦,具陳白佛。』 | 爾時世尊命具壽阿難陀曰:「汝應遍告諸苾芻等,不得一人輒爾在 前入室利笈多舍,待佛先入餘隨後行。」時具壽阿難陀唯然受教, 即往諸苾芻所具傳佛教。爾時世尊於日初分,著衣持鉢,與諸苾芻 將欲詣彼長者住宅。是時竹林園內舊住天神,禮佛足已請世尊曰: 「願佛莫入室利笈多舍。何以故?彼有惡意欲害如來,造逆害事作 諸罪業。」佛告天神:「諸無利事我已斷除,彼復何能作其逆 害?」天曰:「彼有惡意,門掘大坑滿中積火欲害如來。」佛告天 神:「一切欲火、瞋火、癡火,我以智水今皆沃滅,於世間火何能 為害?」時彼天神復白佛言:「彼以毒藥置在食中欲害如來。」佛 告天神:「於諸欲毒瞋毒癡毒,我以智阿揭陀藥,已變吐棄出,諸 餘凡毒何所能為?」爾時世尊次入王舍城,彼城天神禮世尊足: 「伏願如來,莫入室利笈多舍。」乃至廣說問答如上。 爾時世尊詣室利笈多宅,既至門所時,彼宅中舊住天神,禮佛足已 而白佛言:「唯願如來,莫入此宅。」乃至廣說如上。時長者妻在 幽室中作斯念曰:「准計今時佛到第一門,又計今時至第二門,以 其雙足俱蹈火坑。又計今時世尊大師身陷火坑。禍哉如來!今被煙

薰咳嗽流淚,猛焰纏身衣隨火化。」時彼女人多說苦辭迷悶而住。 是時世尊既至中門方欲舉足,鉢頭摩花從坑踊出,時正遍知安庠舉 足,蹈彼蓮花入笈多宅內。是時笈多見是事已生希有心,即便告彼 脯爛拏曰:「請觀世尊神通變現。」彼告長者曰:「汝今隨順喬答 摩所為幻術。」長者曰:「縱令幻術,仁等若具一切智者,亦可試 作如是幻耶?」時彼露形外道,懷羞帶怖俯面視地曲躬而出。是時 長者深懷愧赧,不能見佛,便詣妻處告言:「賢首!今可出來禮世 尊足。」彼便答言:「何有世尊?汝與惡人已殺如來。」時彼長者 答言:「賢首!誰有能得害如來者?然我羞愧不能見佛。」其妻遂 出,即將長者詣世尊所,俱禮佛足。是時長者縱身伏地不能重起 云:「我何面敢覩尊顏?」妻乃合掌低頭白世尊言:「願佛慈悲, 容恕長者無間地獄極重之愆。」世尊告曰:「汝今可起,我已容 恕。」彼便歎言:「如來、應、正等覺實無違順。」長者即從地 起, 歡喜踊躍如死重穌, 而白佛言: 「唯願大悲少為停住, 我當辦 食。」佛言:「長者!豈非遣使已白時至作如是語:『喬答摩來, 食已辦訖,宜可知時。』」答曰:「實有斯語。大德!我於世尊作 無利事。」佛言:「我已悉斷諸無利事,汝復何能作無利益?」白 言:「世尊!我將毒藥已置食中,欲害如來及諸聖眾。」佛告長 者:「貪欲瞋癡諸毒中火我已除棄,餘何在言?食若熟者應持供 養。」

爾時世尊就座而坐,所有供食置上座前,佛告具壽阿難陀曰:「汝 可遍語諸苾芻等:『若未唱三鉢羅佉多已來,不應一人輒先受 食。』」時具壽阿難陀如佛所勅,告諸苾芻:「次遣一人於上座 前,唱三鉢羅佉多。」由是力故,於飲食內諸毒皆除。是時長者便 自行食,初從上座終至下行,周遍觀察作如是念:「奈何今日從老 至少,被毒所中悶絕于地,唯有世尊少動容色,然此眾中竟無一人 為毒害者。」既見此已深起信心,夫婦二人見食事了澡漱復訖,即 取卑座在佛前坐為欲聽法。爾時世尊觀彼二人,隨其根性為說法 要。既聞法已,以智金剛杵破二十有身見山,證預流果。既獲果 已,白言:「世尊!今此所證非我父母等之所能作,乃至受三歸生 淨信。」廣說如上。白言:「世尊!我從今已往,於諸外道若男若 女,永閉其門,於佛僧眾及鄔波索迦鄔波斯迦等,長開其戶。」世 尊令彼得見諦已即便起去,還本住處安庠而坐告諸苾芻:「僧伽上 座所有行法,我今制之:凡於眾首為上座者,所有供食置在眾前, 先令一人執持飲食,或先行鹽在上座前曲身恭敬,唱三鉢羅佉多, 未唱已來不得受食。當知此言有大威力,輒違受食得惡作罪。(三鉢 羅佉多,譯為正至,或為時至,或是密語神咒,能除毒故。昔云僧跋者,訛也。佛

教遣唱食前,今乃後稱,食遍非直,失於本意。上座未免其愆,訛替多時,智者詳用)<sub>1</sub>

佛在室羅伐城。時有長者,造一住處修營纔半便即命終。長者之子 次紹家業,諸苾芻等就長者宅告其子言:「賢首!汝父造寺功已將 半,不幸命終,所有殘功汝可修造。」彼便告曰:「阿遮利耶!寺 極宏壯我無力造,若佛見聽減小作者,我當營造。」時諸苾芻以緣 白佛,佛言:「不能大造聽其小作。」復有俗人造一住處未了而 終,子繼父業,時諸苾芻同前告子,子言:「我愛宏壯,若聽大者 我當為作。」佛言:「隨情大作。」復有長者,造小窣覩波造半命 終,子知家業,時諸苾芻往詣宅所告其子言:「賢首!汝父先造窣 想波,功已半訖遂便命終,所有殘功汝宜修造。」彼便告曰:「聖 者!我愛壯麗,此塔形小,若佛見聽增大作者,我當修造。」以緣 白佛,佛言:「如樂大者隨意大作。」復有長者,造大窣覩波,其 功已半忽然命過,同前告子,子言:「我今貧乏不能大作,若聽小 者我當作之。」佛言:「隨情小作。然造窣覩波,小者得增大,大 者不應減小。若有俗人能大作者善,如不能辦,苾芻應可勸化助 造。」若塔相輪久故破壞,佛言:「應可修營。」時有先下故輪更 造新者,時久不成,佛言:「不應先下,造新者訖,方下故輪。」 若佛形像泥塐虧壞, 苾芻牛疑不敢營飾, 佛言: 「或增令大, 或可 相似隨意而作。」諸彩畫壁不分明者, 苾芻生疑不敢重畫, 佛言: 「應可拂除更為新畫。」諸餘葉紙佛經磨滅,苾芻生疑不敢揩拭, 佛言:「應拭故者更可新書。」

第五子攝頌曰:

從像入城中, 受吉祥施物,

旗鼓隨情設, 苾芻皆不應。

爾時佛在室羅伐城。是時給孤獨長者請世尊曰:「我欲奉請贍部影像來入城中廣興供養。」佛言:「長者!今正是時。」彼諸苾芻不知誰當從其像入?佛言:「少年苾芻皆可從入。」于時眾少不甚嚴麗,佛言:「應令五眾:苾芻、苾芻尼、正學女、求寂男、求寂女侍從圍繞。」時有淨信婆羅門及諸居士等,以上妙瓶持吉祥水,注苾芻手并授施物,曾無一人輒敢受者,世尊告曰:「長宿耆年諸苾芻輩,應展右手受吉祥水并受施物。」時諸苾芻無有鼓樂引像入城,佛言:「應鳴鼓樂。」鄔波離白佛言:「如世尊說:『應鳴鼓樂』者,不知誰當作之?」佛言:「令俗人作。」復白佛言:「苾芻頗得鳴鼓樂不?」佛言:「不合,唯除設會供養。」佛時告樂人曰:「仁者,汝今應可供養大師,不應無故擊鼓作樂,作者得惡作罪。」

第六子攝頌曰:

# 豫先為唱令, 五眾從行城, 應差掌物人, 尼無別輪法。

爾時薄伽梵在室羅伐城。世尊既許形像於節會日行入城中,時諸婆 羅門居士等共告苾芻曰:「阿遮利耶!形像雖入,我等不知。聖者 豫先為告,今者我等隨力,各辦上妙香花吉祥供養,修治道路嚴飾 城隍,瞻仰尊儀式修景福。」時諸苾芻以緣白佛,佛言:「去行城 時七八日在,應可唱令普相告知:『至某日某時將設法會,仁等至 時各隨己力具辦香花,於某伽藍咸申供養。』」于時雖在街衢而為 告令,時諸人眾尚有不聞,以緣白佛,佛言:「當於紙素白氎明書 令詞,可於象馬車輿之上街衢要路宣令告知。」至行城日無多侍 從,佛言:「應令五眾圍繞隨從而行。」時有淨信婆羅門居士等, 以諸雜物施與苾芻,苾芻不知此物誰應合受?如世尊說:「長宿耆 年諸苾芻等應可受之。」彼既受已,復自持行,財物既多遂致疲 極。世尊告曰:「應令少壯苾芻而擎其物。」既持至寺積成大聚, 遂被賊偷,佛言:「應可差人守護其物。應如是差,大眾集已先問 彼苾芻云:『汝某甲能為僧伽作掌衣物人不?』答言:『我能。』 次令一苾芻應為白二羯磨:『大德僧伽聽!此某甲苾芻,樂與大眾 作掌衣物人。若僧伽時至聽者,僧伽應許僧伽今差苾芻某甲當與大 眾作掌衣物人。白如是。』次作羯磨,准白應知。 」 是時苾芻多獲施物,苾芻尼眾作如是言:「大德!今獲施物,應分 異時,遂別為朋旅,隨意而行。時諸俗人問苾芻曰:「阿遮利耶! 今此行道為同?為異?」答言:「不同。」俗人告曰:「大師現在 遂破僧輪,不相承禀別為聚會。」時苾芻尼亦獲財利,苾芻以緣白 佛,佛言:「苾芻尼眾不應別作輪行。若有作者,是破僧方便,得 窣叶羅罪。」佛言:「諸苾芻眾所得利物,亦應分與苾芻尼眾,不 與者得越法罪。」

## 第七子攝頌曰:

應差分物人, 上座宜准價, 不得輒酬百, 索價返還衣。

爾時大會事了多獲財物,諸苾芻眾不知云何處分其物?佛言:「應差分物人,當如是差。大眾集已先可問言:『汝某甲!能為僧作分衣人不?』彼答言:『能。』次一苾芻應為白二羯磨:『大德僧伽聽!此苾芻某甲,樂與僧伽作分財物人。若僧伽時至聽者,僧伽應許僧伽今差苾芻某甲當與眾作分財物人。白如是。』羯磨准白應作。」

時分衣人,敷座席鳴揵稚為言白已,後集僧伽賣所得衣。苾芻不知 誰應賣衣?佛言:「僧伽上座應准衣價。」是時上座遂貴准衣,更 無人買,佛言:「初准衣時應可處中,勿令太貴太賤,初准即與。」佛言:「不應待其價極方可與之。」時六眾苾芻,見他准價故增衣價,及至與時,便作是言:「我不須衣,欲為大眾多增衣價。」佛言:「若眾賣衣,其不買者不應故增其價。若故增者得惡作罪。」是時六眾增價得衣,便即披著。見索價直,即還本衣,佛言:「未還價足不應著衣。若未還價而著衣者,得惡作罪。」第八子攝頌曰:

寺大減其層, 將衣者應用, 恐怖若止息, 准式用僧祇。

如世尊說:「苾芻造寺應為五層,香臺應可七層,門樓亦作七層。 苾芻尼造寺應為三層,香臺、門屋並各五層。」者,由其重大遂便 頹毀。苾芻以緣白佛,佛言:「應除上層。」由尚頹毀,如是漸次 應留以堪為限。從佛世尊現大神通已後,敬信之人乃至邊方亦皆造 寺,苾芻住已遂被驚怖。時諸苾芻並皆逃竄,時有賊來盡收衣鉢, 令諸苾芻並闕衣服。以緣白佛,佛言:「僧伽臥具不應令失,如要 須去應可持行。」時一苾芻見怖緣至,持僧祇帔與諸苾芻相隨而 去。既至日暮,有耆宿苾芻告言:「具壽有僧祇帔,我既年大准次 合得,汝應與我。」即便持與,彼取而臥。至天明已告言:「具 壽!可取帔去。」下座答言:「若須披著即准耆年。」「有怖持行 不論年幾,此僧祇帔可自持去。」以緣白佛,佛言:「將去者應 用。」後時怖息,苾芻告曰:「此是僧物因何獨用?」答言:「佛 教令我受用。」佛言:「我據怖時,暫聽受用僧祇臥具;恐怖既 除,應如常式。」

第九子攝頌曰:

若有大聚會, 鳴鼓集眾僧, 眾大別為行, 撿挍人先食。

爾時佛在室羅伐城,給孤獨長者請世尊曰:「我欲於逝多林設大法會,願見聽許。」佛言:「今正是時。」於設會日,六大都城諸苾芻等咸悉來集,人眾既多遂失時候,佛言:「應打揵稚。」雖打揵稚眾鬧不聞,佛言:「應擊大鼓。」聞鼓聲時,應集食處,時諸苾芻可隨大小依次而坐。行飲食時未至行末,日遂過午,時諸苾芻多有絕食。佛言:「人眾若多,應須量准別作行頭,各於上座安置飲食,可一時行。」然諸俗人行餅果時,不能平等,佛言:「應差苾芻看行餅果。」彼既差已受取而行,存意觀察令其周遍,然此苾芻待眾食已,時過絕食,佛言:「若撿挍人,應於齋食先取其分,食之無過。」

第十子攝頌曰:

凡於尼眾首, 應安一空座,

#### 為待餘苾芻, 孤苦勿增價。

爾時佛在室羅伐城。時有眾多苾芻尼,人間遊行遇至一村。時彼村 中有一長者,情懷敬信,請諸尼眾就舍而食。時窣叶羅難陀苾芻 尼,親為上座。是時有一乞食苾芻,共諸商旅遊歷人間,至斯聚落 巡門乞食。時有村人告言:「聖者!有諸尼眾,在長者家受其供 養,仁今可往就彼受食。」聞已詣彼,時苾芻尼白言:「尊者!大 眾食竟,能為呪願及以說法,應居上座。若不能者,可在一邊食罷 而去。」時彼苾芻赧然思曰:「我待食了說法方行者,時既延遲恐 失商旅。」遂於一邊食了而去,漸至室羅伐城。時諸苾芻見而告 曰:「善來!善來!具壽!所有遊歷安樂行不?」答曰:「寧有安 樂,被苾芻尼深見倰辱。」問言:「何意?」即便具告。諸苾芻以 緣白佛,佛言:「若一苾芻、一苾芻尼,然此苾芻官居上首,應先 受水及受其食,或二、或三乃至眾多苾芻尼處,若一苾芻亦為眾 首,應先受水及以受食。凡苾芻尼所食之處,於上座首留一座處, 假令求寂在後來至,就座而食,是上眾故。若不爾者,諸苾芻尼得 越法罪。」時給孤獨長者,於逝多林設大會已,妻妾男女悉捨與 僧,時諸苾芻不知云何?以緣白佛,佛言:「應問長者。」彼既問 已,長者答言:「應可准價賣之。」苾芻共准。是時六眾爭共上 價,有一孤苦女人,見增其價遂生愁怖,白長者言:「我是孤苦勿 見遺棄。」時諸苾芻以緣白佛,佛言:「孤苦女人性多愁怖,汝諸 苾芻!不應增價而買。若增價者得惡作罪。應隨施主敬信淨心,所 論酬直當為受取。 」

# 目得泇第三別門總攝頌曰:

資具衣愚癡, 若差不用俗;

正作長者施, 剃刀窣覩波。

餅酪葉承水, 及洗鉢等事;

此之千二頌,總攝要應知。

## 第一子攝頌曰:

十三資具物, 牒名而守持, 自餘諸長衣, 委寄應分別。

爾時佛在室羅伐城。時諸苾芻人間遊行,時有苾芻忽然遇病既乏醫藥,遂即命終。時諸苾芻以緣白佛,佛言:「從今已往制諸苾芻畜藥直衣。若遇病時賣以充藥。」如世尊說:「制諸苾芻畜藥直衣。」者,時諸苾芻得已浣染守持而畜,後時買藥全不得價。以緣白佛,佛言:「其藥直衣不應浣染。應持新氎并留其繢。(西國畜白

**氈一雙,此方當絹一匹也**)」

時具壽鄔波離白佛言:「如世尊說:『諸苾芻等守持三衣,世尊復 開畜藥直衣。』者,不知云何?」佛言:「我今開許諸苾芻等得畜 第二子攝頌曰:

癡不了三藏, 此等十二人; 失性復本時, 訶言應採錄。

具壽鄔波離請世尊曰:「有幾種人不應訶言不採錄?」佛言:「有 十二種人。云何十二?一者愚,二者癡,三不分明,四不善巧,五 者無慚,六有瑕隙,七界外住,八被捨棄,九言無次緒,十捨威 儀,十一失本性,十二授學人。」復問:「世尊!有幾種人應 訶?」佛言:「有其三種:一者住本性,二言有次緒,三不捨威 儀。」「云何是愚?」佛言:「愚者,謂思其惡思、說其惡說、作 其惡作、說難捨事。」「云何為癡?」佛言:「謂不持蘇怛羅、不 持毘奈耶、不持摩室里迦。不分明者,謂不明三藏教文。言不善巧 者,不善三藏教理。言無慚者,謂於四他勝中隨犯一。戒言有瑕隙 者,謂新作鬪諍或舊有怨。嫌言界外者,謂界外住人。言捨棄者, 謂是僧伽以白四法而為捨棄。言無次緒者,謂作妄語離間麁擴雜亂 語。言捨威儀者,謂捨本座。言無次緒者,謂作不應行事於諸學處 不知修習。言受學者,謂是犯重不覆藏人,眾作白四授與令學。」 復白佛言:「失本性人訶羯磨時不須採錄訶不成訶者;如其此人還 住本性,得成訶不?」佛言:「成訶。」

第三子攝頌曰:

若差十二人, 斯語成訶法; 受時言我俗, 此不成折圓。

具壽鄔波離白佛言:「如世尊說:『若為其人正羯磨時,此人許成 訶。』者,大眾差遣十二種人作如是語:『諸大德不應差我。』此 所出言應採錄不?」佛言:「並須採錄。言不成訶者,我據行治罰 時作如是說。」「世尊!如正近圓時,其人自言:『我是俗人。』

此人得成受近圓不?」佛言:「設近圓已,自言是俗,尚失近圓,何況受時!此等皆據有心捨戒。」 根本說一切有部目得迦卷第八

大唐三藏法師義淨奉 制譯

## 第四子攝頌曰:

不用五種脂, 隨應為說戒; 因億耳開粥, 王田眾應受。

爾時佛在室羅伐城。如世尊說:「有五種不淨皮履不應持。」者, 時六眾苾芻用五種不淨脂膏以塗皮履。時勝光王象聞脂氣驚怖挑 奔,是時六眾作如是語:「君等何不捉持此象?」答曰:「我不能 餅果之直。」是時六眾遂向下風,其象即住諸人報曰:「聖者!仁 等解明呪耶?群象驚走我等不禁,仁等如何遂令象住?」六眾報 曰:「我實不解誦持明呪,我等但以上象脂用塗皮履。」「聖者! 王之好象若傷損者,豈非仁等作無利事?」共生嫌賤。時諸苾芻以 緣白佛,佛言:「汝諸苾芻!不應以上象脂膏用塗皮履,若有塗者 得惡作罪。上象既然,上馬師子及以虎豹,悉皆不合。」 爾時佛在王舍城。頻毘娑羅王詣具壽阿難陀處,頂禮雙足白言: 「大德阿難陀!今者豈非聽法之日,復是褒灑陀時,我得聽不?」 答言:「大王!當知褒灑陀者,但是苾芻共所作業,非俗合聽。」 王即起去。然佛世尊知而故問阿難陀:「何故王來而不聽法即便起 去?」彼即具答。佛言:「汝有大失,向者令王得聞此波羅底木叉 者,王必倍生深信恭敬,既生淨信能為信首。是故我今聽諸王等及 以大臣,有淨信心意樂聞者應可為說。」佛言:「若復有人,雖是 尊貴而無敬信,如此之人亦應為說。若有貧人亦應為說,若是貧窮 兼不敬信樂欲聞戒,不應為說。」 爾時佛在王舍城。具壽說籠拏二十億苾芻,從小以粥長養,由出家 後遂不得粥,身體羸瘦痿黃無力。是時世尊知而故問阿難陀曰: 「何故說籠拏二十億身極痿黃羸瘦無力?」時阿難陀以緣白佛,佛 言:「從今聽許說籠拏二十億苾芻隨意食粥。」時阿難陀即傳佛 教,告彼苾芻曰:「世尊開爾隨意食粥。」彼便報曰:「為是總開 大眾?為我一人?」答曰:「唯爾一人。」說籠拏二十億曰:「由 此因緣諸同梵行譏誚於我:『汝說籠拏二十億,今者出家大有所 獲, 昔在占波巨富無匹, 捨七象王而為出家, 乃於今時唯求薄 粥。』世尊若許因我開聽大眾食粥,我亦隨食。」時諸苾芻以緣白 佛,佛言:「我今因說籠拏二十億為先首故,聽諸大眾咸悉食 粥。」是時淨信婆羅門居士等,多持好粥施苾芻等。時影勝王聞佛

聽諸苾芻隨意食粥,王以千畝良田奉施大眾。諸苾芻不敢受田,以緣白佛,佛言:「為僧伽故應可受田,所收果實眾應受用。」第五子攝頌曰:

俗人求寂等, 並不合同坐; 兩學有難緣, 同處非成過。

爾時佛在室羅伐城,具壽鄔波離請世尊曰:「凡諸苾芻合與俗人同蔣坐不?」佛言:「不合。必有難緣,同坐無犯。」復白佛言:「得與求寂同座坐不?」佛言:「不合。若與小者及半擇迦污苾芻尼、并犯五逆、外道趣外道者、賊住、別住、不共住人等,亦不合同座。必有難緣,同座無犯。」又問:「得與授學人同蔣坐不?」佛言:「不應。必有難緣,隨意同坐。」「得與俗人同枯床一處坐不?」佛言:「不應。必有難緣隨意同坐。如是乃至不共住人咸悉不合,必有難緣同坐無犯。若同床坐廣說如前,若屈氈席以為障者,坐亦無犯。」

第六子攝頌曰:

正作不令起, 隨年坐染盆; 應共護僧園, 勿燒營作木。

爾時佛在室羅伐城。時諸苾芻坐小床座,作浣染縫衣治鉢等事。是 時六眾苾芻推起自坐,令他廢闕。時諸苾芻以緣白佛,佛言:「浣 染等時苾芻正作,不應令起,遣他起者得惡作罪。」六眾苾芻凡所 至處,自恃上座排他令起,時彼苾芻不肯為起,以緣白佛,佛言: 「應隨年次依位而坐。」如世尊說:「隨年坐。」者,六眾苾芻見 他食時,自在後至遂令他起。時諸苾芻以緣白佛,佛言:「若彼苾 芻正食之時,上座後來不令小起。令他起者得惡作罪,可隨處坐 食。」具壽鄔波離白佛言:「如世尊說:『正食苾芻不應令起。』 不知齊何名食時?」佛言:「下至受鹽或受食葉,皆不合起。」如 世尊說:「苾芻受食不應起。」者,六眾苾芻向上座處故先受食。 時諸苾芻以緣白佛,佛言:「不應先往上座頭坐故為受食,作者得 惡作罪。凡諸苾芻,應善知座次。」僧伽所有貯染汁項及諸盆器, 有一苾芻先取染衣, 六眾苾芻作如是言: 「具壽!我年長大先合用 之。」瀉却染汁強奪將用,令彼苾芻事便廢闕。以緣白佛,佛言: 「但是僧伽煮染之器及以染盆,他正用時不應強奪,事訖方取。未 了取者咸得惡作。」如世尊說:「染器污時不應取。」者,是時六 眾纔染片衣,故令汁污,意留染器妨彼受用,佛言:「若總以衣內 染色中,方名染污,不應少物故作留礙,如有犯者咸得惡作。」 緣處同前。時給孤獨長者,作其木柵圍逝多林。時諸俗人毀破木柵 盗將草木, 苾芻以緣白佛, 佛言: 「令人遮護。」既令遮護棄木逃 去,無人採拾咸悉爛壞。時諸苾芻以緣白佛,佛言:「壞無用者,

可入僧厨以充薪用,餘堪用者取付作人。」時六眾苾芻,隨其營作所堪用木,並破燒壞以充煮染。時諸苾芻以緣白佛,佛言:「苾芻不應燒營作人要須雜木。如有犯者得惡作罪。」 第七子攝頌曰:

長者所施物, 問已應留舉; 隨處莫廢他, 洗身方入寺。

爾時佛在室羅伐城。時給孤獨長者請世尊曰:「佛聽許者,我今更 欲以逝多林重施僧伽。」佛告長者:「隨意應作。」時彼長者,於 逝多林內所有樹木,是男聲者,則為男子衣服而嚴飾之。女聲樹 者,作女人服而為嚴飾。乃至寺中庭、經行處、門屋下、浴室內、 眾食堂、供病堂、常食堂,悉皆如是為嚴飾已,捨與僧伽。時諸苾 已,長者答曰:「隨所施處物應屬彼。」佛言:「是男女聲樹,乃 至遍寺所有衣服,隨其處所各以箱篋藏舉。若於後時,逝多林內人 作大會, 還隨其處准前嚴飾。在牆壁者, 應將畫壁。若在溫煖堂, 應買薪以充然用。在浴室者供洗浴事,在貯水堂者以充大眾。時非 時漿用,若在供病堂,應與作美膳供養。或時近院或復樓閣簷前、 經行處或近門邊,現前僧應分。若寺中庭內者屬四方僧用。 」時諸 芯 
多作斷惑禪堂靜慮之處,修諸善品。是時六眾來至此堂,喚他令 起云:「我耆年。」時諸苾芻以緣白佛,佛言:「不應於此而作隨 年、令他苾芻輒為起動。若令起者咸得越法罪。」時諸苾芻從座而 起暫去經行,六眾遂來坐其座處令他廢事,佛言:「他先坐處不應 **輒坐,汝等苾芻欲經行,時先以綺帶或僧脚欹留安坐處然後經** 行。」復有苾芻,於廊庭柱打拍皮鞋,有餘苾芻見而嫌恥,以緣白 佛,佛言:「道行軌式我今當制。凡諸苾芻道路行時,欲須入寺隨 有水處,安置衣鉢抖擻衣已,次浴身體下至手足,洗灌塵垢添淨水 瓶,方以破布拂拭皮鞋,然後披衣容儀詳審,徐行入寺。」 第八子攝頌曰:

剃刀并鑷子, 用竟不應留; 便利若了時, 無官室中住。

如世尊說:「剃刀鑷子應隨畜。」者,六眾苾芻自取僧伽剃刀鑷子,剃髮既竟他取不還,報云:「後時我更須用。」時諸苾芻以緣白佛,佛言:「汝等苾芻,用眾刀訖不應便留。用刀既然,石鑷刀子及承足物,應知亦爾。」六眾苾芻入小便室,事既了已仍住室中,餘人欲入而故遮止,告言:「莫入!我當在後更擬小便。」故惱於他令生嫌恥。以緣白佛,佛言:「小便若了不應久住,更停住者得惡作罪,於大便處故惱他人,得罪亦爾。」第九子攝頌曰:

窣覩波圍繞, 廣陳諸聖迹; 濁水隨應飲, 若醎分別知。

爾時給孤獨長者請世尊曰:「我於如來髮爪窣覩波處欲為莊嚴,若佛聽者我當營造。」佛告長者:「隨意應作。」長者不知云何而作?佛言:「始從覩史多天下生贍部,化導有情乃至涅槃,本生聖跡隨意應作。」時諸苾芻隨路而去,見有水渾生疑不飲,佛言:「水中見面應可飲用,若不見面須人授飲;如極渾者,應取羯得迦果葡萄果投中待清,或可以麨而內水中。」諸苾芻便投散麨,佛言:「宜應以水作團投之。」時有醎水生疑不飲,佛言:「若堪作鹽用,受而方飲;若不堪者自取而飲,勿致疑惑。」

第十子攝頌曰:

飯酪等非污, 亦可內瓶中;

洗足五種瓨, 齊何名口淨。

葉手承注口, 多疑流鉢中;

舉糧持渡河, 縱觸非成過。

洗鉢應用心, 他觸問方受;

換食持糧等, 無難並還遮。

爾時佛在室羅伐城。時有婆羅門及諸居士於逝多林相去不遠芳園之 内共為讌會,有諸殘食棄在井中。時諸苾芻欲取水用,以羅濾漉, 於水羅中見有飯粒。苾芻生疑不用。并貯水瓨亦生疑念,以緣白 佛,佛言:「不由彼緣便成不淨。瀘即成淨,不應棄水。」又諸苾 **蜀池中取水,遂見有人洗酥油取及以酪瓶。復有芯芻手執膩鉢亦於** 此洗,膩浮水上漂汎而住,酪瓶餘滓片片下沈。時彼苾芻疑不敢 用,以緣白佛,佛言:「非彼能令水成不淨,瀘即是淨,用之無 犯。」時諸苾芻隨路行時水極難得,至汲水輪所欲取其水,心疑不 淨,因此闕事極生疲苦,方入寺中。時諸苾芻以緣白佛,佛言: 「可取其水,先應觀察澡漱口已隨意而飲。」或在非時亦不敢飲, 佛言:「非時亦飲。」不貯瓶中,佛言:「應貯。」時諸苾芻,於 道行時無水可得,崩崖泉水疑不敢飲,以緣白佛,佛言:「應觀而 飲。」或於非時疑不敢飲,佛言:「非時應飲。」不敢添瓶,佛 言:「應添。」時諸苾芻見黃潦水,疑不敢飲,佛言:「縱令水濁 觀之隨飲。」或在非時亦不敢飲,佛言:「時與非時飲用無犯,添 貯瓶中亦皆無犯。」於行路時,見皮囊貯水有其酪片,疑不敢飲。 時諸苾芻以緣白佛,佛言:「時與非時隨意飲用。汝等苾芻,於急 難時我所開者,若無難時並應遮止。若更用者咸得惡作罪。」時有 眾多苾芻,遊行人間至牛營處,求水不得,彼以酪漿用充洗足,生 疑不用。時諸苾芻以緣白佛,佛言:「無水之處若與酪漿,應持洗 足。」時彼復往牧牛人處,從借瓶器欲將取水。苾芻借得酥油之

瓶,疑不敢用,事有闕乏。佛言:「汝等苾芻應知有五種瓨器:一者大便器,二者小便器,三者酒器,四者油瓨,五者酥瓨。前之三器不應貯物,設令貯者遠可棄之。後之二瓨應以火燒、或以鹵土、或用牛糞淨洗,瓨則成淨可用貯水,時與非時隨意飲用。」時有苾芻飲非時漿,喉中膩氣遂即變出,生惡作心,世尊告曰:「先淨洗手次漱脣口,既漱口已方可飲漿。」如世尊說:「淨漱口」者,時諸苾芻便用鹵土以揩脣吻,因即皴裂,佛言:「應用牛糞淨洗脣口。」

鄔波離白佛言:「如世尊說:『應淨口』者,齊何名淨?」佛言:「有染之口此亦何能令成無染?應以乾淨牛糞撚之令碎,或以澡豆和水揩脣除食膩氣。復以兩三掬水再三漱口,即名為淨。凡諸苾芻若飲若噉,時與非時並應如是然後方飲。如不爾者,隨飲隨咽咸惡作罪。」

復有芯器於非時中以手捉瓶向口注水,蟻先入瓶出便被螫。時諸芯 **蜀以緣白佛,佛言:「不應以瓶注口飲水,先淨洗手及淨漱口,方** 注瓶水手承而飲。」又復苾芻應作盛君持籠,時彼不知以何物作? 佛言:「應用版木或以塼石安置水瓶不令虫入。」如世尊說:「先 淨漱手方飲水。」者, 道路行時有少許水, 佛言: 「可於<mark>葉</mark>中 飲。」見是青葉無人摘授,佛言:「枯黃落葉自取飲水。」或時落 葉求亦不得,就枝以葉承水飲用,或連條葉轉更難求,佛言:「應 就屏處淨漱口已,以瓶注口隨意而飲。」其開遮事廣說如前。 時具壽頡離跋底,隨在何處生疑惑心,是故時人遂共號為多疑頡離 跋底,見彼瓶水流注下時,生如是念:「他人瀉水連注鉢中,豈非 惡觸?」遂便不受。時諸苾芻以緣白佛,佛言:「凡諸流物皆悉向 下,不能向上,此應受用,勿生疑惑,並皆無犯。如是乳酪漿等, 准此應知。」乃至佛言:「勿生疑惑。」時有苾芻共諸商旅隨路而 行,令諸求寂持其路糧在後而來,暫停欲去,告苾芻曰:「為我擎 舉。」時諸苾芻不敢擎舉,以緣白佛,佛言:「應為擎舉。」彼復 下。」後時求寂持其道糧隨路而去,負重疲困復白苾芻:「暫為持 去,我當歇息。」苾芻不肯,佛言:「可以繩繫令求寂執繩,可為 擎持令其暫息。」後遂牛疑:「我自手解。」遂不敢食,佛言: 「食皆無犯。」

時諸苾芻與諸商旅同路而去,忽被強賊劫奪商人,求寂持糧棄之而走,時諸苾芻不取路糧亦棄而去。彼於後時告求寂曰:「汝今可去取彼路糧。」求寂答曰:「今欲令賊殺我耶?我不能去,仁可自取。」苾芻生疑亦不往取,路糧既乏遂闕行途。以緣白佛,佛言:「宜應自取。」既自持來生疑不食,諸苾芻以緣白佛,佛言:「應

食無犯。」時有苾芻令求寂持路糧欲渡河水,不知云何?佛言: 「應問求寂:『汝能為我持糧并自渡不?』答言:『我但自渡無力 持糧。』 苾芻應助擎持渡河。求寂若言: 『無力自渡豈暇持糧。』 芯芻若能擎彼求寂并持路糧者善。若不爾者,先渡其糧後擎求 寂。」時諸苾芻生疑不食,以緣白佛,佛言:「應食無犯。」 如世尊言:「苾芻於鉢中食。」有一苾芻,洗鉢時見有破處,恐有 所犯,佛言:「應可用心再三淨洗,設有破處此亦無犯。」復有苾 **芻**,洗鉢時於彼隙中見有飯粒,疑不用食,以緣白佛,佛言:「應 以草莛摘去,將水三灌,隨情受用。」復有苾芻用舊熏鉢盛熱汁 時,遂便膩出浮上凝住,生疑不食。以緣白佛,佛言:「應去上 膩,官可食之。」復有苾芻,既洗鉢已置於一處,至第三日而更洗 用,遂即破壞,彼便生疑,鉢燒未熟。以緣白佛,佛言:「洗而應 食。」復有芯芻乞食歸來置鉢而出,更有苾芻,亦乞食來即便以鉢 置彼鉢上。時苾芻見已生疑,以緣白佛,佛言:「若有授食人,受 而方食;必若無人,掠去上食,食便非犯。」 復有苾芻乞食既還置鉢而出,有俗人來遂便觸著,應可問言:「爾 於此食有希望耶?」若言:「我見有蠅、或見草葉拂令去者,應受 而食。」若言:「有希望心為斯觸者。」應可分與受而方食。時有 芯器,乞食來已安鉢一處。復有求寂,乞食後至便持鉢飯置芯芻鉢 食。」如世尊說:「凡諸苾芻若道行時應持糧者。」既無俗人又無 求寂,佛言:「應勸施主。施主亦無,應自持去,後見俗人共換而 食。換處亦無,分為兩分,告俗人曰:『汝取一分。』彼既入手應 告彼曰:『汝取我食我取汝分,換易而食。』」此復難求,以緣白 佛,佛言:「於第一日應須絕食,若至明日如有授人受取而食。若 無授者,自取一彪拳許而食。至第三日還無授者,食二彪拳。至第 四日復無授人,隨情自取飽食無犯。」於後路糧罄盡,見有熟果墮 地,佛言:「應取作淨受已而食。若淨人難得者,設不作淨受已應 食。」授者亦無,佛言:「應可自取,作北洲想持心而食。」樹上 果熟未落地者,佛言:「應自上樹搖振令墮自取而食。汝諸苾芻! 如上開者,並為難緣。若無難時皆悉制斷。若有違者,咸得惡作 罪。」

目得迦別門第四總攝頌曰:

與田分不應, 赤體定物施;

僧衣字還往, 甘蔗果容裙。

第一子攝頌曰:

與田分相助, 車船沸自取; 烏嘴蠅無慚, 制底信少欲。

爾時佛在王舍城竹林園中。時影勝大王以千畝田施與僧伽,時諸苾 **芻雖常食噉捨而不問,遂使良田並生茅荻。時影勝王因自出遊見而** 問曰:「此是誰田並生茅荻?」大臣答曰:「此是大王以千畝田奉 施聖眾,彼收田實不為修理,由此荒廢。」王曰:「豈可僧伽不與 他分。」答曰:「不與。」諸苾芻聞以緣白佛,佛言:「應與俗人 作其分數。」時諸苾芻所有田穀,並與耕人不自取分,佛言:「應 准王法取分。」即便取分。然諸作人既得己分,棄穀而去,佛言: 「應運稻穀令入寺中。」時諸作人先持自分後持寺分,佛言:「先 持寺分,己分方持。」雖後運來賊還偷竊,佛言:「應須掌護,勿 今賊盜。」般運入時唯載僧分,車欲傾覆,喚諸苾芻,願見相助。 時諸苾芻見是僧車,便不敢觸,佛言:「此應相助。」有病苾芻隨 路而去,御車之人告苾芻曰:「聖者!可乘此車。」苾芻生疑而不 敢乘,佛言:「但避車軾,乘去無犯。」又復以船運載其物,船既 突淺,船師告曰:「聖者!願見相助共我推船。」時諸苾芻以是僧 船不敢相助,佛言:「應可助推。」時諸苾芻陸路而去,極生疲 困,是時船主告苾芻言:「可共乘船。」時諸苾芻疑不敢上,佛 **芻曰:「我欲歇息暫來下擔。」苾芻生疑不敢為下,佛言:「應可** 為下。」復有擔人中途疲困,欲求止息告苾芻曰:「為我擎擔暫解 疲勞。」彼諸苾芻疑不為舉,以緣白佛,佛言:「以繩繫擔令持繩 已,方為舉擔。」或時半路棄擔而逃,時有賊來收擔將去,佛言: 「應可持行。」苾芻不知遣誰將去?佛言:「應遣俗人,此若無者 可令求寂,此亦無者苾芻收取。」諸苾芻等疑不敢食,由自手觸。 以緣白佛,佛言:「應食無犯。」僧祇釜鑊然火既多,於中酥酪沸 騰出外,淨人若無恐虛損棄,佛言:「此時淨人不應令去,必有要 緣須出外者,苾芻即應抽却薪火。沸仍不止,應以杓攪。若煮藥時 藥沸騰上,類此應知。汝諸苾芻!我為難緣所開許者,於無難時並 應制斷。若有行者,咸得惡作。」 根本說一切有部目得迦卷第九

大唐三藏法師義淨奉 制譯

## 第一子攝頌之餘

爾時佛在室羅伐城。多有商人,請佛及僧,就園林中設大齋會,商 人持食列在眾前。商客行中忽然火起,彼既見已棄食奔馳。時復臨 中無人授食, 芯芻念曰:「不知云何?」時諸苾芻以緣白佛, 佛 言:「彼諸施主捨心已成,作北洲想自取而食,不應生疑。」時有 烏來厨邊啄食,時諸苾芻疑不敢食,以緣白佛,佛言:「却嘴四邊 食之無過。」苾芻未食鳥復來啄,此又生疑便不敢食,以緣白佛, 佛言:「棄嘴四邊食亦無犯。」時具壽頡離跋底,入廁室中,見有 諸蠅唼其不淨,復向厨內而污飲食,白苾芻言:「我於廁內纔見此 飛蠅,行處非處亦不成穢,官應食之。」苾芻染衣見有眾家酥油瓶 器,謂是染瓨以手舉觸,觀察知已遂便棄擲,佛言:「若擎上閣猶 未半道,應須倒下置於地上。若過半者,宜應擎上平處安之。」由 不詳審瓨轉傾油,佛言:「應以物支,莫令傾側。」時彼苾芻以先 觸故牛疑不食,佛言:「是淨應食。凡諸苾芻有其二種無曾觸過: 一者無慚愧人所觸,二者有慚之人非故心觸。此慚愧人由忘念故, 俱淨無犯。」有眾多苾芻遊歷四方巡禮制底,時婆羅門及居士等, 以諸塗香、燒香、末香、花鬘、氎布,寄彼苾芻將奉制底。苾芻遇 緣不遂所望,便生疑念:「此物如何?」時諸苾芻以緣白佛,佛 言:「四大制底是其定處:一者初生處,二者成正覺處,三者轉法 輪處,四者入涅槃處。若施主元心奉餘制底,與此四處亦不相違。 若與此四有礙緣者,此四自得相通,不應餘處。」 具壽鄔波離請世尊曰:「有二苾芻共生瑕隙,種種異言互相謗讟, 於此二人,誰是可信?誰不應信?」佛言:「信持戒者,二俱持戒 應信多聞,二並多聞信少欲者,二俱少欲信極少欲者。」「二皆極 少欲,此當信誰?」佛言:「若有二俱極少欲而生瑕隙,種種異言 互相謗讟者,無有是處。」

## 第二子攝頌曰:

不應令賊住, 及以黃門等, 乃至授學人, 行籌破僧眾。

時具壽鄔波離請世尊曰:「若以賊住人作行籌者,成破僧不?」佛言:「不成。」「若以五種黃門乃至別住人作行籌者,成破僧不?」佛言:「不成。」「若以犯四重人作行籌者,成破僧不?」

佛言:「不成。」「若以授學人作行籌者,成破僧不?」佛言: 「不成。」

第三子攝頌曰:

不赤體披衣, 冒雨向厨內, 便利官縫補, 和泥福久增。

時六眾苾芻,於僧祇臥帔赤體而眠,舒張手足蹴蹋令碎。時諸苾芻以緣白佛,佛言:「僧祇臥具不應赤體而眠,赤體眠者得惡作罪。凡是僧祇所有臥帔,應以物儭,或將五條用意觀察徐徐受用。」時六眾苾芻,披僧臥帔露處經行,被雨霑漬遂便損壞。以緣白佛,言:「不應披僧衣帔於空露處冒雨經行,若有用者得惡作罪。」,可不應披僧臥具來至厨中煙熏損壞。時諸苾芻以緣白佛,佛言:「不應披僧臥具來向厨中,若有用者得惡作罪。」時有苾芻,著向大小便處,苾芻以緣白佛,佛言:「不應披僧臥具被帔,遂共除棄,以緣白佛,佛言:「不應除棄,若衣欲破應以長線而縫絡之。若見有孔應可補帖,若在內爛兩重幅疊,如總爛壞不堪料理者,應作燈炷,或可斬碎和牛糞作泥,用塞柱孔,或泥牆壁。如是用時,能令施主所捨福田任運增長。若三衣破爛,事亦同此。」第四子攝頌曰:

定物施此中, 不應餘處食; 若有將去者, 並須依價還。

佛在室羅伐城。時有長者造一住處,所施資緣悉皆充足。時彼長者請餘苾芻,於此寺中為撿挍者,然此苾芻多有弟子在餘寺住,彼為禮覲來至寺中。于時師主告弟子曰:「造寺長者請我於此寺中為撿挍者,汝等且待食竟方去。」弟子白師:「鄔波馱耶!必有食者與我持去,至彼共食。」報言:「隨意。」彼即持飯、或將燈油、求持皮屬、或有擎衣持蓋、或有持樵、有持根莖葉花果藥並皆將去,未久之間所有資具摙運欲盡。時此寺中諸餘苾芻,咸詣造寺施主家,作如是語:「長者知不?仁之寺內所有資生現今闕乏。」是時最都知以上緣具告施主,長者曰:「我豈與彼外寺苾芻耶?」長者嫌恨。以緣白佛,佛言:「苾芻不應於別處住,將此寺食而餘處,亦復不應將此寺物以供餘處。飯及燈油乃至花果,若施主本意,唯供此處住寺之人不通餘人者,若有來食,並須計物酬其價直。」

第五子攝頌曰:

僧衣題施主, 別人施私記, 氍毺許別人, 尼夏應修理。

爾時佛在室羅伐城。時有兄弟二俱出家,有撿挍苾芻著僧祗帔,便以眾帔寄兄苾芻遂往餘處。其弟苾芻自披己帔來至兄邊,即以己帔與主人衣相近而置,於後去時誤持眾帔,謂是己衣遂著而去。其撿挍人後時來至,見有別衣告言:「具壽!今者僧伽多獲利物。」答言:「不得。」問曰:「此是誰衣?」答:「是汝僧衣。」報言:「我帔寬大此衣陝小,應有餘人來至於此持我衣去,若有人來我今往問。」既到彼已遂見僧衣,問其所以,答曰:「我無故意而將峻來,若是僧衣仁可持去。」苾芻有疑,以緣白佛,佛言:「大眾之衣應為記驗。」苾芻不知云何作記?世尊告曰:「若是眾物宜應書字,此是某甲施主之衣,若別人衣應為私記。」時有織綵氍毺及小班蔣持施僧伽,佛言:「我聽大眾,亦許別人。」又有多人以鏇脚大床持施僧伽,佛言:「僧伽聽畜,別人不應。」如世尊說:「夏坐苾芻尼,有緣聽往人間遊行。」彼於住處不為修理,皆共捨去,遂便毀壞。時諸苾芻以緣白佛,佛言:「諸苾芻尼安居之處應須修理,若不爾者咸得惡作罪。」

#### 第六子攝頌曰:

若還往衣物, 送來應為受;

為眾取他財, 將眾物還價。

時有俗人親屬亡沒,為送屍骸往屍林處,所有幡氎還將歸舍,廻施僧伽。苾芻不受,以緣白佛,佛言:「是送屍衣應須為受。」時有貧人更復來借,佛言:「若貧人來借應暫與去。」彼有疑心却持還與,時諸苾芻不肯為受,佛言:「却送來時應為受取。」時有撿挍苾芻為僧伽事,於俗人邊多貸財物,未久命終。時彼俗人聞苾芻死,急來徵問:「某甲苾芻今何所在?」答言:「已死。」「彼於我處多貸財物。」苾芻報曰:「汝向屍林可從彼索。」俗人報曰:「彼為眾事不為私緣,仁等宜應還我債直。」苾芻白佛,佛言:「若知苾芻為僧伽事者,應將眾物以酬前價。我今為諸營作苾芻制其行法。凡諸營作撿挍苾芻,先報寺中所有耆宿,方可貸人,或為券記保證分明。營作苾芻不依制法,咸得惡作罪。」第七子攝頌曰:

# 甘蔗等平分, 不應分口腹;

# 四事無分法, 臥具夜不行。

佛在室羅伐城。時諸僧伽多獲甘蔗,如世尊說:「諸求寂等三分應 與一者。」時諸苾芻分張甘蔗三分與一,是時長行屈頭而坐,乃至 行未到世尊前。時具壽羅怙羅最在行末,而食甘蔗瞻仰尊容。世尊 見已告曰:「羅怙羅!汝食甘蔗耶?」答言:「已食。」佛言: 「汝今更有希望不?」答言:「有。」佛言:「汝得幾許?」答 曰:「得第三分。」世尊告曰:「我據衣利而作斯語,不依飲食,

是故我今制諸苾芻。若有食利乃至小葉,咸悉平分。若不平分者得 惡作罪。」是故多得甘蔗,如世尊說:「莫分食利。」苾芻生疑, 現得根果甘蔗,並不敢分,佛言:「應分。」乃至廣說。 緣處同前。時有俗人造一住處,有諸苾芻住此寺者,咸是施主供其 飲食。時諸苾芻共相議曰:「諸具壽!我等不以飲食為難。然支伐 羅現今闕乏,此有食直官共貨之以充衣服,各自乞食以濟飢虛。」 作是議已,無一苾芻往施主家而受其食。諸苾芻等因乞食時,施主 見問:「聖者!我為仁等每日供食,何意勞苦而行乞耶?」具以上 緣而告施主,長者報曰:「仁等豈合口腹之分大眾共分。」遂生嫌 恥。時諸苾芻以緣白佛,佛言:「有四種物不應分。云何為四?一 者四方僧物,二者窣覩波物,三者眾家供病之藥,四者口腹之物。 若有分者咸得惡作。」是時六眾遊歷人間,日沒星出方入寺中。時 諸苾芻隨其親友而為解勞,時彼六眾告諸人曰:「具壽!豈復仁等 安然忍可世尊教法而令滅耶?若有慚愧心者,可隨年次應行臥 具。」時諸苾芻即依大小次第分給臥具,彼既受已各自眠臥,未至 行末遂即天明。六眾報曰:「具壽! 收取臥具吾欲進途。」諸人告 曰:「何意仁等但求一夜而取身安,令我大眾極生勞苦。」以緣白 佛,佛言:「凡諸苾芻日暮至寺,不應令他夜分臥具,強令分者得 惡作罪。」

## 第八子攝頌曰:

果由藥叉施, 淨之方受食; 餘者為漿飲, 不燒地燈臺。

爾時世尊在賊軍國人間遊行至赤色村,於此村中,在大力藥叉神廟 而住。是時藥叉來至佛所,禮雙足已而白佛言:「唯願世尊及苾芻 僧,受我微請,於此廟中經宿而住。」是時世尊默然而許。藥叉既 見世尊許已,遂便化作五百口房,床褥臥枕帔緂方褥悉皆備足,五 百火爐炎炭滿中並絕烟焰。時藥叉神先以上房奉世尊已,復以餘房 別別分與一一苾芻。時藥叉神來至佛所,而作是言:「復願世尊及 芯 知僧,明日於此廟中受我微供。」是時世尊默然而許。此藥叉神 於羯濕彌羅國,有大藥叉名達底迦,是舊親友。即令使者報親友 曰:「我今請佛及僧,明日家中設其供養。北方果木口味尤多,幸 願隨喜助成功德。」時彼藥叉既承信已,即送葡萄、石榴、甘橘、 甘蔗、胡桃、渴樹羅等成滿筐籠,命餘藥叉送彼庭中令持供養。諸 芯 
易見而白佛言:「此北方果,不知如何?」佛言:「以火作淨然 後應食。」時諸苾芻一一別淨,佛言:「應為一聚,但三四處以火 淨之,食皆無犯。」行與眾已仍有餘長,佛言:「應可捼碎作非時 漿隨意而飲。」復更有餘,佛言:「煮已瓨盛,餘日當飲。」苾芻 寒月於塼地上隨處然火令塼壞損,佛言:「不應在塼地上輒便然

火,應以瓦承。」尚有烟損,佛言:「應作火爐。」於房中作,由 被烟壞,佛言:「於門外作。」其烟散入尚熏其目,佛言:「待烟 盡已以水微灑方持入房。」是時僧伽得一重燈樹,佛言:「聽畜, 別人亦許。」復得二重多重燈樹,佛言:「咸悉聽畜,別人畜亦無 犯。」

#### 第九子攝頌曰:

客舊宜詳審, 授受分明付, 五開應總閉, 附短可隨身。

時有眾多客芯芻來入寺中,舊住芯芻為解勞已,遂便偷竊而去。時 諸苾芻以緣白佛,佛言:「舊相識者應為解息,先未曾識勿為除 勞。」如世尊說:「未相識者勿為除勞。」時有相識苾芻既令解 息,次隨其後有一苾芻先未相識忽然而至,時彼苾芻遇緣暫出,在 後來者盜將衣鉢。時舊苾芻作如是念:「應是彼伴。」遂不遮止, 贼持遠去。 苾芻來至見無衣鉢,告主人曰:「我之衣鉢誰將去 耶?」答曰:「汝伴將去。」報曰:「我無同伴。」主人謂曰: 「逐汝來者豈非伴耶?」彼便告曰:「汝失我衣急須還我。」彼既 失已遂令廢闕。時諸苾芻以緣白佛,佛言:「凡是主人見客來至, 先應問彼: 『是汝伴不?若索衣鉢與不?』若言: 『莫與。』而將 與者,應酬彼價。若言:『與。』者,失不須酬。」次復更有客苾 芻來,時彼主人為解勞已,續次更有相識苾芻亦復來至。時此主人 暫出外嚼齒木,彼後來人盜取衣鉢,新客苾芻作如是念:「此必應 是房内主人。」曾不遮止遂被盜去。時彼舊人須臾來入,見無衣鉢 而問客曰:「我之衣鉢誰將去耶?」答曰:「房內舊人持物將 去。」報曰:「何處得有房內舊人?汝失我衣急須還價。」彼既失 已遂交廢闕。時諸苾芻以緣白佛,佛言:「凡客苾芻至他房內,應 問主人: 『若有人來索衣鉢者可與不?』若言: 『莫與。』而與者 計直酬價。若言:『與。』者,失不須酬。」時客苾芻,於舊苾芻 處寄衣,遇緣欲去告主人曰:「有小苾芻來者,當與此衣。」於後 未久小芯器來至,與所寄衣因即偷去。以緣白佛,佛言:「若客芯 **芻囑**與者,設令偷去亦不應陪,然須明作記驗方與。」遂作顯露囑 授之言,傍人既聞詐來索物,因此失財,佛言:「官應屏處為說記 驗,分別顯示寄物之狀,然後與衣。」時有苾芻隨路而行,既至河 津乘船欲去,語其伴曰:「過衣袋來。」彼便授與,授受不牢,衣 便墮水。苾芻告曰:「還我衣袋來。」彼便不伏。時諸苾芻以緣白 佛,佛言:「乃至未受不應輒放,未受而放即應酬價。」有持鉢袋 過與餘人,墮彼手中遂便落水,既失鉢袋從彼索陪,以緣白佛,佛 言:「乃至未受不應輒放,若故放者應須陪直。」守寺之人被賊偷 物,大眾共議,令守寺人陪所失物。時諸苾芻以緣白佛,佛言:

「汝等應知!凡授事人閉寺門時有其五別: 調上下轉鳴鎖并副鎖門關及居,不閉賊偷准事酬直,若闕一者應還一分,乃至若總不著應可全償。若掌寺人存心守護,五並不闕者,設令損失並不應陪。」時鄔波離白佛言:「如世尊說:『凡諸苾芻應取肘量作衣服者,有人肘短身長,亦依肘量而作衣不?』」佛言:「應依身量,不應依肘。」

#### 第十子攝頌曰:

裙及僧脚敧, 香泥污衣洗, 取食除多分, 須知十種塵。

時諸苾芻裙被油污,遂令氣臭。時諸苾芻以緣白佛,佛言:「應畜副裙。」乃至僧脚敧,汗污亦流徹濕污大衣,佛言:「應畜副僧脚哉。」時諸苾芻設大供養,被諸香泥末香及油沾壞衣服,以緣白佛,佛言:「若末香損者應須抖擻然後方披,香泥污者洗已應披。若被油污,應以澡豆灰等洗去油膩然後應披。」時諸苾芻正受食。於其羹汁別汁墮中,佛言:「應多瀉却,餘者應食。」時諸苾芻入行乞食,風雨卒至塵墮鉢中,生疑不食。又正食時塵入,時諸苾芻入行乞食,風雨卒至塵墮鉢中,生疑不食。又正食時塵入,時諸苾芻有五種塵。云何為五?一、觸塵,二、十觸塵,三、淨塵,四、不淨塵,五、微塵。此中觸塵若墮衣者,應可洗除。若墮鉢中,除已方食。復有五塵:一、食塵,二、飲塵,三、衣塵,四、花塵,五、果塵。此等諸塵眼可見者,受已而食,不可見者隨意應食。」

根本說一切有部目得迦卷第十

## CBETA 贊助資訊

(https://www.cbeta.org/donation/index.php)

自 2001 年 2 月 1 日起, CBETA 帳務由「財團法人西蓮教育基金會」承辦,並成立「財團法人西蓮教育基金會」- CBETA 專戶, 所有捐款至 CBETA 專戶皆為專款專用,歡迎各界捐款贊助。

您的捐款本協會皆會開立收據,此收據可在年度中申報個人或企業的綜合所得稅減免。 感恩諸位大德的善心善行,以及您為佛典電子 化所做的一切貢獻。

## 信用卡線上捐款

本線上捐款與聯合信用卡中心合作,資料傳送採用 SSL (Secure Socket Layer) 傳輸加密,讓您能夠安全安心地進行線上捐款動作。

## 前往捐款

## 信用卡 (單次 / 定期定額) 捐款

本授權書可提供單次捐款或定期定額捐款之用途。

請於下載並填妥捐款授權書後,請傳真至 02-2383-0649,並請來 電 02-2383-2182 確認。

或掛號寄至 10044 台灣台北市中正區延平南路 77 號 8 樓 R812 財團法人西蓮教育基金會收。

請在此下載 授權書 (MS Word 格式)

## 劃撥捐款

郵政劃撥帳號:19538811

戶名:財團法人西蓮教育基金會

欲指定特殊用途者,請特別註明,我們會專款專用。

## 線上信用卡 / PayPal 捐款

PayPal 是一個跨國線上付款機制的公司, CBETA 引用其服務,提供網友能在線上使用信用卡或 PayPal 帳戶贊助 CBETA。

PayPal is an online system of a global payment solution. CBETA uses its service to provide the uses to donate by using the credit cards or PayPal account to support the CBETA project.

相關收據開立事宜,由於付款幣別為美元,我們除了會依您所贊助之美元金額開立收據外,另我們會依捐款當日公告匯率開立台幣收據,此收據為國內正式合法報稅憑證。

Since the donation made is in US currency, hence all the receipts will be issued in the US dollars consequently. However for the domestic donators, a Chinese official receipt will also be made according to the foreign exchange rate for the purpose of tax deduction.

## <u>線上信用卡 / PayPal 贊助</u>

# 支票捐款

支票抬頭請填寫「財團法人西蓮教育基金會」。

CBETA is part of Seeland Educational projects, any donation (ex-cheques, remittance, etc.,) please entitle to "The Seeland Education Foundation".